



226512
4432066
:12



Kodak Color Control Patches



蘇州府志卷第三十二

壇廟一

府社稷壇

風雲雷雨境內山川城隍壇

先農壇

八蜡

郡厲壇

文廟

並見學校各縣同

關帝廟

府城隍廟

都城隍廟

財帛司堂

糾察司廟

火神廟

劉猛將廟

旗纛廟

龍神廟

名宦祠

鄉賢祠

二祠見學校



吳縣社稷壇

風雲雷雨境內山川城隍壇

先農壇

邑厲壇

泮墅關文廟



蘇州府志

卷第三十二

壇廟

目錄

一

城隍廟

關帝廟

忠義孝悌祠

見吳縣學

節婦祠

夏禹廟

醫王廟

至德廟

吳恭孝王廟

延陵季子廟

吳相伍大夫廟

復聖顏子祠

徐孺子祠

葛洪祠

陶靖節祠

沈隱侯祠

顧黃門祠

韋公祠

范文正公祠

韓忠獻公祠

樂圃先生祠

洪忠宣公祠

朱文公祠

張宣公祠

范文穆公祠

魏文靖公祠

張崇公祠

徐靖節公祠

張忠靖公祠

張純忠公祠

張太傅祠

都南張公祠

金仁山先生祠

宋公祠

表忠祠

况公祠

張文僖公祠

陳僖敏公祠

王文恪公祠

徐文敏公祠

錄功祠

陸包山祠

袁安節公祠

申文定公祠

張靖孝先生祠

筠谷祠

周忠介公祠

忠仁祠

席太僕祠

郁孝子祠

于清端公祠

湯文正公祠

張清恪公祠

陳恪勤公祠

貞烈祠

尹公祠

王孝子祠

尹陳二公祠

費岳二公祠

以上祀典

蘇州府志卷第三十二

壇廟一

國之大事祀居其一凡郡縣應祀神祇及先代之有功德於斯土者與夫鄉先生之沒而祭於社者詳著於篇其祀典所不及而土俗相沿舉而不廢者亦附焉

府社稷壇在閶門外義慈巷地隸吳縣宋時建在子城西南四里一

百五十步元徙盤門外明洪武三年知府陳寧移建閶門外

石牌巷地隸長洲縣宣德八年知府況鍾移今所 本朝乾隆二

年 敕修附郭三縣統祭於此壇制累石為之縱橫各三丈高四尺二寸凡為階三各三級前為拜壇高尺許東西三丈

二尺南北二丈四尺壇之西南為神廚南為宰牲所前有池
 齋房東西相向各二所壇之內垣東西三十五步南北三十
 三步外垣深二十四步廣六十二步北出為大門一儀門三
 石主二一埋壇南正中一卧於地長四尺二寸徑一尺二寸
 神牌二高三尺三寸曰府社之神曰府稷之神歲春秋仲月
 上戊日致祭

風雲雷雨境內山川城隍神壇在盤門外一都地隸吳縣宋時建在

吳縣治西南四里元徙葑門外地隸長洲縣明洪武間移今所宏

治十四年知縣鄺璠修 本朝乾隆二年奉 敕修附郭三

縣統祭於此壇制累石為之東西三丈六尺南北三丈七尺

高四尺二寸東西南北各有階階各三級壇之東北為宰牲
 所前有池又前為庫齋房二一在壇東南一在壇西南壇之
 內垣東西三十五步南北三十六步外繚以短垣基凡二十
 四畝大門一儀門三歲春秋仲月擇吉日致祭同壇設神位
 三曰風雲雷雨之神曰境內山川之神曰府城隍之神

先農壇在南新橋西長洲縣治南 本朝雍正五年 敕建壇制在

藉田後累石為之高二丈一尺寬二丈五尺壇之正北中一
 室供先農神牌東房貯祭器農具西房收藉田米穀東配房
 置辦祭器西配房為看守農夫所居外繚以垣門南向藉田
 制四畝九分歲仲春亥日致祭先農之神禮畢耕藉田巡撫

秉耒知縣執青箱知府播種各縣正印官秉耒耆老一人牽

牛農夫二人扶犁九推九反農夫終畝耕畢官率耆老農夫

望闕行禮農具用赤色牛黑色箱青色耔種以上之所宜

八蜡卽先農壇祀之 本朝雍正十一年 詔有司歲十二月

上戊日致祭先嗇司嗇居正位東上餘六神稍後一尺分設

左右常時供先嗇司嗇神牌於先農神牌之東西並南面餘

六神列兩旁東西相向三縣統祭於此

郡厲壇在虎邱山前附郭三縣統祭於此壇制累石爲之縱橫

各二丈高四尺歲清明中元十月朔致祭

文廟並見學校各縣同

關帝廟在卧龍街周太保橋北

地隸長洲縣

宋淳熙中建廟神爲漢

壽亭侯神於蜀漢景耀二年追諡忠義侯宋崇寧元年封忠

惠公大觀二年封武安王宣和五年封義勇武安王建炎二

年封壯繆義勇武安王淳熙十四年封壯繆義勇武安英濟

王元天歷元年封顯歷義勇武安英濟王明洪武二年詔依

初封漢壽亭侯萬曆十八年封協天護國忠義大帝四十二

年封三界伏魔大帝神威遠震天尊關聖帝君 本朝順治

九年 勅封忠義神武關聖大帝雍正五年 勅封神曾祖

光昭公祖裕昌公父成忠公增設神牌於後殿乾隆三十三

年 勅封忠義神武靈佑關聖大帝嘉慶二十年 勅封忠

義神武靈佑仁勇關聖大帝歲春秋二仲月及五月十三日致祭

按神歷代崇奉至 本朝而典禮尤隆諸縣境城市鄉鎮廟祀殆遍茲不盡載

府城隍廟在武狀元坊 即雍熙寺基 舊在子城西南隅明洪武

三年改建今所宏治十二年修王鏊記嘉靖十七年重修黃

魯曾記 本朝康熙五十年重修知府陳鵬年記乾隆五十

四年巡撫閔鶚元等重修潘奕雋記

王鏊記

吳故有城隍祠在子城之西南陬莫詳其所始唐天寶中採訪使趙居貞改作廟宇梁貞明五年刺史錢元璋加宏飾焉至趙宋時有勅封忠安王嘉泰三年加號順應嘉定九年又

加號威顯寶祐三年又加號英濟國朝則惟稱蘇州府城隍之神洪武三年以舊祠庫陋乃徙雍熙寺故基在今吳城之乾位百三十年於茲矣宏治十三年住持戈原廣言於郡守曹侯鳳謂廟祀載在令甲凡在守土官始蒞事及朔望必躬謁祠下其嚴如是而歲久就壞棟腐榑摧墻頽城圯肖像昧不稱瞻仰曹侯曰唯神與子分理吳郡子理其明神理其幽吳下頻年風調雨順稻麥豐登寇攘帖息疫癘不作茲神之賜予其敢忘乃下令境中願新神廟者聽又令義官某等董其役於是貧富爭施厥財恐後掄材程役完舊勅新明年春正月始事至九月僦工殿宇峻麗廊序透邃門牆顯赫過者悚悅會曹侯遷去東廣林侯世遠繼之求子紀其事城隍之祀不見禮經蓋起隋唐之際吳越之間今畿至郡縣遐方絕徼罔不嚴事且山川林谷邱陵表畷坊庸古皆有祭則夫作鎮一方司啟閉捍寇偷婦子安畜牧遂非所謂有功則祀之者耶固可以義起也況時有所尚敬有所偏今自朝廷及於閭閻祈靈丐祥罔有晝夜有所尚敬有所偏今自朝廷則禱之凡有求則禱之有疑則禱之而神之昭答陰佑嚴乎如臨其上至其家可謂靈也上帝嘉之寄是威福浩浩三吳靈詞曰於赫明靈作鎮南服上帝嘉之寄是威福浩浩三吳罰賞在予孰越厥志巖碩効九雲車風馬四覽幽遐雪劍星

予誅斬妖魔妖魔卒斬良惠屏植破戾煽祥雨賜斯若老
熙熙問門夜開維神之賜其可誣哉清廟有嚴曹侯所飭林
侯紹之邦典維秩醜牲椒糝歲事孔修福我邦人億千萬秋
本朝潘奕雋記

蘇郡城隍廟在流化坊北考諸志乘建自明洪武三年地為
周瑜宅故址宏治間修之少傅王公鏊為之記嘉靖中復加
葺治 本朝順治十一年巡撫張公中元捐俸增修康熙六
年道士沈圓等募創後宮未幾殿宇頽廢不稱瞻仰長沙陳
公鵬年來守是邦重加修整迄今七十餘年矣後殿穿堂榱
表城圯無以展誠敬安神靈歲甲辰郡守胡公世銓下令募
修維時邑宰袁侯秉義汪侯廷助李侯逢春咸為勸助既皆
先後遷去未克鳩工戊申秋邑人宋崇信高德會等慨然有
與修之謀維時大中丞閔公鶚元方伯奇公豐額咸捐俸為
之倡一時僚屬縉紳士庶罔不踴躍樂輸若恐後即於其年
九月經始迄今已酉五月藏事正殿後宮亭臺門廡庫藏庫
者崇之傾者建之朽者易之泐者葺之剝蝕者塗茨丹雘之
其木石土瓦金碧髹漆之材以值計之凡七千二百有奇用
人之力以工計之凡二萬四千三百有奇奕雋舊居流化坊
於廟為近去年冬請假旋里羽士袁守中為述樂輸之誠襄
事之敏請為文以識其事考城隍之祀始吳赤烏二年由唐

逮宋或賜廟號或頒封爵明初則詔封天下城隍神主祭春秋二
者俟縣者伯勒郡邑里社各設厲壇以城隍神主祭春秋二
時與風雲雷雨山川同壇並享謹按大清通禮直省府州
縣各建神祇壇祀雲雨風雷境內山川城隍之神歲春秋仲
月諏吉致祭在城文武各官皆與省會則總督巡撫主之
隍之祀由來重矣况吾郡城隍保佑生民靈爽尤著各省土
商及九邑三衛之人有報有祈虔禱輒應則堂構妥侑體制
宜隆今以數十年因循未修之舉不一載而觀厥成整齊嚴
肅巍乎煥乎以仰體我國家務民敬神之意以下遂我士
庶事神如在之誠可不謂急公而好善者歟爰紀歲月勒諸
石思告來者
備覽稽焉

都城隍廟在泗州寺西為巡撫衙門香火

財帛司堂在昇平橋西為布政司衙門香火

糾察司廟在朱家園為按察司衙門香火

火神廟在清嘉坊東明萬歷間建 本朝康熙五十一年修乾

隆七年拓地增建知府覺羅雅爾哈善記

劉猛將軍廟在中街路宋仙洲巷宋景定間建廟相傳神姓劉

名銳卽宋名將劉錡弟歿而爲神驅蝗江淮間有功 本朝

雍正十二年 詔有司歲冬至後第三戌日及正月十三日

致祭乾隆八年知府覺羅雅爾哈善修廟有記一在閶門外

江村橋西宋建元季燬明初重建一在盤門營內明永樂間

建一在橫塘明萬厯間建一在東洞庭山楊灣明崇禎間建

旗燾廟在教場演武廳旁地隸吳縣歲以霜降日記軍牙六燾之神

舊在蘇州衛 本朝康熙間移建今所

龍神廟在舊子城基地隸長洲縣 本朝雍正六年 勅建 賜號

福吳富農龍神

名宦祠

鄉賢祠 並見學校

吳縣社稷壇舊在縣治西半里宋建今廢統祭於府壇

風雲雷雨境內山川城隍壇舊在橫塘北宋建今廢統祭於府

壇

先農壇在縣治東南盤門外一都五畝 本朝雍正六年 勅

建制詳府壇

邑厲壇舊在閶門外白蓮橋內宋建今廢統祭於郡厲壇舊各縣皆

有鄉厲壇今俱廢

許墅關文廟在中津橋北明時本係義學 本朝嘉慶二十年
權使阿克東阿倡修如郡邑制

石韞玉許墅關文廟記

蘇州西北三十里而近其地曰許墅有闕焉 國家稽察非
常並征稅之所也明時司農遣其屬專掌稅務令制則以織
造使者兼領之其地四方市舶鱗次兩厓間烝人成聚烟火
萬家雖在郊坰之外其景物繁昌與郡縣等明嘉靖九年戶
部員外郎方鵬司是關始於中津橋之北創立義學以教授
生徒卽於其地廟祀至聖先師歲時以祭歷今二百有餘歲
不廢近歲其地士民因舊圖新議加修葺請于權使阿公公
首捐俸百金四民踴躍樂輸者雲集響應塗茨丹雘次第畢
祀先賢先儒名位悉從今制殿中懸 御書匾額殿後重
建崇聖祠及方公祠又採形家之言新建文星閣一座兩旁
樹龍門鳳池門築泮池之堤增高宮牆門外立官民下馬牌
又考孝子及先後登科第者榜其姓名於明善堂之楣制度
大備畧與郡縣相埒是役也經始于嘉慶二十年仲冬之月
期而告成諸生凌壽祺金晉陸廷燦等董其事凡用金錢一

百萬有奇嘗思聖人之道若日月之經天江河之緯地日月
光華炳耀六合而一微塵之細亦無所不燭江河之水包兩
戒絡九州而涓滴之澤必及於物故宇宙間無往而非道卽
無往而非聖人之靈爽所式憑也古者黨有庠術有序雖十
室之邑必有學學必釋奠於先聖先師古之帝王所以崇禮
敦厚風俗其意若此之盛也今 聖人御宇尊儒崇道臨
雍講學而闢橋門觀聽者如見三代之隆天下一郡一縣無
不建有文廟設立學宮春秋享祀如禮文治之盛古今未有
茲許墅僻在一隅之地而彼都人士亦能崇廟貌修祀典青
衿子弟絃誦於其中俾觀者如身游洙泗之間此非風俗醇
樸禮教昌明之效與是廟興修者屢矣均有舊記可考
茲復志重修歲月于麗牲之石以備後之人考索焉

城隍廟明初附像於府城隍廟西廡萬曆二十三年知縣袁宏

道於廟儀門之右創建崇禎十三年知縣牛若麟修 本朝

康熙十二年重建 嘉慶二十年知縣詳請春秋
專祭長元二縣城隍廟同

關帝廟在城中飲馬橋南明洪武十二年建

忠義孝悌祠見吳縣學

節婦祠在縣治西南小南亭一畝 本朝雍正元年 詔建八

年縣人譚士楷請以其母朱氏坊左門堂改爲之

夏禹廟在柳巷

醫王廟在清真觀醫學舊稱三皇廟在流化坊 即舊吳縣治地隸吳縣 祀

伏羲神農黃帝 本朝康熙二十八年改建今所並祀夏禹

三十年知府盧騰龍請以岐伯伯高鬼臾區少俞少師雷公

配改今名乾隆四十六年改建

彭紹升醫學四聖廟記

昔人有言吾終身戴天而不知天之高也終身履地而不知地之厚也豈惟天地哉古者帝王後先述作窮深洞微既克自盡其性因而經緯五行宰制萬物使天下之人莫不各盡

其性其道行乎一時而其功被于萬世然而天下之人往往享其利而不知其所由然習而忘焉者皆是也若夫巫祝之守城隍里社之神祈禳者踵接豈非功之近而小者易見其遠而大者難知唐民之歌堯生當其時且以爲帝力于我何有況其在千百世下哉雖然此特未明乎報本反始之義爾孔子刪書斷自唐虞而繫易必推本于伏羲神農黃帝劉子之觀雒汭也曰微禹吾其魚乎後之人讀易春秋者亦嘗隱然動于其心乎故曰三王之祭川也皆先河而後海或原也或委也此之謂務本自元以來郡國醫學得祀伏羲神農黃帝謂之醫王廟亦謂之三皇廟我朝因之康熙中蘇州醫學諸生以三皇無專祠請於有司即禹廟合祀四聖而以岐伯諸臣附積數十年廟圯弗治徐君步安倡諸同學共捐金錢若干經始于乾隆四十六年十一月越明年十月落成規模粲然有恢其舊已而具其顛末屬子爲之記夫四聖之功與天地並與生人相終始豈獨醫者所宜祀然即以醫論演圖畫卦通神明之德類萬物之情醫之原也述素問厥本草醫之方也地天成人之德辨五土殖五穀醫之輔也微四聖則此道之熄也久矣徐君之亟亟於是舉也其明于報本反始之義者乎入是廟者即小以見大自近而及遠當知由四聖之教不獨治人之身病而已又能治人之心病焉而欲治人之

心病者必先自治其心始何以治之其亦深究於孔子繫易之文反之演圖畫卦之先而默契夫古帝王述作之指盡已之性以盡人之性然則吾心之病愈而天下人之心病無弗愈其為報本反始也豈不大哉

至德廟在閶門內東行半里餘

盧志在長洲縣西北一里半

祀吳泰伯初東

漢水興二年太守麋豹建於閶門外

或云韓整守吳所創

晉內史虞潭

改理為之立碑給事中潁川庾闡製文宋元嘉中劉損為郡

命修葺之梁時郡人陸雲公作廟碑朱梁乾化四年吳越錢

鏐徙廟今所

圖經續記蓋以避兵亂盧志廟梁有寧海鎮東軍節度使錢鏐題名

宋元祐七年

詔廟號為至德

盧志知州梅詢范仲淹孫覺屢以禱雨感祐元祐六年黃履具其事以聞

元符三

年詔封號為至德侯崇寧初進為王建炎廟燬乾道元年知

府沈度修淳祐十二年提刑潘凱重修悉屏去耐祀之神惟

繪仲雍季札二像侑享明洪武二年詔改稱吳太伯之神宣

德五年知府況鍾修廟成化中巡按御史張淮嘉靖中巡按

御史陳瑞萬曆中巡按御史甘士价知府石崑玉巡鹽御史

胡繼升先後葺治崇禎二年知府史應選修南尚寶卿吳爾

成助成之本朝康熙二十三年巡撫都御史湯斌重修四

十四年

聖祖仁皇帝南巡御書至德無名四字額命所司製置廟

中五十九年巡撫都御史吳存禮修楊繩武記一在唯亭致

和塘南名讓王廟文震孟記

宋曾幾重修泰伯廟記在禮祭法聖王之制祭祀其法五其人之應法者十有四皆

忘堂皇之修不修龐雜之屏不屏于至德乎何損乃若辨禮
息刑宣尚德化正人心而與民風者吏獨不任責乎昔唐狄
公持節江南無能為役而七百所留夏禹泰伯季札伍員四祠
凱視狄公無能為役而七百所留夏禹泰伯季札伍員四祠
舊在闔門外錢氏徙今址故有祜田一十八畝今益五十九
畝有奇歲粟入五十有五石飯浮屠以守儲其贏為修祠備
俾勿壞并序其系自古公至友為世二十三刻之石諗來者
攷焉

明周忱重修泰伯廟記
宣德五年秋七月禮部郎中况鍾伯律奉璽書來知蘇州視
事之日吏以囚牘進見民之繫獄者千餘人尚爭務勝交相
訐訟有經十餘歲未決者伯律姑置弗問越明日率郡之父
老進謁于吳泰伯廟見其堂宇傾仆垣墉頽圯吏民奉祀弗
虔乃喟然嘆曰民不見德宜乎刑之不濇也是非郡守之先
務乎即日命工度材撤其舊而新之曰堂曰室曰門曰廡為
屋凡四十楹繚以周垣堅以甃簣不十日而告成復率父老
潔牲醪祇祀於廟居人過客瞻望咨嗟于是獄之繫囚交相
愧悔曰泰伯以天下讓民無得而稱焉吾輩所爭僅錐刀之
末耳何重貽郡侯之羞乎皆相與俯伏庭下自服其辜不數
日而獄以空虛告子時奉命巡撫江南列郡至蘇州祇謁祠

下父老以其事告且曰昔者狄梁公以冬官侍郎為江南巡
撫使毀吳楚淫祠千七百所而此廟則在所留而不毀者去
今千有餘年得吾郡侯葺而新之巡撫之來又適當其時吳
民觀感興起自今其無復爭競之風乎予乃登進其父老而
告之曰方泰伯之奔吳也斷髮文身示不可立然荆蠻義之
從而歸之千餘家遂端委以臨其民是欲辭富貴而富貴隨
之及其後世夫差狃于必勝窮兵黷武破越困齊欲伯中土
卒之國亡身戮妻子為俘是欲求富強而失其富強矣然則
吳地數千年之富庶由泰伯之三讓有以致之也其鬪爭之
成風者亦由夫差之一好勝有以啟之也爾民欲為泰伯之讓
乎欲效夫差之爭乎一則廟食萬世一則貽譏千載其得與
失必有能辨之者孔子曰能以禮讓為國乎何有此子與太
守期望於吾民之意父老曰善請以是為記遂書于麗牲之
石使四方之來謁者咸有所觀感而興起焉豈獨蘇之民而
已哉

本朝汪琬重修至德廟記

閭門內至德廟者故所建以祀吳奉伯者也吳越武肅王時
始度地創置於此宋元祐間賜廟額曰至德崇寧改元制書
累進王爵以仲雍暨延陵季子札配明洪武中復改稱吳泰

伯之神歷世修葺者屢矣既入皇朝益荒圯弗治殆無以
障風口有司雖歲時致祭特奉行國家令甲餘悉不暇問
也巡撫都御史湯公甫莅政即涓吉謁廟顧瞻徘徊不勝歎
息乃下令撤巫祠之淫者以其餘材鳩工而改爲之有不足
則捐俸金若干兩佐之又不凡三閱月而訖工不知勞民不
兩且遣縣丞塗崇焜董其役凡三閱月而訖工不知勞民不
知費其毀址視昔稍縮至于崇閣修拱危垣文陛以訖丹堊
之絢麗木石之堅好則有加焉公以七月之朔齋祓率諸屬
吏晨趨廟中陳牲薦醴命祝師讀版以成事告是時吳士民
方大和會公呼衆諭之曰爾曹亦知之乎當勾吳之爲荆蠻
也語言風俗不達于上國迨至泰伯來居斯土然後端委以
治而二千餘祀之間文教由是始啟其末不幸有鱗設諸要
離之屬出而民人效之向氣鬪舞劍輕死則伯之遺風漸
以衰矣爾曹亦知之乎今者市井鱗比舟車紛拏冠帶文章
甲于海內伊誰之力而莫或念也言未既郡人汪琬在公側
乃復揖衆而申公誨曰誠哉公之言也抑琬嘗聞文者禮之
迹也讓者禮之基也伯之用文教治吳也蓋實以三讓爲之
本古者政化之成也則公卿讓于朝士庶人讓於都鄙耕者
讓畔訟者讓田職是故也故也故也故也故也故也故也故也
後世禮教既廢錐刀之末尺縷斗粟之微靡所不爭于是父

子相譏婦姑相諍伯仲相闕及其甚也訟獄繁興盜賊滋熾
孰非不讓權輿之與此我公下車以來所爲日夜有感于吳
人者也公之蒞政未期亦既鉅豪強懲貪蠹崇師儒興學校
矣而猶惓惓于茲廟者豈徒曰至德必百世祀哉凡欲藉是
以爲吳人勸也繼今以往或過伯之廟肅瞻伯之像設有不
懼然而思翻然而悔慨然而改者匪特孤我公之教也抑亦
孟氏所謂非人矣琬願借我父老共勉之以倡諸子弟可也
衆皆曰善既退公以書抵堯峯屬琬志其修葺顛末再辭不
獲命因并書前
言以復公云
龔頤正迎享送神詞
翼翼兮新宮蘭栢兮枿桂祥氛總總兮高靈下墜君視八紘
兮昔何殊于敝屣兮復何有兮一席之壤惠我吳人兮曷日
以弭吁嗟君來兮我心則喜君不來兮清醑溪毛陸離兮篁簞
堂上屢舞兮堂下君來兮使我心苦車兮載旃舟兮揚颿
鮮兮亦有肥豕君不來兮使我心苦車兮載旃舟兮揚颿
鼓咽咽兮君當還君肯來兮使我心苦車兮載旃舟兮揚颿
不我留兮下土囂煩福我吳人兮無疾與患予秋萬歲兮歌
以至德
何言

吳郡志引辨疑志舊廟東又有一宅祀泰伯長子三郎盧志并援吳地記云唐泰伯廟內有延陵季子陪祀號東殿三郎解之以祖孫同廟季子適居第三而直斷之以為俚俗所傳不足深較信矣唐人詩云一廟爭祠兩讓君是仲雍久已並祠延陵季子侑祀見圖經續記非始淳祐考凱記蓋撤非類之附祀者而獨像仲雍季札以侑享耳

吳恭孝王廟在東洞庭山之白沙山祀吳仲雍 本朝康熙二

十九年建

延陵季子廟在東洞庭山之武山錦鳩峰下元至正五年建

吳相伍大夫廟在胥門內朱家園即督糧同知廢署改建舊在胥口胥山

上盧志吳縣西南四十里子胥死吳人于此立祠俗稱胥王廟宋乾道

間重修明正德間又修莫旦記又有廟在盤門內俗稱南雙

廟范志南雙廟在盤門裏城之西隅二廟左英烈王伍員也右福順王隋陳杲仁也杲仁又稱武烈帝或云五代初常

潤尚屬淮南杲仁廟在常潤間錢氏得常潤遂移廟于蘇按

吳志孫權既稱尊號諡曰武烈皇帝帝號與杲仁同況堅

墓吳地記謂在城南二里許去盤門密邇疑此廟恐是祠堅

耳盧志圖經云廟在吳縣西南四里一為安邦武大王一為

福順賢德王但永昌與安邦二不同嘉熙八年知府王遂改

福順王歸常州立吳相伍君漢破虜將軍孫君二祠于此仍

為文以祭伍孫雙廟謂此續志又云梁開平四年勅封杲仁

為福順王與吳江曹王同封永昌孫武葬地也吳俗多以名

字稱如以子胥為胥王之類按越絕書武 宋建中靖國初知

葬巫門外去縣十里今永昌去縣非十里

府吳伯舉修元大德三年嘗著靈異回海潮敕封號為忠孝

感惠顯聖王至正間廉訪僉事李仲美別立廟於胥門上胥門

有伍公祠其神像作立以望越師入之狀明郡守況鍾謁祠命改坐像并拓開其堂址掘地得一石鐫有字云若要子胥坐須待二兄來蓋公 後仍立舊廟明成化十五年燬巡按御姓也見況太守集

祀連尹奢棠君尚于寢康熙間裔孫大鈞重修有王鳴盛記
其在胥門上者曰忠孝王廟一在東洞庭山之楊灣 本朝

康熙初建陳瑚記

宋蔡京重修雙廟記
今天子即位元年愛重黎庶慎簡牧守詔以左史吳公為直
祕閣知蘇州公至期歲政化大洽姦盜屏斥牒訟疎簡民用
康靖公曰噫嘻先成民而後致力于神古之善經也今俗且
治矣其錄境內神祠之廢壞者以公帑之餘修之使安定休
正無有崇厲為吾民憂吏曰城西南隅有舊廟二荒陬當完
按圖經暨州縣版祝所稱一為永昌武大王一為福順賢德
王而邦人由閭閻市井及學士大夫自昔相傳皆以為伍子
胥廟歲時祭享甚盛雜然同詞莫可奪也或言故隋將陳杲
仁嘗以陰兵助錢氏伐淮寇有功錢氏崇報之請於梁朝封
福順王又使諸郡皆為建廟則福順之號為杲仁無疑至永
昌之稱杳渺不可稽考不知為何時人今邦人獨以子胥之
故願眾私出力以卒營繕協謀齊慮鳩工類材填郭溢郭奔
走相屬惟恐其後故月不更朔而廟已告新今或稱號仍舊

殆恐無以安子胥之靈而失邦人所以完廟本意敢以為請
公曰然昔吳瀕海建國恃水作險內虞泛濫外闕守禦鼃龜
之與處而魚鼈之與居肇自子胥相土味水築置城郭實倉
廩治兵庫闢門二八以象風卦始能啟塞有時疏導無壅除
昏墊蕩析之虞而存抱關擊柝之警更祀幾百歷載踰千其
城域門號至今因之而不變是子胥常能安吾民也不顧小
義卒雪大恥勇於納諫以至刎身二者皆由前足以致人之
不死蓋以為吾父今日之死蓋以為吾君由前足以致人之
為孝由後足以教人今日之為忠忠孝之迹昭著前史殊尤卓
震暴耳目匹夫匹婦可以與知及其久也宜胥化焉故後漢
太守麋豹按行屬城問風俗所向其功曹唐景曰處家無不
孝之子立朝無不忠之臣倘非漸漬餘風被服成俗疇能臻
此哉是子胥常能教吾民也既德茂矣宜當血食于此地
由子傳孫綿綿聯聯以至今日厥德茂矣宜當血食于此地
而廟貌不立于城闕乃至斯民憑假他祠以崇敬奉此殆疇
昔守職者之闕吾敢不勉祭法曰法施于民則祀之以死勤
事則祀之以勞定國則祀之非此族也不在祀典今福順雖
有功異代事蹟僅存斯民弗敬慕蓋託子胥獲享不替而武
氏名字功德闕然湮滅無考証使子胥不忘斯民實鑒臨之
則武亦安敢正宇而饗也禮固一壇廟一

蘇州府志 卷三十一 壇廟一

奠正英烈之號以嘉廟額而用不承民志殆或可乎武林元
 時敏曰好惡靡常莫能自克惟民為然古之君子因其治成矣
 之善而導之反民所好之非而禁之好惡得正而其治成矣
 鄭人欲祀伯有子產從而封焉鄭人欲祭河伯西門豹從而
 禁焉二子豈嘗有異意哉顧民好惡有當否也今吾民願祀
 子胥甚勤是知有功之不可忘而忠孝之可勸也因而導之
 使成于善此所謂不嚴而治者顧豈俗吏之所能為邪今公
 一舉廢事而順于民安于神又足為天下之勸三善備矣不
 可不書也
 於是乎書
 元鄭元祐忠孝感惠顯聖王廟碑
 孝莫大于雪父讐忠莫大于以死諫能養志者孝矣而忠未
 之聞能尸諫者忠矣而孝莫之顯故兼全忠孝者自昔以為
 難至于王者而忠孝全節照映千古論者謂王脫身不死所
 以為父至其指身必死所以為君若夫求忠臣於孝子之門
 則王是也故迄于今幾二千年不特焜耀史牒與夫廟食不
 毀至于樵童牧豎亦莫不知王之為烈也夫吳自泰伯以來
 隱約荆蠻謂其城邑不過三里而縱民耕耨其間則文身斷
 髮自同俚俗鼃黽與處不異蠻民及王身事闔閭君臣志合
 乃擴其小而大是圖屏其陋而明是向乃為之築城郭建宮

室實府庫厲兵戎使吳自拔于蠻服而盟會于上國者大抵
 皆王之功也於後吳雖盡入于越而吳人思王不忘於是建
 廟于盤門裏城之西隅圖經與州縣祀版皆謂雙廟一為永
 昌武定王一為福順賢德王若邦人與學士大夫自昔相傳
 則皆以為子胥廟所謂福順則常州陳烈帝異代異邦而吳
 人所以祀烈帝者當吳越錢氏有國時崇報之請也若王忠
 孝傑然自宜專祠故唐贈右相狄文惠公持節巡撫江南棄
 燬淫祠小廟于七百所獨存夏禹泰伯延陵季子并王四廟
 夫王德化自後漢太守康豹按行境內其功曹唐景曰處家
 無不孝之子在朝無不忠之臣藹乎其言莫之尚也皇元大
 德三年王嘗顯靈以止浙江之怒潮于是推贈王爵至正十
 二年廉訪僉事遼東李公書吏絳州屈臣巡按吳下力為吳
 民繕完城郭已而御史臺檄專以築城池者王之功莫大焉
 儀馬公二公念為吳建邦啟土首築城池者王之功莫大焉
 今重築於二干載之後大王大役必祈神祐庶幾育雨颺風
 不為之害待畢日當為王重建廟貌以爲神庥之報今城果
 完廟不可不作也乃作王新廟于胥門之上按郡乘昔王嘗
 宅于其傍故城門所由名夫王之英靈且將與三光五嶽之
 氣併為久遠則於助順福國何遠近而況于王之故宅與
 王之故國也哉廟成乃為迎享送神之詩以落之詩曰胥門

壇廟一
 五

岩岩新廟攸作神顧茲邦昔我是擴雲旗徘徊下寥廓兮神
 宮肇啟肴醑膳美神其願歆醉飽以喜民安盜弭降福祉兮
 神之歸兮躡層雲山轟轟兮水沄沄金支孔蓋光續紛素車
 白馬還天闔年登穀稔兮神賜者侈樂神無窮兮自今伊始
 明王鑿伍相廟碑
 吳之先介在蠻夷不與中國通者十九世自巫臣來歸而後
 知射御季札出聘而後得觀周樂及子胥來奔以闔閭伯拔
 舒伐越滅徐入郢之舉楚國幾墟黃池之會遂冠帶以主夏
 盟吳之進也非公則誰使之世皆咎夫差不能用公予獨嘆
 闔閭知公而不能請其所仗可知矣使禁兵輯民挈全楚歸
 責隨必以周室為請其所仗可知矣使禁兵輯民挈全楚歸
 之周則是役也秦必不敢救楚可知矣使禁兵輯民挈全楚歸
 館返夷春秋復夷之此則闔閭羣臣之罪非公意也夫豈獨
 非公意將必力諍而莫之聽也然吳自此遂通上國至于今
 禮樂財賦甲天下非公則誰敢之是故自春秋言之則以夷
 干夏自今日論之則以夏變夷其有功於吳大矣論者又謂
 公于楚仇不當報于吳諫不必死不知公蓋問世之豪英邁
 之氣自信不惑志在親則親重故可以死而不死不以此豈
 待也志在君則君重故可以無死而死也久成化庚子盤門
 世之齷齪者所及知哉公之廟食于吳也

廟災高唐劉君魁以御史按吳命新之子以公忠孝大節照
 焯今古而功在吳尤大也故碑於廟銘曰烈烈英豪楚材吳
 用茹怨銜辛遵晦時動一舉入荆我仇斯復賊齧為奸吳亦
 旋覆越兵之來有材墓橫公雖云亡有不亡者曷不勸之素
 車白馬出沒潮頭升降於天廟食於吳彌千萬年

本朝陳瑚伍公廟記

吾郡東洞庭山楊灣里有伍公子胥祠焉公之廟食茲土也
 久矣當夫差之賜死浮之於江吳人憐之立祠江上名之曰
 胥山今去郡西三十里地入太湖名胥口者即其處祠尚存
 而祠前古墓松檜參差相傳以為公葬其下楊灣之祠則里
 人奉為土神有事禱焉而此遂仍其號云王子夏山中士周宗
 宋高宗南渡時後人由記之伐石以俟今天下佛老子宮所
 魯述其建祠本末屬子記之伐石以俟今天下佛老子宮所
 在都其有國家禁令扞格不得行而吾吳習俗楞伽之山無少
 長男女舟車鼓吹奉牲醴以邀福者春秋無間日至於聰明
 正直而為神者則或黍稷不馨廟貌不治淪落於荒烟蔓草
 之中嗚呼不有君子何以反其俗也唐狄梁公廢江南淫祠
 而公之廟獨與大禹泰伯季札並垂天壤者何哉予嘗考公
 之為人其始也出萬死一生忍怨數十年而卒行其志其既
 也竭心于所事犯顏強諫被讒殺其身而不悔由前言之則

為孝子由後言之則為忠臣豈非砥柱人倫而爭光日月者哉往者巡撫大臣治舟師習水戰大闕于胥口祠中必祭告然後入萬歷間某巡撫不禮公墓少頃若有捷其背者嘔血歸竟死一武弁守洞庭矢溲公墓旁入舟狂叫不踰時亦死乙酉秋黃蜚兵泊太湖將不利於洞庭夜見神火滿山疑有備也赫赫在天地之間豈異如此嗚呼公之精誠氣燄足以感人啞叱咤以禍福驚動恐懼人以其食其土然匹夫匹婦多好以此稱公予故不得而略也於是書其事而系之銘曰烈哉伍公萬夫之雄以子則孝以臣則忠沒為明神簡在蒼穹揚灣之里洞庭之東波濤喧逐草木蒙戎其來如雲其去如風神所憑依環渚幽宮子周生即鹿林中震不于鄰而于其躬卜告于廟後吉先凶信而有徵神誘其衷乃樹斯碑酬德報功於萬千年廟食攸崇

王鳴盛重修吳相伍大夫祠記

古志節功名之士沒而為神之所往來憑依而不去則祀之顧可闕哉吾吳故有張睢陽文信國諸廟皆非吳產也有其舉之莫或敢廢況吳相伍大夫立功于吳殉節於吳報祀之與尤為允協舊朝或于胥山或于盤門或于東洞庭山楊灣興不一明萬歷三十二年參議伍容庵先生袁萃始重

建于胥門內朱家園至我朝康熙間復頽墜不治址為居民所侵于是裔孫大鈞請于當事贖舊址重葺而新之糜白金二百五十鎰有奇形采鴻紛倍于其舊廟故未有記嗣子儁遵先志奉祀唯謹而屬予追書之子惟夫孝則雪父讐忠則以死諫其主魁傑卓絕之概雖小夫婦人皆知其為烈也吳瀕海僻左蕩析昏墊大夫相土味水築郭治兵以扞之躋吳于上國至今二千餘年民猶食其德弗替也是以唐狄梁公燬江南淫祠千七百獨存夏禹泰伯季札及大夫四廟誠以大夫之節義焯燦彪炳且大有造于吾吳焉然此前人之記固已詳矣子皆可以無贅也惟是新廟緣起有不可不記者蓋常人之情非其職守則諉之度外戚單而屬疏則報本之義怠焉大夫則在祀典修其廟者司土之責也而大鈞能任之自奉之為祖遼遠甚矣而大鈞能急之則大鈞之為家知矣非其職而任之凡其分所宜為者當何如也疏遠者而急之凡其誼聯一體者當何如也大鈞字公詒以醫術起家敦內行樂施予已諾必誠赴士阨困與中丞商邱宋公交好公撫吳十三年君未嘗以竿牘請託人有女美而婿貧欲渝盟以納君君力卻之其行誼如此故能率作興事新廟奕奕蓋素所樹立然矣自君以私家率錢董役而比歲

鑾輿南幸復屢降 諭旨發帑金加丹墀大夫之遺烈

益光殆將與胥山之峩峩胥江之泐泐並永無極云

舊志云按史記吳殺子胥盛以鴟夷投之江中吳人立祠

江上因曰胥山然山本名姑胥非因子胥始名也圖經續

記壇塘在吳縣東南三十五里大江邊夫差既殺子胥後

悔之君臣臨江作塘創設祭奠百姓緣為立廟宋元嘉二

年吳令徙廟匠門內所云大江即吳之松江吳地記載吳

令為謝珣其所徙地疑即盤門內之廟又云漢太守麋豹

移廟于吳郭東門外道南豈江上之祠廢而豹與珣先後

兩移祀歟雙廟之說不一蔡記欲請正英烈廟額深合祭

法其後未詳得請與否嘉熙之遷福順而並祀破虜或因

文穆郡志要亦豈定論歟元封王爵鄭記可據確庵記楊

灣廟又以為由宋南渡時不知何所考也明初仍於盤門

內廟修歲事迨專設今地而後廟貌聿稱前此附會假託

之紛紜可

止息矣

復聖顏子祠在楓橋顏家場

土名陳家浜祠內有祭田八頃二十一畝零

宋元豐八

年後裔知長興縣事長民奏建宣和初知府樓昇重修元季

圯明成化二十年重建後裔工部郎中涇請之巡撫都御史

彭韶檄知縣陳振重建嘉靖三十三年燬於倭寇崇禎十三

年巡撫都御史黃希憲知府陳洪謐重修後圯 本朝康熙

三年移建於蔡氏墓左二十四年巡撫都御史湯斌撤土祠

改建今所乾隆十年奉 旨給帑重修

徐孺子祠在胥門外十一都二十二畝祀漢徵士穉

葛洪祠在西洞庭山葛家塢 本朝康熙五十年建

陶靖節祠在宋仙洲巷崇正社學內祀晉徵士潛並祀桓公侃

於寢今廢

沈隱侯祠在木瀆鎮祀齊太子家令約

顧黃門祠在閩門外南濠上利濟社學內祀陳黃門侍郎野王

洪武八年建崇禎六年修裔孫錫疇記 本朝乾隆四年重

建十五年修裔孫祖鎮記嘉慶十九年裔孫錫周卿雲震濤

募族重修

顧祖鎮記

傳曰法施于民則祀之以勞定國則祀之能禦大災則祀之
能捍大患則祀之是以古聖王之有天下必訪歷代先賢有
功德可祀者俾廟食于其地所以崇德報功典至鉅也而賢
士大夫莅茲土者亦加意振興修舉廢墜我族始祖陳黃門
侍郎贈祕書監右衛將軍希馮公其勲業在朝廷其文章炳
宇宙其利澤被生民即如著書闡學倡義勤王捍潮拯溺史
冊家傳班班可考者也門洪武中採訪先賢首命承公之祀
八年乙卯秋敕建祠于金閶濠南之亭字圩賜基三畝有奇
二百餘年俎豆不替至崇禎三年鄰寺僧垂涎其地撤主毀
祠吾從父舊萊曰庵暨恬如原起諸公請于刺史祁公究侵
恢復廟貌重新送主人祠遵照前冊舊額編銀于義租項下

以供祭祀

國朝康熙丙寅義租充公祀典闕矣今

上

乾隆元年丙辰族姪瑣字宗玉請于吾弟鳳翔字定符鵬遠
字雲翼隨考之姪孫璇字彤文得悉當年崇祀之顛末即偕
族人顏賢天叙天中省麟圖璣等合詞呈請大中丞本家諱
琮復編學租辦祭而春霽秋霜重沐天家之澤五年庚申
秋里人請當道給示鳩工而形文實主其事堂室階庭以次
落成嚴嚴翼翼煥于舊觀矣余惟祠向先君子介庵公暨
叔祖紹展公姪廷怡同心協力互為掌管余自戊戌通籍後
入直鑾坡一官匏繫乙巳遭大故讀禮家居哀毀中先嚴尊
祖敬宗之志未遑紹述服闋即赴闕廷備員京邸夙願未
伸寸衷切怛歸里謁祠而定符輩克承先志已相與有成如
此惟吾祖積德累功流風餘韻足以傳百世而奕葉子孫亦
不致曠墜先緒繼自今本宗支庶祠而葺之克永蒸嘗是則
余之厚望也夫爰敘其興
廢并記其終始歲月如右

韋公祠在郡學中祀唐蘇州刺史應物舊名曰集賢祠自宋有

之明嘉靖四年知府胡纘宗考正親書木主天啟四年巡撫

都御史周起元以濬臯橋南河所出異石置祠庭中先是修學工竣有光燭天郡人以為祥名瑞石云

范文正公祠在義宅東宋咸淳中建祀參知政事魏國文正公仲淹子將作主簿純佑尚書右僕射許國忠宣公純仁尚書

右丞周國恭獻公純禮龍圖閣直學士純粹配元至正間奏

即祠置書院詳見書院明嘉靖間巡按御史温如璋於祠後建三

公堂祀公會祖徐國公夢齡祖唐國公贊時考周國公墉皇

記其一祠見府學一在泮墅地隸長洲縣明嘉靖中權關方鵬建

鵬自為記萬曆三十三年重修馮夢禎記

元徐炎范文正公祠記 至元壬辰子奉命廉訪浙西涖吳中是為文正范公之鄉尊

賢勵俗政所當先既仰慕其餘烈獎進其後人仲秋次丁有祠下與觀盛典是日成禮訪義莊登歲寒堂家園之碑歸然獨存祠正在其左門堂寢室嚴整合度蓋宋郡守潛公說友所建性牢器幣則撥田以給之俾公孫世守而歲祠焉薦奠儀文皆當時所定乃甲戌建祠旋被兵意有所增廣而不遂亦未暇有所記也一日主祀邦瑞踵予門求記且曰祠雖建于前代禮實存于今日弗獲移治錢塘凡再歲徵踐言益公之靈實永賴之予固辭弗獲移治錢塘凡再歲徵踐言益勤謹案釋奠必有合也有國故則否說者謂如唐虞有夔伯夷周公獨非故宋之夔夷乎而石守道慶歷之通祀孔子向微輩為夔夷矣又按鄉先生沒而祭于社稷民以生先師數州之民往往生祠畫像既後祠于長白于海堰于睢陽于廣德于鄱陽公蘇人也郡學以建學祀公天平山先隴僧寺舊有祠然稽協古典必專祠于此而後愜于人心夫亦何為而然邪致君之志動物之誠放諸四海而準百世而下聞者莫不興起也是豈區區富貴利達以炫燿于須臾者可同日而語哉昔宋人定五代軍鎮之亂以儒立國儒而見用者何

限以公而不得相其君展其憂天下致太平之略彼一時也
非可為之時乎自其入館閣為諫官諫則必黜黜則益諫陳
善閉邪寧以委之邊鎖才兼文武適受主知正已而不求人
雖當路不容委之邊鎖才兼文武適受主知正已而不求人
相與解讐戮力卒臣夏人以安中士為所當為一大政請倣周
屢為守帥又豈尋常多議論少事功者哉晚參大政請倣周
官六職分任輔相漸復古制開陳未終權倖小人迭為勝負
朝廷之上雖其國家盛衰由此而分而君子小人迭為勝負
或使人躋蹕鑒戒而未已也嗚呼尚論其世不知其人可乎
明俊偉之本原歟留心聖賢宏毅力行漢唐人材鮮克進于
是矣初公買田贖族而族滋大立塾以教其人而子孫類份
份焉又逢聖朝仁恕恤其科徭祭前古忠烈比有子孫類份
深流長天佑善人于公蓋無爽者昔晁仲約之款賊完城公
不肯加誅文忠富公服其絕識蔡確詩獄公之忠宣公謂
責之太重元祐諸賢亦以自悔即其存至公全大體世之研
幾成務不當如是邪人有古今道有顯晦瞻相儀型是豈一
家一鄉所得私者遠惟考成人宅心知訓而予也曾何足以
之發

明徐有貞重建范文正公祠記
宋有天下三百載視漢唐疆域之廣不及而人才之盛過之
此宋之所以為宋者也蓋自太祖而後十有五君君德莫盛
于仁宗前朝後輔政之人幾百數十人亦莫盛於仁宗之
朝就仁宗朝之人才論之蓋莫盛于范文正公之為公也
大清純天資忠孝而為學得一誠始終一心庶乎所謂極高
道中庸者故其為臣表裏一誠始終一心庶乎所謂極高而
公事仁宗自秘閣登諫垣出入侍從守郡師邊多所涉歷而
不得久處于朝及參大政方將拯時復古權倖間之曾不期
月而業德望之所建明旋亦更革公之猶存十不施其四且
則宋之為宋當不止於此矣於乎直道之難行也君如仁
宗有臣如文正公其猶若此矣於乎直道之難行也君如仁
時名臣莫如文正公其猶若此矣於乎直道之難行也君如仁
事感歎至擬公於聖異時大儒莫如文正公其猶若此矣於
之才為天下第一流而吳澂氏謂公為百代公殊絕人物之數
公者豈無所見而言哉是以後之君子聞風而起者未嘗不
稱公之為盛也凡公所嘗過化之地皆有祠而吳中公之故
鄉文正書院故義莊也其祀事自宋元國朝列于常典春秋
享之而其祠宇因故歲寒堂為之屢毀屢葺規制未宏乃今

宋州府志 卷三十一 壇廟一

萬安劉公顯攷巡撫來吳顧瞻興懷爰諮所司撤舊為新闢而宏焉協議以贊其圖者前知府黃巖林侯一鶚今知府璠臺邢侯克寬承命以董其工者吳邑主簿李榮也于是公之世孫主奉從規來以記請有貞聞之君子之于道也其有所立必有其所宗求乎今而不足則尚友古人所謂世異而道同也今劉公之巡撫于斯猶文正之為治于蘇潤饒越也事文正之侯之繼守于斯亦猶文正之為治于蘇潤饒越也事文正之事心文正之心是亦文正而已矣然則三君子之于公豈非所謂世異而道同者歟有貞于公幸為鄉之後學固嘗寤寐公而思企及者其能自己乎哉遂執筆為記附名于三君子後以庶幾夫高山景行之意云

韓忠獻公祠在至德廟橋南書巷祀宋司徒魏國公琦

樂圃先生祠在光福鎮祀宋蘇州府學教授朱長文

洪忠宣公祠在三茅觀巷祀宋徽猷閣直學士魏國公皓公會

祖文忠公中孚祀於寢

朱文公祠在十廟前明巡撫趙士麟廢十廟改建祀公并祀公

考松於寢

張宣公祠祀宋南軒先生栻在紫陽書院北三元坊側今廢

范文穆公祠在茶磨山北行春橋西祀宋參知政事齊國公成

大明正德間郡人御史盧雍建以宋孝宗賜公石湖二大字

碑石置焉王鏊記後圯萬曆四十年郡人參議范允臨重建

崇禎十二年巡撫都御史張國維修 本朝嘉慶元年郡守

任兆炯又修重建天鏡閣於湖上自為記

明王鏊范文穆公祠堂記
昔在有宋吾蘇入參大政者有兩范文正當仁宗朝開天章閣求治更張庶政將大有為未一年以小人不悅罷文穆當孝宗朝在政府兩月未及有為以言者罷前宋之治莫盛

于仁宗南渡後莫盛於孝宗皆銳志求治二公以身許國可謂千載之遇而皆不能少試其志於乎道之難行其已久矣忠良之不容于時自昔然矣孔子孟子沮于晏嬰毀於臧倉終身周流不遇以死獨二公哉文正子孫今在吳中盛所謂歲寒堂者有司春秋饗祀不絕而文穆之後無聞焉文正為宋人物第一流文穆其流亞與觀其使金爭受書之儀舉朝皆悚有蘇子卿嚙雪之操蓋與孔戡之政同其在成都偃麻之忠奏罷明州海物之獻蓋與孔戡之政同其在成都偃武修文獎用名節間與陸務觀諸人賡唱流風餘韻漸被岷峩而吳中土俗人情物態纖麗備見其詩讀其集知其不用之具素講于胷中固將有以也而時莫之用非其君之不用而小人實尼之於乎其可惜矣吳郡西十里許有浸曰石湖山曰吳山湖山之於乎其可憐矣吳郡西十里許有浸曰石湖在焉其境最勝周益公謂天鏡閣玉雪坡之類皆已淪于荒求其彷彿不可復得所謂天鏡閣玉雪坡之類皆已淪于荒烟野草之中過者傷之而阜陵宸翰碑石巋然獨存若有神物護持之者封監察御史盧綱家越來溪上二子雍襄少時數過湖上約曰他日且將俎豆文穆於斯雍為御史始克如志正德庚辰秋日廟成且肖公像于中移阜陵宸翰陷置壁間以避風日廟在茶磨山之北行春橋之西有司歲時享祀

如儀間屬子記其事于麗牲予聞之法施于民則祀之以勞定國則祀之而所謂鄉先生者沒則有祭若文穆所以施于民效于國表于鄉者卓卓如是而其祀忽諸諸廟中又為之歌意乎侍御君之舉其於禮意協既以是刻諸廟中又為之歌曰湖之山兮嶢嶢嗟公之節與山兮俱高湖之水兮澆澆嗟公之德與水兮俱遠吳臺越壘兮既毀且隤行春之水兮澆澆嗟公之儼而湖山如故兮公行安之

魏文靖公祠在南宮坊祀宋參知政事秦國公了翁明宏治中

公後裔長洲縣民芳請卽鶴山書院為祠詔從之詳見書院

明吳寬敕祀魏文靖公記

宏治十一年四月長洲縣民魏芳奏宋魏了翁登慶元五年

進士累官資政殿大學士參知政事贈太師秦國公謚文靖

公嘗講學臨卽白鶴山下及謫居靖州建白鶴書院以居學

者後在政府理宗親書書院匾仍賜第蘇州以疾命還就醫及卒遂葬城西高景山後以居第為書院而墓碑至今在焉惟公立朝大節及講明道學之功當時與真文忠公相上下故人以真魏並稱國朝既以文忠公從祀孔子廟庭而范文

正公蘇人也亦有文正書院又以為有功於宋亦即命書院歲時致祭顧獨遺祖徒使書院巍然神位虛設實為缺典幸際聖明崇儒重道屢降明詔表章先賢如念祖功特賜秩典下部議于法得祀宜如范文正故事覆請得旨芳乃謂子乞載之文詞以彰盛典予謂公居第實在蘇城之南元至順初公之孫起欲以其地規為書院言于侍臣達上命以書扁揭于堂楣復降敕焉公之功始顯觀敕所云不過令其子孫世奉祀事而已豈若今日禮官之所議出于君上之盛者哉公之奉幣帛內出祝詞俾有司奠讀如儀有我朝之盛者哉公之功至是益顯矣抑公仕宋當寇亂擾攘感于偏安忠言沮塞尼于權奸其事業既不得大行于世獨講學之跡見于所著如九經要義周易集說等書百世之下學文公者猶賴焉則夫論其功祀于一郡果足以報乎蓋國初王忠文公至宋有周元祀孔子廟廷議其謂歷代儒先有功於聖道者至宋有周元公而程氏兄弟承之迨朱子集其大成中更學禁獨真魏二公不背其學力為已任其所著述皆黜邪崇正質諸聖人而子取之久之詔文忠從祀既如其議然則公固不得而遺也夫報功之典夫人當言之非一人所能私者則寬之記此亦豈以私於公哉君子其必有以取之乎

楊循吉魏文靖公祠記
 宏治己未六月詔祀宋儒鶴山先生文靖魏公於蘇先生本蜀蒲江人於蘇得祀先朝賜第與墓在焉維時知府曹侯鳳實承上命卜是秋吉日有事書院唯謹既以為先生遭遇明聖發揚其道德意甚盛不可弗志乃屬愚書之石愚按學以忠信篤敬為工夫踐履既茂用發而宏故能正色立朝不附韓史立言垂範而羣經以明所謂有本者如是於時當宋季宰相行偽禁法天下莫敢言道先生以吾道中微矣至先生之靡然從風士克返正然則程朱以來吾道中微矣至先生又為一始斯文不墜地實有人焉由是言之厥功為大而況有懿德忠節炳炳烺烺今且上發綸音慨焉以列於祀典蓋其報宜然也然先生去世且三百載澌融燼寒而恩命優隆始自今日斯非直以為君子私頌而已國家崇賢禮德于此焉觀而亦世道之所係也歟

張崇公祠在郡學東南正二畝祀宋崇國公九成

徐靖節公祠在南正二畝陳千戶橋祀宋宣教郎揆舊在縣治

南歲久廢 本朝乾隆五年移建今所郡守汪德馨為之記

後其裔孫堅重修

彭啟豐徐靖節公祠堂碑記
 祠舊在吳縣治南乾隆五年移建今所前太守汪君德馨為
 記其大略已越四十餘載二十一年孫堅偕族人葺新之屬
 余文其麗牲之石予考乾隆十三年所刊蘇州府志載徐靖
 節公祠在南正二畝陳干戶橋祀宋宣教郎揆即五年所建
 是也靖節公舊居浙之衢州江山縣因奉父遊汴家焉公既
 殉難父攜家遷吳乃世為吳人也宋理宗時侍郎李心傳撰
 建炎繫年錄錄靖節公事謂大學生徐揆江山人舉進士為
 開封第一待試省闈逢國難與諸生合肥丁特起歙縣汪若
 海潭州何烈等各為書欲遺金軍二帥請還車駕留守司不
 許揆乃獨詣南熏門云有饋獻金人守門者白之二帥俄遣
 騎取揆赴軍中揆出其書二帥見書詰難揆厲聲抗論為所
 殺後贈宣教郎官其家一人夫公非有當官之責獨以耿耿
 孤忠發憤為諸生倡而所司者輒撓沮之仍奮不顧身必致
 命遂志而後已此亦足以愧當世之人臣懷二心者矣宋史
 成于元代以公與宣和靖康間殉節之侍郎李若水學士劉
 韜員外郎傅察知汾州張克戩等並列忠義各為一傳綜括
 始末即據建炎繫年錄而備載所致金帥書二百七十餘言

又錄所未及者烏乎言以足志文以足言所謂雖久不廢者
 與自南渡後數百年來徐氏子孫蕃衍不一其地而居吳邑
 之光福者為最著遭際 聖朝褒忠典禮覃及幽遐而靖
 節公祠宇久而逾新春秋享祀弗懈蓋虔蓋公之死難不能
 挽北去之轅存既亡之社而其急難之誠扶危定傾之至實
 與李忠定宗忠簡等其殉國之烈實與李忠愍等至性回薄
 一往浩然亘古今塞宇宙無弗到也又何論平時與地之懸
 遠乎哉爰論次其始末而系之以詩其詞曰江郎山高六百
 尋激水發原清且淡汴京太學貢南琛觀光闕下傾儒林天
 步方艱北轍駸滿廷肉食如蟬瘖顧瞻青城矢柴枕踞獨
 往無懼心噴薄熱血膏刀砧光爭日月無古今宗祊世守胥
 江潄簫鼓肅迓毅魂臨曲奏吳歛佇靈歆穹蒼寥廓雲沈沈
 一編青史垂家箴
 子臣大義長嚴森

張忠靖公祠在郡學東南正四畝祀宋浙西帥幹兼樞密院提

刑日明舊在師林寺巷歲久圯移建今所 按明葉向高彙纂

十八年署元和縣事李棠編祭冊載公字烜如號志尼橫渠
 七世孫理宗朝進士博學好古勵志六韜故能精於兵術以

資良科召對闡發軍旅機宜明暢合時兼以澄清克復為首
務擢浙西帥幹知人善任樂善好賢教養士卒恩威並濟元
兵襲江淮公帥師飛援克復堅守士民德之尋遷巡視荆宣
等處提刑兼知軍情斬奏專責祐開因元兵再犯江浙公會
兵勦援不克死難事聞贈樞密使謚忠靖春秋崇祀公
遷家餘杭為張蘭渚中丞浙籍始祖並見中丞家乘

張純忠公祠在盛家浜祀宋團練使選

張太傅祠在大營門祀宋樞密使蘇州知府世傑

都南張公祠在縣南狀元坊祀宋平江路通判日中公字尚豐建昌軍南

城人端宗朝進士初任平江倡義衛民政績大著尋遷興化軍聞文信國公開督府勤王率師以應信國公師憤空院公奮力拒戰身受數創猶刃十餘敵被執死信國公哭之有絕域恥為吳地辱封疆甘作宋忠臣之句子洛居吳因建祠

舊在長洲縣乘鯉坊東明崇禎間以裔孫適祝朝儀慕渠附

本朝康熙間移建今所

金仁山先生祠在胥門外十一都二十一番祀元儒履祥

宋公祠在盤門內南園祀元萬戶侯通今移建虎邱

表忠祠在雍熙寺西即舊其社學址祀明遜國忠臣蘇州知府

姚善太常寺卿黃子澄萬曆初詔表忠節巡撫都御史宋儀

望建

况公祠在郡學中祀明蘇州知府鍾舊有祠在吳縣學中後圮

本朝康熙四十八年知府陳鵬年建移吳鬱林太守陸績

廉石置祠堂中石舊自績故宅移置北察院再移此詳見第宅古蹟

張文僖公祠在石湖祀明侍讀學士益公死於土木之難乾隆

四十年公八世孫錦榮訪得公故宅廢址於石湖因即其地

建為祠

陳僖敏公祠在鎮撫司前祀明左都御史鑑舊在鐵瓶巷成化十六年巡撫尚書王恕建安治中燬正德九年重建 本朝康熙二十六年巡撫都御史湯斌重建於康王廟西乾隆二十三年裔孫始等改建今所

王文恪公祠在舊景德寺基祀明少傅大學士鏊嘉靖十一年子中書舍人延喆奏建陶望齡記

徐文敏公祠在開元寺西祀明吏部左侍郎縉嘉靖四十二年巡按御史溫如璋建皇甫汈記

錄功祠在府城隍廟西祀明蘇州府同知山東兵備參政贈光祿寺卿任環嘉靖三十八年給事中徐師曾奏建王穀祿姚希孟皆有記 本朝乾隆二十九年按察使錢琦重建

明王穀祿功祠碑

皇上臨御以來中國奠安四夷賓服河清海晏豫大豐亨蓋千載一時已恬熙既久釁孽潛萌蠢爾倭奴東南島夷也始因剽掠弄兵海壖繼緣姦氓深入吳越遂肆猖獗為患頻年於時東南征鎮之臣宣皇靈遵廟算興師動衆漸次掃平凡文武吏士奏功書績者陞賞有差竭忠死節者贈卹加等德意甚渥也嘉靖三十八年十一月給事中徐師曾奏先朝若尚書夏原吉侍郎周忱治水定賦有功於吳邇年鄉官參政錢泮禦寇死難事例請錄環功贈祀上可其奏贈環光祿寺卿令蘇州府建祠祀以春秋賜額曰錄功撰文諭祭所以彰往厲來者至矣時維巡撫右副都御史翁公大立肅將詔旨欽布德意知府王侯道行祇奉移文承事唯謹乃卜地城隍廟西鳩工選材撰日經始明年夏四月落成門廊堂堂宏麗顯嚴黜聖丹青藻飾輝煥肖以塑像題以木主對越如在報祀有虔又繪任公事跡及忠義貞烈死事之人於兩廡而祠之制大備先是蘇之士民感公德而戴其功者萬人一心既

立生祠而尸祝之至是皇錫典贊於沒世人心大慰而聖澤孔昭倚歟休哉王侯謂公之勲勞非勒之豐碑不足以示久遠乃屬毅祥書其事毅祥不佞於公事狀日擊而心存謹拜手書之曰任公名環字應乾號復庵路之長治人舉嘉靖甲辰進士知滑縣事有治聲召入備臺諫以藩戚例貳守于蘇歲癸丑倭寇由越入吳首尾太倉攻劫焚殺勢張甚屬久安備弛屯衛將士望風奔北而民且不習兵革督撫檄公禦焉公募民為兵拊循教練與同甘苦用以擊賊必身先之或一日數十戰或連月不解甲若黃浦若華橋若寶山若大洋若太倉若陰沙若白沙若南沙若福山若前馬若勝墩諸大捷皆深搗賊壘遠陟鮫波矢心捐軀鼓舞士氣往往以少擊衆殲渠獲醜雖戎帥星列客兵雲屯然捷書亟至者必任兵也甲寅夏寇突抵蘇城燬室廬掠貨殺人盈野極其慘毒公引兵禦之乙卯四月再抵城下烟焱蔽天伏尸載道方賊積骸如邱上官兵爭西趨閫門以入相蹂躪死圍者幾三百人東在婁門民爭西趨閫門以入相蹂躪死圍者幾三百人積骸如邱上官兵爭西趨閫門以入相蹂躪死圍者幾三百人當之不爾及也乃命女婦先入立道右男子後入由道左各攜其妻孥以去計全二萬餘人無一顛踣者民大感悅保禦增固賊畏公而退六月復集大眾三道並進至夷亭距蘇城

三十里所公以所集諸路兵次于婁之陸涇壩分陣以待處兵於田沙兵于水邳兵苗兵各于要害而鈞刀手者最號勇銳陣於正路賊厚陣來衝莫能動退而悔曰正路必勁兵田中旗幟皆疑兵也明日其攻田中乎公謀知之夜半蓐食密令鈞刀手易田中兵而旗幟不易詰旦賊前鋒百人與路兵接少合即趨田中鈞刀手伴卻開壁誘之入盡殲之復整列以待諸賊掩至公又密令沙兵飛棹出賊後呼曰賊已敗我民脇從者其釋刃自明賊氣遽奪會天雨公麾兵急進有梟賊三百餘裸體舞刀而前鈞刀手與合又盡殲之而沙兵亦就水中斬首百餘級餘眾悉潰雨甚不能窮追乃班師入城男女老稚焚香以迎師者塞路咸崩角稽首謹呼動地謂自罹倭寇後官兵之捷未有神速如公者自是寇不敢窺蘇民不復畏寇而將士敢發戰守知方竟成掃蕩之功者皆公倡之也公善射發必命中驪貌修軀昂昂如鶴寇識而畏之每望見公曰將官至矣輒引去善撫士卒視之如傷戰罷必單騎為殿涉津梁一卒未渡終不先行或兵未傳餐則已為郤膳恩誠固結士樂效死嘗夜行輦莽伏起矢發前兵既遠庖丁徐珮以身翼蔽公免而珮死公斂而埋之為文哭奠其得士心如嘗被矢瘡疽發于背裏疽督戰不知其病所御衣服盡書姓名示必死以備收瘞投文祭海剖生倭以享鬻其

肉而嚼之其奮不顧身肝膽必烈如此初公在太倉其子方就傳馳書請歸解公還書諭之曰人臣事君有捐軀報國無臨事避難卽不幸有變故當臣死忠妻死節子死孝成就一箇是而已斯言也公之心事與日月爭光與霜雪並嚴豈尋常隨世就功名者可與同日道哉嘻公文武忠孝仁勇節義人也稽古若唐張中丞之守睢陽雖城墮身殞敗于無救而江淮之不失國勢以再張實賴於是舉公之鞠躬盡瘁死而後已其歿與中丞殊乃若陸涇之捷實蘇松所以全南畿獲善守與扼睢陽者異事同功也公雖干戈搶攘而吟咏不廢磨盾飛檄而橫槊賦詩又足以追配登城馮燾等作真所謂命世豪傑千載比肩匡時大略今古一揆者矣聖天子寵褒之厚內外諸臣表列之勤宜其英風正氣永昭無窮也銘曰翼新宮吳城之中綽楔有屹輪奐斯雄誰其尸之參政任公正笏端冕廟貌之叩天子有命宸章昭布卿秩三品封傳千古追錄元功賞延後祚饗以春秋弗忘霜露公昔佐吳豈弟流聞時維海寇紛紜乃執干戈拯其溺焚忠貫日月義感風雲匹馬臨陣扁舟駕海陸擊水攻觸寒忍餒艱危百戰馳驅數載手截鯨鯨寘之菹醢公之烈氣殉國忘身公之慈念愛士仁民一言開城活二萬人一心滅賊憤激三軍天貫智勇才兼文武大捷十二奠安吳上英詞壯志超今邁古

周則方叔漢惟召父公既憂歸茹毒履辛奪情而來瘞我形神墨哀金革卒遭凶屯死忠圖國實唐之巡吳民戴公家有公祀朝野僉議非國之制乃乞天恩乃塲諭祭新宮翼翼薦其嘗事吳民思公肅拜儀形雲車風馬如覩威靈威靈遐震如雷如霆折衝萬里截海來庭公之有祀維忠之大國之祀公維時之賴峴山片石民思未艾我銘新宮永示無外

陸包山祠在廟堂巷祀明貢士治

袁安節公祠在府城隍廟西北利二畝亦名芥隱書院祀明吏部尚書

洪愈又祀漢司徒邵公安晉吳國內史忠介公崧宋京西提

刑襄簡公珣工部侍郎忠愍公樞舊各有祠俱廢乃併祀於此

申文定公祠在流化坊祀明少師大學士時行萬曆四十五年

巡撫都御史王應麟奏建子少保兵部尚書用懋參政用嘉

祔一祠在虎邱地隸元和縣初公致政後做范文正公義莊置田

以贍族人公歿用懋用嘉增益成之田凡一十一頃四十八

畝有奇莊在胥門外日暉橋南歲終祭祠散給族人銀米

附申用懋義莊規條序

先文定嘗詔不肖兄弟曰余自登朝便思效法鄉先賢范文正公為義田事顧力有不逮嗟此有年既忝居政府存荷恩賜祿入之外稍有羨餘以漸置附郭田千餘畝因家食以來親黨緩急無所出不得不以歲收租入通融措處且創建言祠助修吳學捐學田及貼兩縣役諸費又倚辦于此以故二十年僅存八百餘畝每歲終先公手自標撥分給內外親族故舊貧交待以舉火者奚啻數十家有勸公循故事題請以詔來世者公曰吾自盡吾心而已區區所助幾何而輒號于人曰義舉非吾志也不肖輩遂不敢復言顧先公有是舉而不為之闡揚何以令後世之必傳今日倡茲例而不為之表明何以責子孫之世守卒哭以來相與反覆訂議一則取法于文正手定之家規一則曲體先公累年已行之舊例期於親疏有別凋給惟均承久勿替云

張靖孝先生祠在府治西南祀明舉人翰林待詔基崇禎六年

年巡按御史祁彪佳奏建 本朝嘉慶十四年七世孫張興

仁重修

釣谷祠在侍其巷祀明隱士過龍

周忠介公祠在飲馬橋西衛前街祀明吏部員外郎 太常卿

順昌崇禎十三年敕建 本朝乾隆四年給帑修子茂蘭附

乾隆三十六年又修

明張國維周忠介公祠記
祭法曰以死勤事則祀之故廟食於吳者不可勝記惟位大夫范文正公祠巋然並峙焉熹宗之末宦者用事大舉鉤黨諸賢相繼死竄今天子即位權奸首伏厥辜其明年卹建言死事之臣贈官各有差皆賜祭葬特祠祀春秋以少牢而得逸易名之典則四人其一為吏部員外郎周忠介公分贈太常寺卿者也故事贈官不及祖父而公之茂蘭嚙血訟冤陳乞三代誥命天子嘉之如共請益異數云茂蘭歸而營葬

葬之日千萬人會焉余受命撫吳特出郊襄大典越三年而廟貌爽然新矣初公釋褐司李閩中有異政聲籍甚余為諸生時固已聞其風而敬慕之公奏最擢銓曹余方為外吏及余待罪省垣與年生故相國文公震孟相善相國故善公又同里姻婭言公軼事甚悉至對簿不屈聲徹棘林慘毒之狀載之章奏無俟余贅恨弗獲一見公猶幸得交相國如見公也及余應召還朝則公之墓木已拱而相國亦捐館容可慨也己祠去府東數武堂凡三楹南其墀于前為門繚以周垣於後為室構楹贊贊之其不惟其麗惟其良髹漆丹堊之用不惟其飾惟其制樽罍豆登之器不惟其精惟其備望其門奕然闕其室肅然俯仰棖桷几筵之間如聞儼然愾然公之靈亦赫矣乎先是公祠未落成時鄉人廟而祀公者數十處疾病必以禱寃抑必以告巫覡嗒嗒迎神送神之曲歲時不絕同之鄉亦然公歿已一十餘載而英爽如在人耳目前放而準諸千百世一日也寧特吳與閩哉越日公之子茂蘭謁余于庭再拜請余記余辭不文公之命視草者司農倪公元璐表公墓者宦詹黃公道周皆海內大儒也綴文之家哀誄甲祭詩歌可傳者凡以百計余安能重公翼日吳之士大夫又以請余辭不敏聖天子崇尚節義之士起九京而錫以

殊恩方今四郊多壘余惟隕越是懼以此愧公翼日吳之老又以請僉曰詔使之逮公也市人赴公之難如報私讐記之所以作義蘭也啣血拜疏顯公之親甥公之名記之所以作孝公盡節於本朝有功於後世孰與位大夫范文正公記之所以作忠一舉而三善備焉公其毋辭因退而為之記

本朝彭啟豐修周忠介公祠碑

世宗皇帝御宇之七年詔修天下忠愍名賢祠墓禮部官牒

墓應 詔旨有阻之者久弗克就乾隆三十二年公會孫鸞

翔老且病以為憂之故禮部尚書長洲沈公力言于布政使

蘇公下屬官家勸未幾鸞翔蘇公亦去任事復寢至三十

五年祠屋日圯四世孫京觀五世孫志忠出私財支其朽敗

其明年布政使吳公彙次始末自巡撫薩公始具章以請

制曰可于是官發帑金庀工度材堂宇既成別為一室以顏

佩韋等五人耐復以麗牲之碑未立也屬諸啟豐啟豐與公

今且數年公諸孫以麗牲之碑未立也屬諸啟豐啟豐與公

世世有通家好不敢辭既次第其事而復推言之曰烏呼

國家教忠之意豈不至哉公之祠建于崇禎之初其時公道

與天下共享其成足矣以示勸宜也至于我朝百數十年間

下旌顯孤忠恩施異代唯萃于公等十數人常則為芝草
 可彰之誠以天地之正氣萃于公等十數人常則為芝草
 為鳳凰變則為冬青為精衛至性回薄易地皆然在朝廷
 方藉以飭人紀厲風俗而何得以時異勢殊岐而視之也
 之噴血罵奄或以為太剛必折是未足為苦無大人君子致
 逮時或勸公自裁公曰若輩為所欲為苦無大人君子致
 也耳吾不可以徒死也烏呼公此心天地之心也大人君子
 焉爾其必于死者命也豈公獨有以致之哉先侍講公嘗敘
 公遺書並撰端孝先生傳每論公被難事激昂烏咽痛不自
 勝啟豐不敢勒襲餘論謹闡兩朝教忠之意及吾儕所以慕
 效公者俾人知天地之正氣不可一日而息而仁人志士之
 行亦在乎自勉之而已矣銘曰唯公之節如冰如雪太古陰
 崖洵而成鐵唯公之聲如雷如靈靈節息天開日星日星
 明月鑒于下土慷慨孤忠非今伊古准古有模唯今之式謂
 爾靖其謂爾正直教爾為臣教爾為子我我新宮潔齊享祀
 有廬可守有田可耕
 穆乎清風百世正馨

忠仁祠在廟堂巷祀明光祿寺卿徐如珂崇禎三年巡撫都御

史曹文衡建

明張國維忠仁祠碑

今皇帝御極之七年臣國維奉命撫吳駐幕蘇郡郡之俗有
 近古者三其鄉大夫貴經術而重介節其都人士尚文學而
 景前修其農直道易使好義而崇德報功蓋或有澹臺
 子游之遺澤而他郡莫及也當熹宗末逆奄鉤黨醜類干紀
 吳氓因逮吏部周公擊殺旗尉而緹帥將誅危及巢卵幾沼
 吳矣時光祿卿徐公玉立磷淄之際雞鳴風雨之中義惟急
 病氣暈強虐入見諸大夫曰粉榆可無念邪禍且不測明公不
 復能歸矣出見諸大夫曰江南可無念邪言痛切經營委婉于
 于天下豈三吳之眾獨下於一邑哉危言痛切經營委婉于
 是吳民得勿罪之顏韋等五人嗟乎斯何寺也張成希
 節甫之旨李忠叻裴王之算而俾吳會屢劾上節未安
 屢耕安畝者繫誰功也迨吏部沈淪獄岸而公以黨錮罷歸
 聖人既作元逆授首錄死墟諸賢臣吏部得與祭葬賜諡公
 以南少司空起用蓋方望寶臣之翼贊先爾咨垂以往欽功
 公已乘箕尾上升不獲見奮推黨碑也未幾上公敘平蜀功
 戲涕洟上請於前撫曹公衡督學李公懋行巡按饒公京

特肖像為祠以祀之爰卜地於公居第之東邨唐張許二公
二祠又與宋滕忠節公祠相望顏曰忠仁公八載公冢孫定
來請祠碑謹按公諱如珂字季鳴號念揚吳縣人始以進士
除比部同舍郎建言國本公投荒萬里箐穴之鄉勁草靡靡
豕突之會駿馬弗驚隱練於澤潞疊山之間多歷年所故澳
夷之窺香山也公揚赤馬於海中授錦囊於沙上削垣而尉
侘惛威舞干而輦戶懷恩蘭賊之寇成都也公乞糗糧于黔
楚合勁卒於瞿峽屠龍而渝民引領殪丹而日暮角再命
討叛用申皇威公旂居露食深入不毛左令一軍爾趨赤水
抵竹瓦石令一軍爾進九枝達中箐射天者誅抗師者殪公
一鼓前遂獻囚馘犂夷庭而不賓蠻落一隸我州矣於維茂
勲莫與為匹祭法以勞定國則祀之能禦大災則祀之能捍
大患則祀之以故勒碑東粵廟食西蜀世咸謂公為神今茲
渠然翼然櫨松檉柏肅械嚴深而吳邇是瞻者則又公之功
心合桑梓斯民之崇德報功以建
之者也謹記其略鏡諸麗牲之石

席太僕祠在東洞庭山祀明授太僕寺卿銜本楨

郁孝子祠在府治西祀太倉孝子聖揆

于清端公祠在府學儀門西祀前兩江總督成龍康熙四十六

年建

湯文正公祠在府學儀門西祀前巡撫都御史斌康熙二十六

年建

張清恪公祠在府學明倫堂西祀前巡撫都御史伯行康熙五

十六年建初為書院後改專祠

陳恪勤公祠在府學況公祠西祀前蘇州知府年正六年

建

貞烈祠在西大營門祀明張應奎聘貞女沈氏崇禎間建

尹公祠在大井巷南祀 本朝贈太僕寺卿尹易廷

王孝子祠祀孝子王如松乾隆五十八年郡守高題額

陳二公祠在府學西祀故大學士兩江總督陳文恭公繼善

故大學士江蘇巡撫陳文恭公宏謀嘉慶十五年建

費岳二公祠在府學西祀兩江總督費淳江蘇巡撫費嘉慶

二十四年建

以上祀典

蘇州府志卷第三十二終

蘇州府志卷第三十三

壇廟二

周康王廟 閔子祠 孟鄉侯祠

春申君廟 四皓祠 朱翁子藏書廟

鍾公祠 韓文公祠 廣陵王祠

忠烈廟 雙忠祠 張忠文祠

李文靖祠 尤文簡公祠 趙忠果公祠

石湖鄉賢祠 賢守令祠 宋知軍事趙正惠公祠

宋吳莊敏公吳公潛趙忠惠公三祠 鄭所南先生祠

高文忠公祠 二尚書祠 劉文恭公祠

直道陳公祠

武功伯祠

劉參政祠

景賢祠

毛都憲祠

黃公祠

都南濠祠

徐廸功祠

觀所周公祠

遺愛祠

張賜閑祠

周公瑕祠

三高祠

徐先生祠

卹忠祠

張烈婦祠

陳烈婦祠

包山廟

北嶠山神廟

北嶠山禹廟

澤山神祠

龍女祠

郁使君廟

廣惠廟

劉龍圖祠

周文襄公祠

昭文貞公祠

吳王廟

夫差廟

溫將軍廟

江東神祠

施相公廟

東嶽二聖行祠

聖姑廟

慧感夫人祠

何山廟

皮場王廟

茅亭司廟

河宣靈王廟

五涇廟

晏公廟

潁川分祠

吳氏祠

五路廟

司徒廟

藥王廟

以上舊祠及土俗所祀

蘇州府志卷第三十三

壇廟二

周康王廟在集祥里市曹橋北相傳晉隋間常戮人於此因立廟取成康幾致刑措意宋時浚河得唐建廟碑載其址甚廣並爲民居所侵其後廟益傾圯明天順初里人重建

閔子祠在城西北隅桃花隴舊在文正書院右明宏治中建

本朝康熙二十六年巡撫都御史湯斌移今所

金鄉侯祠祀先賢澹臺滅明詳見書院

春申君廟在王洗馬巷祀楚黃歇舊在子城內西南隅唐天寶十載採訪使趙居貞重修明初移廟今所自唐以來祀爲城

隍神今惟東城土社神猶稱春申君云

唐趙居貞春申君廟記

輜軒洩郡十有一月矣猥以薄材謬承重寄歛自淮服半刺
超為江南方伯郡領二十地亘五千皇皇者華幾慙輝道競
兢其志常戒飲冰周爰咨詢申命行事損以懲忿室欲益以
改過遷善豺狼擁路埋輪以逐之騏驥伏櫪攬轡以騁之宣
王化而盡覺風行安眈心而不知日用寬猛相濟威恩兼洽
長吏肅警疆土又寧日月其除冰雪再履始也務不暇給今
也處有餘閑別祈神仙護歲稔乘公堂之也務不暇給今
城不復隍樹先禁伐闔陬荒以毀梁木小而摧乃喟然嘆曰
神必依人人茲望福依無所據福安來我昔越踐滅吳楚威
滅越考烈王繼立春申君登相封江東之巨縣城吳墟為大
都專立威權救國災患與趙魏為四公子招賓旅有三千人
擠聘使之玳簪誇上客之珠履王六無似君方患之璵人李
園託其女弟既歆然而有姤遂祕之以獻王王乃殂落子為
君主母望之人靡信毋望之禍適與此令尹多居郢國假君
門之下蒿里相催天乎天之胡寧此蛟沒其軸繫父子之沈
常守吳宮鳥焚其巢何笑號之先蛟沒其軸繫父子之沈
埋夷盡其家賊園之故一朝莫將滅口千古猶為痛心今邦

四皓祠在洞庭山祀漢綺里季等

朱翁子藏書廟在木瀆穹窿山南相傳漢會稽太守朱買臣負

薪往來嘗藏書於此塑像衣冠猶漢制云

互見道院

本朝汪琬題朱翁子藏書廟

讀書幸屬承平時能說春秋言楚詞嚴徐枚馬略相等何意
聯翮白玉墀向來落魄棲巖谷東屬腰鎌取書讀聞中少婦
不知我任采薜蕪春草綠丈夫變化搏長風不用為蛇用則
龍金章紫綬成底物徑須圖畫溫泉宮此君讀書為何事
但作區區衣繡計驚走俗吏驕故妻五十之年直兒戲

鍾公祠在郡學東祀唐司農紹京裔孫明孝子正齋附

韓文公祠在卧龍街西韓家巷祀唐昌黎伯愈 本朝康熙間

建巡撫都御史張伯行知府陳鵬年有記

廣陵王祠祀吳越中吳軍節度使錢元璪又威顯公祠祀元璪

子節度使文奉俱在薦福山北隄

忠烈廟在太平山白雲寺宋范文正公先祠也公之先徐國公

唐國公周國公三世葬此宣和五年慶帥宇文虛中奏建公

祠於慶州賜額忠烈南渡後改奉於此每歲上已有司致祭

明正統中修今統祭城中書院此廟則子孫主之 本朝乾

隆十六年

高宗純皇帝南巡幸其地名之曰高義園并 賜以詩

元牟巖忠烈廟記

范文正公忠烈廟今在姑蘇三讓里天平山公自睦移守鄉
郡再省三世松楸不但漢人過家上冢之榮而已嘗即白雲
菴奉香火泊登政府得追封三世置墳寺始奏改菴為白雲
寺祀徐國公唐國公周國公蓋慶曆時也猶未有忠烈廟之
名先是元昊據靈武納旌節僭位號威脅諸羗肆為邊患朝
議舉兵攻討遂以邊事付公首用種世衡築青澗城拒衡要
大營屯田聽民互市郵延乃異時西夏貢路但嚴備不出以
示招納又築大順城以捍環慶築細腰胡盧十二寨以制明
珠滅臧二族元昊勢漸折乃命公及諸號知兵者分領要害
為持久計以待其弊已而昊卒納欵如公言而公在廟堂以
議論不同均佚南陽既遂謝事矣公外剛內和恩威迭用當

時邊人相語此小范老子胷中有數萬甲兵不比大范老子
 大范指雍也或以龍圖老子稱之其為人所畏愛如此邠
 慶諸郡與屬羗皆立生祠繪像以事其終也屬羗酋數百舉
 哀僧舍哭之如父三日乃去宣和間慶帥宇文虛中以郡人
 思公不忘祠事甚謹奏賜額忠烈廟他日有舊額皆易新榜紹
 興失秦隴慶陽廟貌邈在他方始改奉於天平山每歲上巳
 三司率僚屬郡博士率前序偕來致祭廟久頽毀至元乙酉
 主祭邦瑞提管士貴共議重建取義學餘米歸之義莊為土
 木費司計邦翰宗遜等佐之其年四月既望新廟成丙戌二
 月既望率族奉安前設文正公神像內設三門公神儀廟凡
 十楹黜堊丹漆備極壯麗供具皆完好大德甲辰行省聞於
 朝禁治煩擾崇奉尤嚴於是士貴以專抵嚙俾記厥成勸焉
 末學固辭弗獲惟昔文正公在朝聞延州危急自請代張存
 直欲委身不測之地人以爲難職合不少沮爲尤難蓋不顧
 宰相爲張禹雖觸禍盛怒坐以越職竊謂未若公上言圖詆
 其一身之利害禍福故能內請朝綱外抗方面諡曰文正廟
 號忠烈如是之偉也夫士大夫則知尊祖矣尊之者何銘其
 德善也是宜作銘詩刻石列庶下其辭曰南陽諸葛蜀漢再
 造志決身殲民哭陌道乃廟沔陽成成都夔子號曰忠武西人
 悲喜相傳尚記馘雙誅郤於惟文正異世合轍雖老益壯雖

死不忘精忠盛烈夏日秋霜昔討靈武皇威遠加聲勢震燁
 摧其角牙忠烈有廟參錯西土公像在堂莫敢予侮天平之
 山白雲之泉公歸自西廟貌宛然誰實新之偉矣柱石上公
 之服揚休山立內祀先公爰備廟制維垣啟宇光榮三世式
 濟世美忠宣弟昆粵至斯今代有賢孫乃厚義廩乃廣義學
 同志合慮新廟攸作潔我牲醪率我宗黨揭虔妥靈默通盼
 蠻公在帝旁玉蚪既駕神遊逶迤與風來下佑我後人俾熾
 而昌廟祔是保千載奉嘗

明王直重修忠烈廟記

正統八年冬十一月蘇州府重修范文正公忠烈廟成其十
 一世孫都察院照磨子易具事本末屬直爲記蓋公蘇人也
 曾祖徐國公祖唐國公考周國公皆葬蘇之天平山公嘗請
 於朝改白雲菴爲白雲禪寺度僧守焉作祠於寺之右以奉
 祀事至公之子孫又作祠於祠之南以祀公然忠烈之名未
 有也宋自元吳反西鄙騷動師出無功仁宗命公經略公選
 將練兵築城寨壘屯田據其要害示以形勢招徠屬羗恩信
 大洽決策取橫山復靈武元吳勢屈請降西人仰公德服公
 化皆爲公置生祠公薨相與哭祠下者累日不絕宣和間宇
 文虛中爲慶帥言公忠於朝廷功烈顯于西土至今猶廟祀
 益虔然廟未有額徽宗命以忠烈名之且爲題榜凡廟之在

西者皆易以新名然蘇猶未有也紹興後西土皆陷忠烈廟
越在吳邦蘇之守令與其士大夫謀曰蘇公之故郡也而天
平山公祠墓在焉公之精神必往來乎此乃更作新廟揭忠
烈之榜廟門由是蘇始有忠烈廟歲上已郡縣長吏率其屬
致祭歲久廟壞元至元乙酉嗣孫邦瑞士貴復新之末世兵
亂燬焉逾八十年未有能復者至是工部侍郎廬陵周公忱
巡撫至蘇而監察御史壽光劉君甄武昌劉君仕昌錢塘鄭
君禹皆以事泄焉郡守李君從智來會政事之暇語及茲廟
因相與嘆曰公之德業著于當時傳於天下不係乎廟之有
無也然表先正以儀於來今使後生小子得瞻其廟貌想其
精忠偉烈而興企慕之心則廟亦不可無也乃各出貲俾吳
縣令永嘉葉錫圖其成錫毅然以身任之殫心盡力規畫處
置凡鄰邑令佐皆以貲來助市良材命眾工為堂前後各三
間以奉公及三世先公像東西廂如其數以藏祭器而齋宿
寓焉壯麗嚴整有加於昔中作石橋橋南左右為碑亭前作
大門榜曰敕賜范文正公忠烈廟經始于是年九月閱兩月
而廟成直聞之士之能任天下之重者必以天下為心之心
欣感主乎人而不私于己是以天下為心者也以天下為心
則人庶乎有濟矣初公未顯時已為天下之憂而欲免其
先天下之憂而憂後天下之樂而樂夫憂人之憂而欲免其

憂使人皆樂然後與之同其樂此豈小丈夫然哉孟子曰禹
思天下有溺者由己溺之稷思天下有饑者由己饑之公之
心猶是也故其德業之盛不愧乎古人豈特著於西土也哉
嗚呼士不以天下之重自任者多矣不以天下之重自任則
所存所以為得一主於為己人之利害不以為士者固當如是
然自以為得功烈之卑無足怪也而所以為士者固當如是
邪然則公之孫與邦之人士及四方之來者拜公之廟慕公
之功業必當師公之心充之以仁義而力行之于公其殆庶
幾乎故為之記而道余之所聞使刻諸石以告焉

雙忠祠在盤門外靈巖鄉祀宋義士劉鼐張鼐乾隆間重修

彭紹升重修盤門雙忠祠記

予觀建炎之事宋之不亡者幸哉方金兵破揚州于時高宗
駐平江去敵尚遠平江固可守也蹙蹙焉去之臨安而越而
明不暇一夕息已而敵破建康道廣德趨臨安由越入明縱
掠海上而歸使其時平江諸將帥以勁旅遇其衝俾隻輪不
反無難者奈何兵不戰而潰城不攻而下坐使五十萬人并
命于鋒刃而莫之救相傳金兵自盤門入有二士者拒敵於
門外一死于陳一死于水而盤門破矣烏呼彼守城者或則

侍郎或則宣撫使非不顯且要也委而去之若棄涕唾而獨遺二士者以殉國之烈此不可為發憤而深痛者哉然自二士之死里人神而祀之迄今六百餘年而靈爽益著二士俱沐人從高宗南渡守平江其一劉姓胤名蓋死于陳者也其一張姓鼈名蓋死于水者也祠有明永樂中俞禎碑以胤為順國明王職天壇傳奏司以鼈為順濟龍王職盤谿守禦司其封爵不知何坊要其來也則遠矣近者祠久不修里人釀金千兩新其堂宇既成屬子記祠在盤門外靈巖鄉俗名雙土地祠予更之曰雙忠夫其忠也乃其所以自神也遂書而記之

張忠文祠在府學前祀宋龍圖閣學士叔夜

李文靖祠在盤門內祀宋右僕射同平章事贈太尉中書令沈

及明禮部尚書文安公傑乾隆五十年裔孫玉樹建嘉慶十

七年玉樹子鳳生重修光祿少卿吳俊記

尤文簡公祠在清嘉坊祀宋煥章閣待制少師表明參政安禮

太僕樾耐

趙忠果公祠在橫塘彩雲里即南山書院祀宋知縣秘閣訓之紹興

間建元季燬明萬曆十七年督學御史柯挺重建申時行記

石湖鄉賢祠在石湖上祀宋范成大莫子文盧瑤元盧廷瑞盧

守仁明薛某袁黼袁黻顧亮金問莫謨莫禮莫轅陳堯道朱

應辰吳文泰張璫王行李鼎盛寅莫震宏治六年知縣史俊

建嘉靖七年知縣蘇佑修增祀莫旦盧雍三十三年燬萬曆

九年知縣傅光宅重建增祀盧襄袁表王寵今廢

明莫旦石湖鄉賢祠記

石湖鄉賢祠記石湖之鄉賢也始漁陽史君俊之為吳縣也一日觀民風出郊至湖上見穹碑立草莽中上有石湖二大字御寶燦然詢之乃知宋孝宗賜范文穆成大之宸翰也有

亭曰御書廢亦久矣君慨然太息出俸作新之一仍其舊既落成而君遷秩去今任邱鄺君璠以來繼其職暇日登亭四顧以爲山水當前景物如畫殆與西湖略同惜不及西湖之有鄉賢祠而今文穆亦鄉賢也豈不可卽是而祠之邪於是攷諸郡志詢之故老自文穆以來士之出於石湖者得二十一人或以科第發身或以材請薦舉或以高潔見重而其道德功言皆足師表百世而無間然者也遂準式爲主序其時世先後書其爵諡姓名卽御書碑後而奉安之題曰石湖鄉賢祠於是醫學正科盛備來詣且曰備與君皆鄉賢子孫也不可以無紀且竊惟石湖爲吾蘇勝景當吳縣吳江二縣之交山川清淑鍾而爲人者豈止二十有一而已哉然二十一人者遠或數十世近或百餘年其骨已朽何以得後人之尊崇企慕如此然後知大丈夫之爲人生不徒生死不徒死所爲道德功言師表百世皆足以美教化而厚風俗也不然彼丁謂亦嘗居石湖而真宗亦有宸翰之賜以世則在諸賢之先以爵則位諸賢之上今乃不獲與諸賢之列者何哉後之人陟降瞻仰可以悠然思惕然懼而思齊內省之心自不能不感發而懲創矣

賢守令祠在瑞光寺祀宋參政平江知府張巖知吳縣葉延年

初光福民張氏聚其族人抄掠侵暴三十餘年莫能禁止巖

與延年捕寘於法郡人圖其像祀於寺中許知新記

宋知軍事轉運使趙正惠公希懌祠在穹窿山南因其墓而祠之今廢

宋尙書吳莊敏公淵侍郎吳公潛學士趙忠惠公與懿三祠在能仁寺三公皆知蘇州府嘉熙寶祐間郡人立祠祀之今廢

鄭所南先生祠在社壇里先生名思肖著心史貯鐵函投能仁寺井中明崇禎十二年僧浚井獲之巡撫都御史張國維刻

其書建祠本寺陳宗之記十六年移置東倉之西 本朝順

治中移建今所 按祠在廣生庵中後庵僧侵占之乾隆間郡守復其址改名七賢祠嘉慶九年請入祀典

高文忠公祠在府學前祀元浙西提刑按察使智耀至元元年
平江路儒學教授謝亨祖建高若鳳記今廢

二尚書祠在胥門外懷胥橋南祀明工部尚書夏忠靖公原吉
工部尚書周文襄公忱宏治十一年常熟知縣楊子器請於
朝詔下巡撫都御史彭禮勘建嘉靖三十二年改爲帥府移
像別祀四十二年巡撫都御史周如斗仍遷入祠坊曰仰德
萬曆四十二年重建 國初圯移主於崇正社學

明錢邦彥復夏周兩尚書祠記
吳之祠夏周二公者祠其有大造於民也忠靖公以永樂初
治水去害奠厥居文襄公以宣正闢巡撫至吳平賦阜財故
吳民之愛戴二公不啻父母而家戶祝未蒙秩祀宏治已
未巡撫彭公禮上疏言二臣功烈之茂德澤之深而祀不列
于祀典制不出于朝廷非所以褒忠獎勞爲世勸也天子嘉

允詔立祠並祭彭公乃議蘇郡爲三吳會府而胥江之濱實
南北孔道清廟斯構瞻仰殊便亟命知府事曹侯鳳經始焉
表以綽楔繚以崇墉殿堂峻宏門廡顯敞齋宿厨庫之廬啟
閉掃除之役鮮不備設極於壯麗由是列郡之所奔轅四方
之所經涉望其廟思其人君子興仰止之心小人懷感化之
念春秋薦事歲時修葺有隆無替乃嘉靖丙辰倭寇猖獗王
師致討專節制者改爲帥府遷二公像于城之竹堂寺荒陋
幽闕輿情悵惘癸亥夏巡撫都御史周公如斗慨然以爲簡
賢慢神莫此爲甚亟命知府徐君節改正祠宇易置坊額增
飾華煥式還舊觀乃撰日具儀告祭遷復像主萬姓聳瞻權
南燬淫祠千七百所於蘇僅置泰伯伍胥季札之祠尚賢也
况夏周二公爲本朝名臣其體國愛民之勤興利剷害之績
特厚於蘇松常鎮嘉湖杭諸郡歷百有餘年而吏不能更其
法民不忍忘其惠與祭法所宜祀者合雖列於三祠無忝焉
如是則祠之草木亦當敬止矧可忽易簡褻之哉幸周公改
正遷復神妥其靈民釋其憤和氣感孚休應必至益將默庇
於吳民也先是周公按吳歲饑發廩賑贍奏減秋稅民賴以
生明年荒瘵未復吳民伏闕願借公一年以全元元之命詔
許之游雁倭寇首尾四載謀畫戰守夙夜勤勞而賊益熾將

帥驕懦畏寇不進天子特詔公盡護其軍於是得以責成督
勵克平禍亂吳之底寧公之功也視忠靖文襄經營於無事
之日設施于從容之際用力為尤難茲者保釐南服兼總戎
律實踐二公之位而加重焉恩澤滂流德風斯偃吳民抑何
幸歟予故
併書之

劉文恭公祠在石巖橋南祀明少詹事鉉萬厯間建劉鳳記

直道陳公祠在甘節坊祀明僉事祚宏治十年建沈燾記後圯

崇禎初重建

武功伯祠在剪金橋北祀明大學士徐有貞萬厯二十二年提

學御史陳有貞建

劉參政祠在雍熙寺西卽其社學址祀明參政昌萬厯二年巡

撫都御史張嘉允建皇甫汈記今廢

景賢祠在堯峰山資慶寺祀明禮部尙書吳文定公寬嘉靖間

建尋燬萬厯初重建以翰林院待詔文徵明配今廢

明申時行記

吳城西三十里許峰巒林壑幽奇壤麗之觀不可勝數吳山
最勝從吳山折而南橫岡疊巘蜿蜒率嶺者不勝數堯峰最
勝有寺曰資慶在晉為免水院故堯時民避水處云寺據山
巔俯瞰笠澤縹緲莫釐諸峰在襟帶間懸崖仄徑清泉秀石
蓋堯峰之勝盡在於是然歲久荒落去城闔絕遠冠蓋屢履
之游罕至余友周公瑕憇息山中睹一像廡間問寺僧僧曰
此故宗伯吳文定公像也往公讀書于此登朝乃去寺圯賴
公而新故肖貌為祠以報而祠竟燬獨遺像存焉公瑕慨然
曰嘻有是哉曩吾師衡山先生嘗及公門其言論風旨相似
推本言之而公吾師也且夫復廢宇還舊觀以景先哲報德
舉義庶其在此乃出貲買材涓辰庀役既成則奉文定公像
居中以衡山先生配買田畀僧掌之令世世香火母絕昔文
定公以耆宿任公卿至貴重然恭謹無與比與人言未嘗不
推轂當世賢士衡山先生聲滿天下兒童婦女莫不知名而
退焉若無能者其獎譽後進游揚薦達惟恐不及蓋先輩之

典型如是自二先生往而吳俗凡幾變垂紳側弁之士斷斷如也由斯以觀二先生之係世道豈淺鮮哉余顏其祠曰景賢且記其事

毛都憲祠在華山天池祀明撫治鄖陽右副都御史理嘉靖間其子孫卽其墓旁建萬厯間爲寺僧所據巡撫都御史趙可懷追復之申時行記

黃公祠在吳趨坊祀明刑部郎中暉子省曾祔萬厯二年巡撫都御史張嘉允卽其居建崇禎十三年知府陳洪謚增祀省曾兄魯曾子姬水

都南濠祠在能仁寺內祀明太僕少卿穆嘉靖四年知府胡纘宗建

徐迪功祠在盛家浜祀明國子博士禎卿萬厯四年巡撫都御史宋儀望建并記今改爲張純忠公祠

觀所周公祠在府學西祀明巡撫都御史如斗嘉靖中建又志齋周公祠在姑蘇驛南祀明巡撫都御史繼萬厯中建

遺愛祠在縣治旌善亭南祀明巡撫都御史宋儀望萬厯八年知府傅光宅建今廢

張賜閑祠在府學前祀明保定知府祝

周公瑕祠在和豐倉東葛家橋祀明隱士天球萬厯三十一年推官鄭郭卽其居建申時行記今廢

三高祠在華山麓祀明隱士趙宦光濟南府同知王在公隱士

朱鷺張世偉記

徐先生祠祀明舉人徐枋

全祖望澗上徐先生祠堂記
 俟齋先生丁國難乙酉避地汾湖已而遷蘆區丁亥戊子在
 金墅癸亥以後來往靈巖支硎間已亥居積翠及定卜澗上
 遂老焉先生故不入城及老于澗上并不入市長年禁足唯
 達官貴人訪之則避去莫知所之既卒門人即以草堂為祠
 澗上居天平之麓其地平遠清勝靈巖一帶俱在望中子友
 陸茶塢之水木明瑟園僅隔一水予過明瑟未嘗不肅拜先
 生之祠茶塢因屬予為記先生風節之高具見於諸家志傳
 不待予之文而著而予得一言以蔽之者以為昔人處此雖
 陶公尚應拜先生之下風非過也今吳下好事賢者方議哀
 資新此并買祭田以綿春蘭秋菊之澤其意甚善而予竊欲
 增置粟主合食於先生南枝其一曰嘉善吳先生稽田蓋先
 其一曰山陰戴先生南枝其一曰嘉善吳先生稽田蓋先
 之得安于澗上也皆儲之力其身後則皆南枝之力也是時
 以開府湯文正公之賢欲致一絲一粟于先生且不可得而
 儲公獨能飲之食之以漫堂宋公之風雅致賻襚于先生其

子以先生遺命不受而南枝獨能殯之葬之則二公于先生
 素心也亦已篤矣儲公之賢先生集中言之不一而足而南
 枝未有及焉吾故欲引而齊之使並食于一堂亦舊史之例
 也乃若稽田其生平踪跡頗與先生相反而實為同德蓋二
 公故郎舅也稽田抱劉琨祖逖之志而又欲雪其王褒之耻
 故終身冥行不返家園而先生終身不出庭戶其道交相成
 也是以先生之初避地于汾湖于蘆區以依稽田及于金墅
 則稽田依先生之初避地于汾湖于蘆區以依稽田及于金墅
 及定居澗上稽田每自北來但過先生而又不入其家先生集
 中呼遠公者皆稽田也稽田一生逐日奔走中原不得稍洩
 其志死葬膠東以明其蹈海之憤以白不願首邱之恨是非
 大招廣招之所能致也而吾以為先生之祠依然首陽一片
 淨土可以歸其魂使起先生而告之必以為然且由是而知
 先生之高蹈非石隱者流也茶塢曰善哉子之言也吾將偕
 同志諸君舉而行之爰
 卽詮次其語而題之壁

卹忠祠在演武場內祀明宿松禦寇陣亡守備項鼎鏞朱士英

陳于王余公案指揮同知包文達千總吳承先把總張其威

錢上選于廷任石電曹賓王趙廕莫是驊材官虞萬章蔣秉
鑑龔景尚哨官徐本倫陳瑛李國泰畢希賢曹天祐百戶欽
依崇禎十年巡撫都御史張國維題建

張烈婦祠俗名女金剛祠在支硎山祀明旌表烈婦吳江縣民張士柏

妻陳氏崇禎十三年推官倪長圩建

陳烈婦祠在香山塘村祀 本朝旌表烈婦塘村民袁七妻陳

氏以節婦河橋高氏胥口施氏西橋沈氏木瀆張氏梅社顧

氏前巷橋吳氏金家街朱氏沿塘鍾氏陳家舍陳氏貞女西

莊徐氏配康熙六年巡撫都御史韓世琦建

包山廟在洞庭山祇園寺西一名包王廟圖經續記唐咸通十一年夏六月郡從事皮日休禱雨

有應與陸龜蒙皆有詩今飛仙山金鐸山植里山渡渚山皆
其別祠洞庭記王姓毛名朗豫章人爲越散騎常侍沒後託
職包山分壇九處祀之盧志稱包王者取護衛
包山一境之義唐貞元間廢鄉人至今奉祀云

北崑山神廟在太湖中乾隆二十二年重建

薛起鳳北崑山神廟碑

周禮揚州之澤數曰具區其浸五湖樂史太平寰宇記云今
州西六十里太湖是也湖中杜圻山一名北崑山在洞庭馬
蹟之間山澤氣逆風濤四會上有神廟莫紀歲年乾隆二十
二年冬土人會於廟下謀作新廟踰二年冬十月工乃成記
者蓋以爲禹廟云按蔡昇太湖志王文恪震澤編翁澍具區
志太湖小山名崑者四北崑杜圻洲南衆安洲西角頭洲東
三洋洲皆有水平王廟不載禹廟至金友理太湖備考四崑
山始稱禹廟然不載改置年月考之舊志卽古水平王廟也
舊傳后稷庶子佐禹平水有功墓在馬蹟山因立廟分水嶺
宋慶厯間知州事胡宿奏列祀典後杜圻諸洲皆立廟焉明
季三洋洲沒於湖神像浮至衝山衝山人奉像祀郁使君廟
或遂以郁使君爲水平王非也昔在帝媯臣唐之代天網淳
滴洪泉失道古大禹疏川導岳徧日月之下疇其土而生之

烝民乃粒萬世永賴自中國外薄四海所過名山大川莫不
 禋祀當時贊厥元功於書則有若益稷暨朱虎熊羆於傳記
 則有若河伯雲華庚辰虞余童律烏木田陶臣氏烏陀氏鴻
 蒙氏其以功封吳者則有若繇余氏知伯禹治水土作司空
 會羣神其間山國澤國分命以治者皆為生民禦大灾捍大
 患各以功廟食于其疆土禹之德配天地水平王之功在江
 湖夏書曰三江既入震澤底定太湖宜有禹廟立禹廟而以
 水平配食禮也以水平之廟襲稱禹廟不可也虞夏之書渾
 渾其詳不可得聞嘗覽方輿之勝稽諸地記按諸圖經夏后
 氏之蹟見於東南者會稽壽春當塗皆有塗山廟廬江古城
 有阜陶塚淮陰龜山鎮無支祁之神吳興武康古防風汪芒
 氏國其岵山則帝喾所居也大越之山無餘所守祀也長興
 夏駕山帝杼所游豫也宛委陽明之洞洞庭幽虛之天縹衣
 使者所授圖靈威丈人探禹書處也江山萬古文獻無徵將
 欲求古文之遺書攷秩宗之典禮時又無博物如鄭子產好
 古如韓退之者與之讀岫嶼之碑辨河汾之祀其何以正之
 乃述所聞刊之石
 以俟後之君子

按舊志太湖水神廟在洞庭山消夏灣俗號水平王廟宋
 慶厯七年知軍州事胡宿奏祀又毘陵志舊傳后稷庶子

佐禹平水誨人浚導因祀之盧志其地本水中一洲常與
 水平雖巨浸亦不沒故名王志舊傳神為漢雍州刺史郁
 使君廟即其廨宅

北崑山禹廟舊廟不知始自何年久圯乾隆二十一年重建

汪縉北崑山重修禹廟碑
 傳曰禹之明德遠矣明德之歎蓋歎水功也或曰水色元書
 曰錫元圭告成功所以昭明德也南之水江為大三江入海
 地者成天成元功所以昭明德也南之水江為大三江入海
 震澤底定今震澤北崑山山也南之水江為大三江入海
 奉祠子聞道家之言曰上善若水貴下貴柔其有合於不伐
 不矜者邪南位于離得水而濟文明之像橫於斗牛文命敷
 焉聲教訖焉萬世賴焉吾于北崑山觀之矣蒼蒼三萬六千
 頃轟轟七十二峰間有禹書在焉其為明明者邪元元者邪
 古廟歲久而圯乾隆二十一年土人會于祠下謀重建又二
 年新廟成住廟者某道士作記者汪縉也使鑱之石繫以詞
 曰禹學弗貫匪聖匪神渺哉明德用智失真厥學唯何雜書
 是則虛五居中用建皇極雲行雨施為乾布精含宏光大為
 坤安貞乾坤手奠萬世永安賴以永安廓之萬世歸而休焉

老氏善閉善閉非閉用水息火水火混混會同於土知白守
黑知雄守雌離位加坎北崑以祀廟圮而復不煩土木南方
是同復禹之功南
力是式復禹之德

潭山神祠乾隆二年建

沈德潛潭山神祠記
陽山旁有小山名潭視陽山猶荆楚之江黃也舊有城隍祠
按城隍唐時始載祀典主城郭池隍事潭山為非地然近代
郭外往往有之豈如諸侯立國有離宮之例不妨兩地耶抑
或向本土穀祠如二千五百家之社百家之社二十五家之
社之類而鄉民過為尊崇遂易為城隍祠邪祠頽廢像附佛
氏宮久歲乙卯神降病者責以建祠立像許之不果病者適
死丁巳春有許關童子忽仆地云我白馬嶺南趙成之也上
帝憐我命為神曷廟祀我時觀者填道應之旋起立愈穹窿
山道士夢亦然眾捐金錢飲助夏四月廟成堂皇崇高廊榭
紆曲寢室庖餼莫不具備燭吉大祭神明儼然遠邇相祀翼
翼肅肅祈禱輒應毗庶懽悅已未夏客來京師臚陳建祠顛
末乞書於麗牲之石予謂趙侯孝友純謹君子也事母氏盡
力昆弟死婦並守寡每得館穀周郵衣食俾完苦節生平無

妄言言必踐屋宇穿漏旁風上雨偃仰自得摧挫場屋聞譽
不起毫毛無怨上帝降鑒正直是與抑于生前顯于身後允
宜為神子嘗怪吳民黷祀受欺巫覡狂惑成風俗所云南朝
神之類舉不經也若趙侯為神揆之于行準之於理匪同誣
妄遂承請書其事趙侯字雲豹一字從周成之其名也吳縣
人補長洲諸生後分隸元和并作迎神送神之歌曰神之來
冠切雲驂文狸翻朱幡焚蕭骨氣煙潔醴醪羞積粉史陳
祠奏神絃神其聽福我民驅蛟蛇除妖氛風雨時粒盈困人
康強畜滋蕃神許諾示筵簞神之去乘風雲上神樹陟山巔
望故鄉渺烟村閔孤露栖蓬門勉介石慎苦辛經洹寒回陽
春馳鸞輪入空旻
歸帝所朝玉真

龍女祠在東山豐圻北麓

震澤編一名白馬廟相傳柳毅寄書
龍宮繫馬于此故名事屬荒唐併題

咏例
不載

郁使君廟在衝山

宋司馬邕記云使君吳人漢惠帝召拜雍州
牧伯為政有體及卒人仰其德因立祠為神

後唐同光二年吳越錢氏重建宋咸淳元年修

周惠廟在雍熙寺東祀烏城祠山神張大帝宋慶元三年建莫子純記

劉龍圖祠在水平王廟中龍圖諱宴仕宋都官員外郎建炎間寇犯常州公駐兵水平王廟出奇大破之追寇至宣城戰歿事聞詔進龍圖閣待制官其四子立廟死所額曰義烈常民德之以其駐兵於廟遂耐祀焉

周文襄公祠在水平王廟中祀明工部右侍郎巡撫江南廬陵周公忱公撫吳十九年奏減糧額七十餘萬吳人德之郡邑多有其祠

路文貞公祠在葑山廟中祀明都察院右僉都御史總漕江南廣平路公振飛公自鼎革時保障東山鄉人耐祀於廟

吳王廟在香山南址旁列二妃相傳即孫武所誅二隊長夫差廟在姑胥山東北舊傳拆姑蘇臺木為之村落間多此廟温將軍廟在縣學東通和坊宋淳祐間建元燬明重建 國朝嘉慶丁丑年重葺請入祀典

按神名瓊字永清一字子玉唐之平陽人

江東神祠一在調豐巷一在報恩寺西教場內王志神姓石名固秦人漢高祖六年灌嬰略定江南至贛城神現于某山告以克捷之期士卒駭異凱還牲酒款謁立廟贛江之東至孫吳時遷神於吳境祭之頗著靈異

施相公廟在喬司空巷俗以為江湖之神東嶽二聖行祠在廟堂巷祀唐張巡許遠

聖姑廟在西洞庭山 盧志按唐人記姑姓李氏有道術能履水

貌如生儼然側卧祈禱者心有侮慢風迴其船無得達者每
日沐浴粧飾為除爪甲形質柔弱只如熟睡蓋得道者歟辨
疑志大歷中洞庭昇姑寺有昇姑廟其棺柩在廟中俗傳姑
死數百年其貌如生遠近賽禱歲獻衣服粧粉不絕其巫秘
密云不可就視棺開即有風雨之變里人敬事無敢窺者有
李七郎荒狂不逞率奴客啟棺惟朽骨髑髏而已亦無風雨
之變續志舊傳晉王彪有二女長號聖姑次素姑嘗
著柘木屐子涉水而行衣不沾濕人以爲神遂立廟

慧感夫人祠舊名靈姑廟郡城承天寺護法伽藍神也

宋林戊靈姑廟碑記
元符戊寅夏吳中大旱祈禱郡祠略無應者是歲高田不獲
人多渴死負販之民皆舍業以售水資生涉冬至二年春夏
之交舟車益不通百貨踴貴城中溝澮埋淤蒸為疫朝請郎
祝公安適判軍州事乃用故事分禱於所宜祀者一日會承
天寺客言此梁衛尉卿陸僧瓚捨宅為之昔號廣德重元寺
陸卿有女不嫁經營其事既死祠於寺東廡開寶中吳越忠
懿王朝京師道出吳江大風幾覆舟見女子拯之自言重元

寺神也本國加封號感應聖姑今里中事之甚謹公聞即謁
且言明日致禱既歸齋沐蔬食期得雨而後復膳黎明躬至
祠下載拜言曰郡承連年之旱流亡疾疹相乘農事失時歲
且大饑雖安有罪獲戾不逃然將為國憂神其憐之能即至
雨尚可救也屏息聽命寺僧獻兆曰神告即雨眾甚不然憮
然而退憩於齋室左右告曰天油然作雲矣未及命駕注雨
滂沱老幼歡呼於道至有不忍以簦笠自庇者即日闔境告
足自爾有請必應邦人無復水旱之懼歲大有年乃具白於
外臺使者以聞詔封慧感夫人秩視公侯列於典祀按陸氏
得姓於齊宣王之少子至漢有烈者仕為吳令遷豫章都尉
既卒吳人思之迎葬胥屏亭子孫遂家焉至衛尉君凡二十
八世冠冕不絕皆有才德名在史冊自興平康伯至秘書監
父子兄弟五世內侍嘉祥積慶挺生夫人惟夫人其生也精
修正潔入清淨海其沒也通于神明有感斯應故能致朝廷
報稱之禮甚厚既以詔書刻諸石將求老於文學之仕為之
記以傳不朽縉紳耆老且請記其事於碑陰乃為之序云戊
嘗聞朝請公元祐間以奉議郎知橐城雨暴滹沱河水盛漂
泛林木室廬蔽川而下水及城門雉堞凜然將決老弱皇恐
奔潰急調夫督水工雨且不止人無所施其力公乃朝服涉
濘立於隄上鞠躬申禱水溢堤壞相去數尺吏民救止公堅

立不動以笏叩頭願以身任之於是雨小止水波稍回河流遂復其所潰陷之地明日復為平陸如故使者方欲言諸朝會公秩滿請罷遂已北方之人至今能道其詳惟公憂國憂民所至以誠心格物如此是可書也故附於左

范成大靈姑廟記

祝安上除知台州至錢塘將濟夢一婦人告以風濤之險明日果覆舟數十獨安上得免嘗有祝史竊廟中懸幡繫其身環走殿內自言其實盜也夜半踰城還家神靈潛制于此建炎中金人入寇居民有事之者夢神告以兵難不數日城陷乾道三年秋禱雨有應父老顧安時上其事加封惠感顯應善利夫人

何山廟在何山南紙錢廟在靈巖山西伏龍岡下白馬廟在香

山西白馬寺前皆祀本境土穀之神

皮場王廟在府治西盛家浜上神本東京顯神坊土神累封明

靈昭惠祐王

茅亭司廟在慈悲橋北顯聖明王廟在杉瀆橋南朱司徒廟在

江東神祠左皆土穀之神

周宣靈王廟在寶林寺前

五涇廟在閶門水關東北並祀閶門內外五涇水神

晏公廟在專諸巷路史云公名戊仔元為文錦堂局長登舟尸

解立廟明洪武初以其陰翊海運封平浪侯一在蘇州衛名

三公廟兼祀太公關帝

潁川分祠在府治東南南正四置呂公橋東祀漢太邱長陳文

範先生實裔孫廣林妻旌表節婦鈕氏祔 本朝乾隆五十

五年裔孫陳玉林請建王文治記

吳氏祠在木瀆西津橋東祀處士騰霄嘉慶二十一年裔孫諸生荀鶴及弟錡鈺建

五路廟在芝草靈橋范莊前

司徒廟在青芝山北或云漢高密侯鄧禹祠廟前古柏四株皆

千年物俗謂之清奇古怪

藥王廟在城西盧家巷康熙庚申藥市釀金建

已上舊祠及土俗所祀

蘇州府志卷第三十三終

蘇州府志卷第三十四

壇廟三

長洲縣社稷壇 風雲雷雨境內山川城隍壇

先農壇 厲壇 城隍廟

關里分祠 關帝廟 節婦祠

天妃宮 靈濟廟 張仲祠

朱逸民祠 言子祠 先賢樊子祠

鄭子祠 徐孺子祠 陸內史祠

談公祠 陸宣公祠 顧文敬公祠

沈戎公祠 徐文端公祠 蘇學士祠

范文正公祠 胡安定先生祠 滕公祠

張明公祠 鄒公祠 朱司農祠

韓忠武王廟 朱文公祠 呂榮公祠

呂東萊祠 靈惠祠 昭澤侯祠

章莊敏公祠 劉提舉祠 劉靖節祠

薛文清公祠 俞太保祠 沙貞惠公祠

韓襄毅公祠 文待詔祠 舒公祠

朱中丞祠 瓜涇徐公祠 袁氏六俊祠

王仁孝先生祠 禮賢祠 矯文獻祠

顧御史祠 葉公祠 汪公祠

宋忠烈公祠 徐文靖公祠 育嬰遺愛祠

于清端公祠 馬清恪公祠 宋公祠

彭侍講祠

以上祀典

交讓王廟 蕭王廟 漢任使君祠

晉謝太傅祠 任敬子廟 楊和王廟

五塢先生祠 五賢侯祠 五龍堂

風伯廟 靈官廟 金龍四大王廟

元壇廟 水仙廟 總管廟

清源妙道真君廟 琴高祠 金天王廟

燕國夫人廟

夏侯神廟

葉氏祠

韓貞文先生祠

徐寶慶祠

誠孝先生祠

張孝子祠

徐純孝先生祠

以上舊祠及土俗所祀

蘇州府志卷第三十四

壇廟三

長洲縣社稷壇在縣治西南四十九步宋建元因之明廢統祭於府壇

風雲雷雨境內山川城隍神壇統祭於府壇

先農壇在縣治南南新橋西卽府壇

厲壇附祭郡厲壇

城隍廟在府城隍廟儀門左明萬曆中建

闕里分祠在長洲文一晷通關坊舊係天主堂雍正二年禁止

天主教布政司鄂爾泰改建此祠祀至聖先師乾隆二年

知府覺羅雅爾哈善重修先是有孔興豫者託名修譜借居祠中以此祠爲闕里林廟所分乾隆三十七年知府孔傳炯查議歸公責成府學官兼管祠田五十畝每歲二祭輪支長吳兩縣學租銀五兩悉歸府學經理祠之東北有文昌祠嘉慶中知府任兆燭建

關帝廟在護龍街

詳見府廟

節婦祠在舊府治基

本朝雍正元年

詔建七年卽甘露廢

寺改爲之

元和縣合祭

天妃宮在郡北中路橋

盧志卽宋章綦家廟子孫因權要侵其地遂獻於官以建廟而移家廟于側

宋宣和五年賜廟額順濟紹興二十六年封靈惠夫人賜廟

額靈應三十年封靈惠昭應夫人乾道二年封靈惠昭應崇福夫人淳熙十一年封靈惠昭應崇福美利夫人紹熙三年封靈惠妃慶元四年封靈惠助順妃嘉定元年封靈惠助順顯衛妃十一年封靈惠助順顯衛英烈妃嘉熙三年封靈惠助順嘉應英烈妃寶祐二年封助順嘉應英烈協正妃三年封靈惠助順嘉應慈濟妃四年封靈惠協正嘉應慈濟妃是年又封靈惠協正嘉應善慶妃景定三年封靈惠顯濟嘉應善慶妃元世祖至元十八年封護國明著天妃尋加顯佑號大德三年封輔聖庇民天妃延祐中封護國庇民廣濟明著天妃天曆二年加靈感助順福惠徽烈號賜廟額靈慈明洪

武中封昭孝純正孚濟感應聖妃永樂七年封護國庇民妙

靈昭應宏仁普濟天妃 本朝康熙十九年平定臺灣神湧

潮濟師 敕封護國庇民妙靈昭應宏仁普濟天妃五十九

年檢討海寶編修郡人徐葆光冊封中山王還 朝奏請歲

春秋致祭

盧志神莆田人姓林氏宋元祐以來廟食于閩累著靈驗元時每歲漕運經涉海洋當驚風怒濤倉

卒無措之際織工柁師叫號靈妃延頸俟命忽檣桅之巔有烽炬棲集則神至無虞矣

一在夏駕橋南

三山會館一在夏駕橋東漳州會館一在雁宕邨泉州會館

一在王家巷寧波會館一在新巷北邵武會館一在姚家街

興化會館一在上津橋東潮州會館一在上津橋汀州會館

一在南城下寧國會館一在白蓮橋內延建會館

靈濟廟祀白龍神在陽山澄照寺初廟在山巔宋太平興國中

移建於山南曹巷熙寧九年又遷於此紹興二十九年賜今

額乾道四年封龍母為顯應夫人後又屢封龍神為忠烈昭

應廣惠靈豐公龍母為顯正孚順聖善妃元元貞間重修明

仍額靈濟宏治三年重修

宋胡偉白龍廟碑

中吳古澤國也當春夏之交陰晴多不常鄉民以是卜白龍之歸相傳東晉隆安中繆氏女因出歸途日暮天欲雨忽遇老人詢姓氏居所願假避雨待且而前女竟失老人在已而有娠父母惡而逐之乞食於鄰踰年產一肉塊棄之水中忽焉塊破化為白龍宛蜒母前若有所告者母驚仆地須臾雷電晦明風雨交作良久開霽則白龍天矯于山椒俄頃復還產所視母已死乃飛騰而去鄉民厚葬其母於此今所謂龍冢是也自是憑巫以求立祠且言所產白龍已廟食長沙於是鄉民建龍母廟於山巔每歲三月十八日龍歸省母前

期旬日天氣肅寒四山煙雨乍晴復合正誕之辰龍必見形
 或長身尋丈隱顯於衆山之上或小如蜥蜴依於廟貌暴風
 雷雨澍溝號木則其驗也昔廬山僧祖照嘗述其本原於壁
 廟宇自國初由山顛遷于山南之曹巷熙寧丙辰歲再遷於
 今所建炎中主寺僧覺明禪師又葺今祠紹興己卯四月帥
 曹以祈雨有應奏賜靈濟廟乾道戊子二月郡守姚公憲奏
 封龍母顯應夫人附舟云吾至自長沙欲省親於蘇之陽山願
 者有白衣老人附舟云吾至自長沙欲省親於蘇之陽山願
 以錢十緡徧直而先酬其半舟師從之辰已間解維至夜僅
 行數十里老人怒其緩自爲操舟舟師因其卧遲明蹴之使
 與舟已近岸距南徐三百六十里矣老人翩然登岸徐步入
 廟舟師隨之寂無形影顧龍母帳前儼舟半直在焉旣而雷
 雨大作舟師問寺僧始知龍歸也乃輟餘直飯僧而去長沙
 廟食誕辰省母至此益驗矣乃爲迎享送神詩遺諸鄉民俾
 歌以祀焉其詞曰春花落兮春服成雨霏霏兮烟冥秧針
 綠兮蛙部鳴風蕭蕭兮林有秋聲縞爲旌兮素爲葆山之巔
 兮雲之杪雷車轟兮電光掃龍將歸兮非暮卽蚤簫管沸兮
 鞞鼓喧肴羞苾兮酒醴潔蠲盼蠻兮精意傳巖薦享兮屬袂
 摩肩歲有常兮融融洩洩果沃壤兮千里平勤稼穡兮勞農氓曰
 母子樂兮融融洩洩果沃壤兮千里平勤稼穡兮勞農氓曰

雨曰陽兮神有靈願垂陰相兮應其誠倏忽萬里兮姑少憩
 酌獻盡禮兮斯終遐惠年登穀熟兮益虔祀事自今以始兮
 千斯秋而萬斯歲

元胡應白龍祠記

吳城西三十里陽山之麓爲澄照寺寺故有白龍祠宋屢封
 忠烈昭應廣惠靈豐公龍母顯正孚順聖善妃邦人奉事惟
 謹祠重建於宋紹定壬辰歲久圯毀勢凜凜欲壓寺僧守淳
 哀積衣貲復募樂施者僅營兩廡重繪左右壁殿役最鉅力
 未易就會參政張公謁祠下慨然曰吾歲奉朝命凡餉餼從
 東南者航海以達于京風恬浪平舟楫如砥迄濟登茲匪神
 疇相是山龍所載育而廟貌弗修非闕歟乃捐金出粟掄材
 簡匠殿廬階庑像設導衛咸徹而新之丹碧髹堊瓦甃甃疊
 視昔爲侈更以田四十餘畝給祠事所以致力於神者至矣
 噫萬生總執迪而康靡陽愆亢靡潦淫汨敷爲氣和繫是
 神靈惟參政公誠與神孚克隆斯舉而淳師又能善信于人
 皆可書也予先墓去寺而近知祠宇興復爲詳師以記屬義
 弗得辭初神游陽山發祥而著跡陳山闡靈湖湘間具前後
 二記不書公名瑄爲資善大夫江西等處行中書省參知政
 事祠之修始元貞乙未越明年丙申告成距始建甲子踰一

周云 吳寬重修陽山白龍神廟記 陽山在吳城西北二十里而近視他山特高且大蓋吳之鎮也相傳有白龍產其下其說載于郡志甚異其神秩於祀典廟而事之亦甚久矣夫山之高大者能出雲雨必有神司之而龍之為物用雲雨以為靈者也使依得其地則足以致其用昭其靈而山得龍以依其澤博其勢亦尊而他山固不足以擬之矣陝右孟公以監察御史擢守蘇州明年為宏治庚戌入夏不雨公以農事為憂曰國家糧餉多仰給是郡使禾稿不收非惟民無以為食其何以免徵斂之苦乎乃七月朔齋沐已率僚屬行禱廟中未至而雨遠近沾足民皆歡然頌公公曰此神之賜也其何以報哉顧其廟傾圯弗修者六十年于此若舊有獻殿特存其址而已乃具材用徵工役擇人董治未及數月而功告成適長洲丞魯聰以公事上京師俾持書來請文為記夫洪範庶徵曰肅時雨若無所為禱者春秋始書大雩公羊傳曰大雩者旱祭也至漢世令郡國上雨澤旱則公卿官長以次行雩禮則有所謂禱矣洪範之說其身之修本也春秋之說其事之舉末也不修其身而徒舉其事雖禱於神神將不降其居不歆其祀尚何有雨之應哉

故于廟之成因書公之所以感乎神者必有其道則後之禱于此者其亦知所謹哉 明高啟白龍廟迎送神曲 薦芳兮奠醑斲冰為梁兮葺荷以為宇神不來兮孰與處空山愀兮暮多雨渺吾望兮瀟湘雲冥冥兮水茫茫有美人兮在堂盍歸來兮故鄉導赤鯉兮從元鼉冷風回兮水驚波儼靈旗兮來下巫撫節兮安歌安歌兮未極倏回翰兮山之側南有淵兮北有湫神不留兮我心憂願歲來兮惠我秋按况鍾集云蘇有陽山白龍祠相傳有繆氏女及笄未嫁夢與龍叟交彌月產一塊棄之水中跳躍不已女驚走歸明晨塊中一兒剖出來乞母乳遂收養之及長遍遊湘湖問遂居焉為之降與雲雨每歲歸省其母自後郡每有亢旱祈禱即應建祠祀之郡守况鍾下車謁祠歸是夜夢神告以母葬祠後墓久傾毀請修之况以詢寮屬咸驚異其事謂公德能感神翼日得其墓於荆榛內為修治焉

張仲祠在齊門外明燬

朱逸民祠在葑溪

言子祠在元一畝干將坊初祀於學道書院明嘉靖中廢

詳見書院

萬曆十二年申文定公時行重建今所 本朝乾隆二年給

帑修

先賢益都侯樊子祠在縣學旁支學租致祭

鄭子祠在吉由巷祀先賢國

徐孺子祠在利二畝祀漢徵士穉

陸內史祠在相城益地鄉祀晉大將軍右司馬雲雲爲郡人因督糧過吳婁地見歲祲以所督糧盡賑饑民雲後遇害民感其惠以衣冠葬此立祠祀之成化中里人沈貞吉重建

談公祠在長元學明倫堂後祀唐縣尉戡

陸宣公祠祀唐宰相贄在齊門外六里相傳公卒於忠州歸葬於蘇其地至今稱陸墓墓旁有塔院明吏部尙書吳一鵬嘗塑公像於中歲久爲僧所鬻嘉靖十一年工部郎中張問之來吳檄縣追復之仍增拓祠宇修飾像位題其堂曰仰賢朱希周記今復圯移建五龍堂巷

顧文敬公祠在張果老巷祀唐兵部尙書少連

沈戎公祠在青龍橋祀唐吏部尙書傅師今圯廢

徐文端公祠在府學東祀宋蘇州通判頤忠懿公師閔延康殿

學士鑄忠烈公謙仁孝公道祔

蘇學士祠在滄浪亭南祀宋集賢殿學士舜欽 本朝康熙三

十二年巡撫都御史宋犛建

范文正公祠一見府學一在潯墅關橋北武邱鄉廣福菴左祀

宋參知政事文正公仲淹舊有祠在關南彭華鄉權部公署

相傳為公降靈土人因立祠祀後廢明嘉靖十年戶部郎方

鵬權關務始建今所春秋祀典載在權部方鵬記萬曆二十二

年主事張立愛重建三十三年十七世孫參議允臨謀之部

使者王之都重修編修馮夢禎記崇禎十七年奉祀世孫可維增建

三太師堂 本朝康熙四十二年重修主奉能濬記乾隆八年族

孫大同守瑤以廣義莊儲粟修葺建義塾於旁以課族俊孫瑤記

胡安定先生祠一見府學一在正二晉章家橋巷祀宋蘇湖教

授瑗

滕公祠在文一晉草橋北祀宋龍圖閣學士章敏公甫工部侍

郎忠節公茂實京西路轉運副使忠惠公膺明戶部尚書忠

愍公德懋明敕建 本朝乾隆九年給帑修忠節公舊有祠

在元和道院南地隸吳縣明崇禎間建張國維記今廢

張明公祠在亨三晉報恩寺東祀宋橫渠先生載父殿中丞迪

祀於寢又公裔孫明張應奎聘烈女沈氏亦附祀明萬曆三

十六年建 本朝順治十三年裔孫提學僉事能麟重修

鄒公祠在卧龍街樂橋北祀宋吏部侍郎浩

朱司農祠在干將坊東祀宋司農少卿壽昌

太師斬國韓忠武王廟在南禪寺左俗稱韓家園初在吳縣靈巖山西麓紹興二十年敕葬於此因立廟祀之後廢明成化十年知府邱壽奏入祀典而祭無定所宏治七年知府史簡以王舊宅在寺傍就寺中為位而祭十一年知府曹鳳復立廟靈巖山尋廢嘉靖二年知府胡纘宗仍立廟寺左黃省曾記 本朝順治十六年為寺僧所毀教授程邑重建

明張習韓斬王廟記

一人之忠義一代之忠義也千古之忠義也忠義本於心人同是心者同是好也烏有彼此久暫之異哉我朝列聖發德音曰忠臣曰義士每舉以褒崇之不以古今為間曩蘇州知府邱侯壽以宋名將忠武韓斬王上聞謂王當靖康建炎間屢立戰功捍衛王室維時駐蹕臨安而三吳實在畿內民獲脫虎口而弗致肝腦塗地者惟王是賴也王後薨葬於吳靈巖山麓止存穹碑而荒涼殊甚雖有裔孫居傍微若一篔簹時

享恒缺據禮勞以衛民於法當祭矧民至今感之宜每歲官為一祭以應明詔以激忠義制曰可然祭無常所或在山寺或在城結茷而祭如是者三十稔矣知府曹侯鳳則然於懷以為事神報功吾民牧事也擬于王墓立廟以為栖神兼得灑掃松楸免於草莽遂白於巡按御史劉公丙委同知林侯廷灝董其事侯相地於冢南為構中堂四楹奉神主前堂四楹列祭儀有寢以安齋宿有廡以處庖宰繚以周垣闕以儀門蕢枿丹堊孔曼且碩經始於宏治戊午如月丁丑至仲秋之肫落其成於是郡之士庶靡不相慶幸以為順其所望也爰授習志諸石昔王風骨偉岸目瞬如電蚤抱忠義見國步艱險卽躍然應募而起始斬夏城斬關而入斷敵將首擲之埤下掃平南北羣盜既而徽欽北符高宗渡南而華風幾淪敵禍方熾神器殆非宋有王於是時以數千殘卒與兀朮四而滅之克復中原迎回二帝以竭其忠義志氣而後已奈何主蔽奸相弗圖周漢之中興忘讐忍恥自甘瘡痍其生民棄捐其土地使智勇元勳置而弗用齟齬偃蹇徒老而斃所謂自壞爾萬里長城惜哉豈惟王之不幸實宋之不幸也吁以一人之身為國家用否而繫天下安危可見忠義之在斯人與天地之元氣相為周流日月同其光明山川同其流峙草

木昆蟲同其生息暢達有不可掩焉者故前後大夫不私于吾郡而揚於大廷暴之天下聖天子于前代之忠義錫之寵光載之祀典俾三百年之隱伏煥一新於今日垂衍千萬世而弗泯曠蕩之恩為何如者哉習亦蘇之齊民同一感仰于王者故忘其膚
謏謹述如右

朱文公祠在祥符寺巷

呂榮公祠舊在陽山祀宋榮公希哲今移長元學明倫堂西

呂東萊祠在亨二畝圓妙觀前 本朝康熙間建

靈惠祠在舊子城基西祀宋常熟孝子周容 皇甫汭長洲志長洲舊有孝子祠靈

應昭著禱者繼踵廟庭隘不能容成化七年土人王英募諸里中得蘇州衛千戶陳俊割地以廣其址廟制始備旁浚井

上造輶轡病者汲井投紫蘇煎飲即愈廟之前建亭樹碑學士吳寬為記詳見常熟縣

明吳寬周孝子廟記 姑蘇城東南隅有周孝子廟廟始建於常熟在宋乾道間邑

人周容奉母朱氏有至行人稱周孝子且勇于為義見罹患

難者拯拯之恒恐後既破一日降於其家以已為神告其母

且曰兒願為國効力以保祐鄉里後果如其言終歲民無災

患遂相與廟事之其後淮南大疫云有往施紫蘇湯者全活

者眾淮人渡江酬之偶見廟貌始知為神事傳民間凡病者

禱訖汲水投紫蘇煎飲即瘥既七十餘年進士趙必錡因具

其事又以除蝗驅虎救水旱扞寇盜顯跡上於官朝廷特賜

廟額秩於祀典若蘇城有廟歲月已遠莫考其創建之由豈

常熟為蘇屬邑郡中亦冀其神貺波及以事之歟近景泰甲

戌郡中大雪民饑而疫作相枕籍死禱者取水煎飲如法亦

多獲生民益神之自是凡有所求爭趨廟下每旦庭廡如市
顧其廟既卑隘禱者益多至無所容足旁有王英者自其父
謙以來再世守廟以精勤稱謀欲改建而不敢專其事則與
里正言於縣於府而蘇衛千戶陳俊更割地以廣其址廟故
西向始易以南爽塏端正以至像設器用亦無不備自昔吳
越多淫祠狄梁公悉斥去之今孝子為人雖非若古之法施
于民也然使悖逆者則愧而改行雖非若古之禦大災大患
也然使疾疹者祈之而獲福廟而祀之豈不宜哉噫梁公既
往吳俗彌盛其尤者家自為廟祀非其鬼往往割羊豕以大
享之其歌謳歡笑俯仰跪起類乎生人之讌而卜筮巫祝之

徒假以獲利者皆是曾謂孝子肯享其祀乎而人亦敢以其祀祀孝子乎子嘉孝子有補於世教也有益於民命也有合於祀典也於祀典也於是乎記

昭澤侯祠在閶門方基

舊志神姓宋名恭字道中仕宋禮部尚書在宋已有昭澤侯之封明太祖兵下

蘇州過義濟洪值風濤見一舟順流至上揚赤幟書一在城宋昭澤侯波浪頓息登極後封鎮義濟洪建祠祀之

中報恩寺西

章莊敏公祠在報恩寺東卽章太師家廟公名棗涇源禦夏寇

有功徽宗賜廟懷德軍額曰忠烈嘉定末其孫請立於此今

為天妃廟

劉提舉祠在干將坊祀宋平江權茶提舉順之

劉靖節祠在干將坊祀明舉人政萬歷初建今圯移祀提舉祠

中

薛文清公祠在鐵佛庵舊址祀明翰林學士贈禮部尚書瑄裔

孫雪建

俞太保祠在護龍街元二晉祀明工部尚書士悅

沙貞惠公祠在九都采雲里祀明太醫福一明洪熙中敕建八

世孫諸生舜臣附

公之先汴人洪武初徵入醫院六年京師大疫命設局療治全活無算賜資甚厚卒

葬於此與方正學交為作傳洪熙中追諡建祠舜臣當周忠介公被逮時與王節等面叱撫按禡其衿事母以孝聞

韓襄毅公祠在郡學東祀明兩廣總制右都御史雍嘉靖二十

三年巡按御史呂光洵建自為記

文待詔祠在郡學東祀明翰林院待詔徵明乾隆十九年建

沈德潛文待詔祠記

辛未冬十一月

天子賜明待詔文徵明扁額曰德藝清

標且製七言律句以賜甲戌七月祠宇落成裔孫諸生含乞

為碑記竊維待詔文公一生不外德藝兩言雖千百言不能

易者弱歲却溫人贈金恐累先人清節此孝德也伯兄邁難

百計脫之至兩閱月忘寢食此弟德也中丞俞閱其貧欲遺

以金聞其言論之介乃止此廉德也天潢與寺人以書畫請婉

長必稱揚之使之成名此厚德也天潢與寺人見於守者寧藩以禮

言謝之必不應於外國使亦不難於守者寧藩以禮聘之知其有

天子以德之一言該之公學古文於吳文定寬學書於

李太僕應禎畫則講論於沈處士周詩則承厥考溫州公林

遺法兩能由師友家法以上窺古人故譚藝者於有明吳

中如沈唐祝仇諸家各有所長然或長於此者缺於彼惟公

有兼擅者而可徵至今二百餘年猶清風披拂也昔蔡京當國

藝中隨處可徵至今二百餘年猶清風披拂也昔蔡京當國

時禁止蘇文忠軾文籍幾於泯滅後高宗作序賜諡得以流

傳千古稱美談然猶當代臣工為時未遠今相隔兩朝文

氏之後清門零落幾同於孫叔氏之被褐矣乃異代

臣特加曠典俾將潛之燄復照耀而光明則待詔之流風餘

韻得以常新而士君子之修德游藝者不因 駕清淮 聖人之品

藻而益以自堅也耶先是辛未春德潛接 駕清淮 聖人之品

謂吳人中能詩文而多壽者惟文徵明汝今正復相似而遭

遇過之德潛奏臣際 聖明之朝屢蒙拔擢勝徵明遠甚苦

其文章德行萬萬不能及也時諸生含知 天語及其先世

故於德潛祝 慈寧萬壽時屬以待詔遺照進呈而

特寵賚之前事如此故追敘於記祠近蘇郡學於吳城

為異隅前為韓襄毅雍祠一功烈一德藝適相稱云

舒公祠在長元學明倫堂後祀明巡按御史汀舊在 文廟東

明嘉靖中建歲久圯 本朝康熙六十一年移建今所以

本朝教諭王瑀侯文熺祔

朱中丞祠在長元學 文廟東祀明督撫閩浙都御史統舊在

文忠烈祠西後圯廢 本朝雍正六年移建今所

明江盈科記畧

公奉世廟特簡督撫福浙於時寧紹間大豪猾要結權貴勾

蘇州府志

卷三十四 壇廟三

十一

引鳥倭入內地以千數時肆殺掠公慮長此安窮乃選將厲
士躬自督戰倭人喪膽諸豪猾見海寇既清無所規利日夜
嗾權貴圖擊去公公自是中讒口削籍家居亡何發憤仰藥
死死之日貧不能具斂其夫人徐氏假貸無所得至絡繹以
活諸孤自公死前豪猾復構島倭犯內地日引月長釀成癸
丑之變南浙淮揚間焚掠慘毒世廟旰食屬梅林胡公討平
之議者追論秋厓不死獲竟厥施何至猖獗若此又何必勞
士卒費金錢以百萬計然後奏蕩平之績哉在昔英廟北狩
于忠肅公內固社稷外籌疆圉有再造功方其盡瘁事國假
寓朝房以瓦器炊糜自食然卒不保首領卽梅林建平倭之
績亦以讒死公一意報國權貴日挾彈箝九不中不休嗚呼
余嘗謂忠肅之功在王文成之上文成世爵而忠肅之裔不
得與於通侯梅林沒久公論始白贈諡蔭卹庶幾實當其功
矣朱公之功不逮忠肅而清並之朱公之清遠過梅林而功
並之而予謚賜卹猶復缺如古之人有廉其爵貧其身以憂
社稷者公益益其人也公之祠在樂安里諸孫貧甚授書餬口
余扁其額曰清忠聊誌仰止之私云爾

瓜涇徐公祠在地一畝滄浪亭南祀明山東巡撫都御史源子

廣東參政禎祔

袁氏六俊祠在圓妙觀東祀明臨江通判表國子生褰禮部員
外郎袞文學褒廣西提學僉事表貢士裘兄弟六人皆以文
行知名吳中稱六俊 本朝康熙二十五年建彭瓏記三十
六年以表子提學副使尊尼褒子陝西按察使年裘孫孝介
先生麟祔

王仁孝先生祠在卧龍街關帝廟右祀明徵國子博士少湖先
生敬臣祭酒陳仁錫建伍袁萃記

禮賢祠舊在支礪山今移閭邱坊巷祀明章莊愍公溢今復移妙環街
矯文獻祠在陽山祀明參政順今圯廢

顧御史祠在卧龍街祀明行人其國

葉公祠在徐貴子橋祀明禮科給事中初春 本朝康熙二十

七年建葉燮記

汪公祠在桃花塢祀明浙江巡撫汪起鳳 國朝編修琬倓份

教諭鈞中允士鉉醴泉令俊皆附

宋忠烈公祠在南園舊有祠在虎邱後圯乾隆中公四世孫英

玉重建今所

彭啟豐宋忠烈公祠堂碑

當明崇禎十一年冬我兵破居庸關南下山東大震巡撫顏繼祖以所屬兵三千駐德州阻河為守太監高起潛駐兵臨清濟寧為聲援唯時巡按御史為吾鄉宋公學朱方蒞事章邱聞警馳還閱濟南及旁郡所調兵僅得千二百人倉卒間與巡道官周之訓及典史田多善等治守具而泣血上疏求

援並條陳方畧七上皆不報我兵薄城相距九晝夜城陷率家丁數十人巷戰力屈就執死于城樓之訓亦被執死多善竄免須與樓焚骸盡燬有家丁周甲者匿溝中望見之已而公長子德寬自家匍匐求公屍不獲獲公令箭及所佩印各一卽其地奉衣冠招魂以歸當是時起潛既不援濟南又以失藩王故委擧公而公先以在臺中劾楊嗣昌為所嫉遂交口誣公初未嘗死公次子德宜走京師訟冤而尚書徐石麟都御史張瑋給事中光時亨等先後疏證公死狀明白下撫按察議累年不決南都建始贈公太常卿蔭一子入監迨德宜任我朝至大學士康熙中贈公如其官今 皇帝篤念忠勞褒慰勝國死事諸臣以乾隆四十年詔表公志節謚忠烈並許子孫建祠立碑夫國家政治之大端莫切于賞功而罰臯公無守土之責而赴義若渴見危授命其為忠甚著彼僉人者居權寵地既不能以其身執干戈衛社稷又徒逞其媚嫉之私為自便之計而為人上者亦無能正其功擧而別白之烏呼賞罰不明陰陽易位此明之所以速其亡也我朝扶植人倫激揚忠義雖勝國之臣百年以往然且為之闡遺烈發幽光况在照臨之下有不奮發而興起者哉康熙時公孫廣業官山東監司建雙忠祠於濟南與知府韓公承宣並祀今四世孫通永道英玉撰恩榮錄以紀顛末與諸族

人釀金建專祠於蘇城之南園既成以麗牲之碑屬諸啟豐向者奉使濟南親拜雙忠祠下慨然攷問公守城遺蹟今歸故里觀廟貌之新益慕公之風烈無已時也乃案明史及王文簡在堯峰所紀述書其梗概傳信後世歌曰仰朝旭兮東升映畫棟兮雲興盼靈旗兮展止神恂恍兮來馮吹笙兮擊鼓薦嘉肴兮酌清醑叙會兮堂前永烝嘗兮耀珪組想峩冠兮佩玦櫻危城兮寶刀折奮絕脰兮心酸望譙樓兮火烈瞻泰華兮何崔嵬申帝錫兮天闔開滌流光兮耀華閨琨玉潔兮秋霜皚神之返兮天尺咫矢敬恭兮桑與梓敦子孝兮厲臣忠亘千秋兮昭信史

徐文靖公祠在長元學 文廟東祀明詹事府少詹事沂舊在

虎邱西隱山房 本朝康熙二十四年巡撫都御史湯斌建

尋廢四十六年侍講彭定求移建今所以明諸生許炎顧所

受耐

潘耒記

人之自致不朽者惟此忠孝大節孤行於天地間而善俗維

風亦常以勸忠教孝為先務故勝國之忠節往往表章於輿朝若周世宗之旌劉仁瞻宋藝祖之褒韓通明太祖之表余闕並為贈官立祠而齊高祖敕史臣為袁粲立傳元修宋史亦具載文陸諸人蓋忠於所事而殉之以死者人臣之極則褒忠錄節以扶植綱常者古今之通義身沒而名存事久而論定正氣憑焉不可得而磨滅也前明末造朝臣死忠者班班可考而吾吳則宮詹勿齋徐公為最著公自為經生時即以希聖希賢自淬厲入詞苑為講官正色立朝風節與文文肅姚文毅相上下北都之變公方家居不即死比聞金陵不守指池水謂人曰江萬里吾師也卒自沈以死天下稱純臣焉公沒四十餘年而潛庵湯公來撫吾吳為公建專祠於虎邱載在祀典有司春秋致祭崇德報忠甚盛典也而有冒宗遺孽竄入其中奸民蠹僧從而誘之遂至毀像撤屋盡售諸人翼翼崇祠鞠為茂草盥奠無所行路傷嗟於是徐之宗老暨郡人士控於前撫宋公下所勘治會宋公遷去未蔽厥辜復控今中丞于公下長邑覆勘甫正厥罪主持其事郡紳咸集而侍講彭公之力為多第毀祠之罪雖懲而復祠之資禾辨會彭公有編纂之事於維揚言於銀臺曹公首捐厚資兼論所屬飲助得祠費大半於是郡士夫協力裨補不日落成以虎邱故址頽陷改築於長洲學宮之東偏祠屋三楹中

奉宮詹公旁以許顧兩文學配許先生王重聞燕京之變行
 哭三日自縊福清觀不死投胥江不死絕粒七日死顧先生
 東湖當金陵變後自經學宮不死復赴水死兩先生以布衣
 諸生而慷慨殉國尤賢之用配宮詹公忠臣烈士參列一
 堂相視而莫逆同遊而不孤當亦公心之所甚慰也宮詹公
 有子昭法先生亦以清操介節見重於世稱真孝廉中丞于
 公別致褒獎祀諸鄉賢殷禮並稱聞者莫不興起夫庠序之
 設所以明人倫也死忠死孝乃明倫之實事士登膠序慮無
 不懸以為鵠幸而先正先民有若人焉得不企而慕之以為
 師表試思六十年前縉紳之居高官髦士之擅時譽者不知
 其幾今皆漸然與草木同腐而宮詹暨兩文學名垂史乘節
 炳日星夫非出自宮牆者哉至性人人所具聖賢人人可為
 處變處常各有當盡之道母曰沮豆學宮非吾儕事其可也
 彭公素以綱常名教為己任既倡修學宮復營斯祠發揚潛
 德表俗坊民之意至深遠矣未少受業於孝廉先生備聞世
 銘曰國家養士始澤宮釋褐登朝祿彌豐誼當矢報安危同
 末流身家計偏工置君國事如暗蠶脂韋便佞偷自容臨難
 苟免爭趨風峩峩宮詹正氣鍾垂紳端笏彤廷中清流倚賴
 惟君宗虞淵日墜微垣空痛思攀髯抱遺弓一馬渡江不作

龍秣陵胥臺烽燹紅擇死得所三閭從沈淵畢命何從容許
 顧兩生僅章縫未沾一命縮半通義憤所激悲填胷趨死如
 歸百折東眇軀擔荷綱常隆聞風愧死長樂翁東吳夙稱禮
 義邦有臣有士如三忠足報國恩十葉濃精為星芒氣成虹
 雲車風馬時相逢泮池清潔宮崇崇崇安魂一室昭虔恭興廢
 補闕典至公多士瞻仰資磨礱廉頑立懦殊有功臣人心天心
 不昧蒙春秋
 禋祀無終窮

育嬰遺愛祠在圓妙觀西偏雷尊殿西 本朝康熙中郡人蔣

德竣等創育嬰局於此乾隆九年改為祠祀巡撫都御史慕

天顏宋犖布政使丁思孔劉殿衡楊朝麟知府高暉郡人顧

天朗蔣維城蔣德竣許定升許王儼許蚪張遇恩顧溥黃璠

汪彬呂垣王炎午周陳範朱澧施鏞興陳紹美馬守強杜鑛

於啟禮巡撫陳大受記

于清端公祠一在府學一在金母橋西天王堂祀 本朝兩江

總督成龍

馬清恪公祠在舊府治基東天王堂祀 本朝巡撫都御史祐

宋公祠在滄浪亭祀 本朝巡撫都御史華

彭侍講祠在長元學東偏祀 本朝翰林侍講彭定求康熙六

十一年建

張伯行記

康熙五十八年長洲縣翰林院侍講彭止庵先生以疾卒於家又二年蘇之人士相與追倣模楷愜想典型請祀先生於學宮又一年先生嗣君正乾等始建先生專祠於長元縣學先聖廟之東偏明年遺書京師屬余文其麗性之石余夙仰慕先生及官於蘇辱先生嘗過從得聞先生講學之大指而親挹其道德之光容余被許訟繫維揚先生僕被過視余詣即訊所欲為吳民請留余時基余者耽耽虎視弗顧也余

既蒙 恩復任卿貳與先生積不相聞先生之沒余盡焉心

傷顧末由致一辭於先生故於其嗣君之請誼不獲辭先生

諱定求字勤止庵其自號也世居蘇之長洲康熙丙辰舉

會試第一廷對復以第一人及第由修撰擢國子監司業晉

侍講先生之考仁簡先生號吳中醇儒先生少承庭訓耳濡

目染於有宋諸子之遺書潛心而默識之於近世儒者尤得

力於王文成高忠憲二公其學以不欺為本以踐形為要體

認真切洞見本原故其為人志氣清明德性堅定富貴榮利

不足動其心阨窮患難不足以搖其守蓋擬之前哲羅念

庵湛甘泉庶幾髮髯驚鈍如余殆無以窺其所蘊之深也早

登大魁遭際 聖世迴翔館閣可坐致廡仕而先生年未及

艾引疾歸里杜門謝客耽味儒道其於天理人欲之界辨之

灼然而力行以漸至乎聖賢之域日有孳孳不暇外慕視世

之榮華小成者直霄壤矣 聖祖南巡召起校勘書局於

揚州是時先生門人方秉銓政亟引先生謂得一紙牒部即

照現任推陞同事者爭勸之先生訖不應也其難進易退有

如此居里中以綱常名教為己任遇公事發憤侃侃不少媿

力之有不逮常補衣蔬食蕭然約素或有以服飾與馬僕從

生之祠而論著之其他具先生門人王編修喆生所撰行狀中不復述後之聞先生之風者其亦將頌者廉儒者有立矣手長元縣學頹壞數十年先生通籍後倡以已財號呼勸募凡二十餘年而後潰於成以故卜先生之祠僉曰必於學祠之成依於宮牆既頌且安仰殿堂之崇閣俯泮池之幽潔先生之靈陟降於斯宜有徘徊不能去者歟乃為迎享送神之辭俾歲執事祠下者歌以祀先生其辭曰傳說之星兮凝精湖厥生兮應文明學追餘姚兮本以誠決金矢兮佩玉珩上帝命之居蓬瀛駟赤蚪兮翔太清翩然下來兮思故城吳之山兮環翠葑之水兮折瓊烝嘗千禩兮依頰鬢望閭闔兮指層雲靈不少留兮迴城闔庭霽色兮草薰壕綠波兮云云渚清風兮蘭茝芬長樹表兮坊吳人

已上祀典

交讓王廟在干將坊祀周仲雍

蕭王廟在卧龍街樂橋上相傳橋近市曹戮人處以蕭何制律故祀之

漢任使君祠祀漢會稽都尉延

姑蘇志云漢任延為會稽都尉聘高尚勉孝行周窮急多有善

政而民祀之

晉謝太傅安祠舊在吳縣乾隆九年裔孫宏綸移建至德廟西

任敬子廟在潘樹巷祀梁新安太守昉宋嘉泰三年公二十八

世孫浙西提舉清叟建後遭兵燬明宣德二年裔孫伯通重

建今民間祀為土穀神

楊和王廟在城集義鄉孝廉里祀宋將存中

存中有別館居此因祀之

五塢先生祠在春和坊西祀明陝西參議盧襄隆慶四年建一

在吳縣越來溪上劉鳳記

五賢侯祠在卧龍街關帝廟左祀明知縣鄧凌霄祁承燠胡士

容韓原善葉成章

五龍堂在縣東南唐貞元中建李紳記宋淳熙間賜額靈濟廟

皇甫汭長洲志宋淳熙十年郡守耿秉以久旱齋戒祈雨越三日有小龍如蜥蜴見於神位前香案果飭上蜿蜒不去秉與約三日內雨當奏請廟額明日大雨事聞詔賜靈濟自是凡遇水旱守官投鐵牌於祠前潭中必獲響應紹熙四年敕封第一東靈侯第二西成侯第三中應侯第四南平侯第五北寧侯今堂中肖五侯像吳中疾疫者禱之大有靈驗俗又相傳十八日為神生日先期賽社結綺為亭一在晉寧坊名旗鼓喧闐輦神徧走街巷以祈禳災疫焉

曰樂營堂

本朝巡撫陳宏謀重脩五龍堂記

吳郡有五龍堂在長洲縣東南唐貞元中建宋淳熙十年郡守耿秉以久旱祈雨越三日有小龍如蜥蜴見於神位前蜿蜒不去秉與約三日內雨當奏請廟額翌日大雨事聞詔賜靈濟紹熙四年敕封五侯曰東靈曰西成曰中應曰南平曰北寧今堂中肖五侯像自是以來凡遇水旱投片鐵于

祠前方池輒響應疾疫者禱之亦有驗故至于今不廢雍正六年特敕賜福吳富農龍神令有司專建龍神廟祀事惟謹遇旱請靈濟祠神于龍神廟同致禱而平時之祀少替龍池亦漸淤塞焉余自戊寅再奉命撫吳次年夏雨澤愆期奔走羣望凡舊所祀者皆齋潔致禱于五龍堂親詣虔禱每禱三日每日入廟輒沛甘霖冠履盡皆沾濕後有禱應亦如之皆得有年似非偶然所謂靈者誠靈而濟者誠濟矣沾祀神所以為民也特敕賜號為民禦災捍患則宜在祀典有其舉之莫可廢也特敕賜號之龍神其福吳民不亦宜乎舊祠殘缺狹隘每詣瞻拜心有未安爰命有司重為葺治增脩其二十楹殿堂門廡黝聖丹漆秩然燦然規模肅整既重新五像而殿前之池亦復濬其源泉去其鬱塞相傳下有古井故深不可測流清可鑿風雨之夕恍惚隱見似有神物護持不可褻視夫陰陽不測變化無方神之用也不可度思矧可敦思其是之謂乎平時有司朔望行香春秋祭享遇祈禱即于祠中將事長洲鄭合毓賢復為招致守祠道士籌給香火庶幾永肅禋祀昭格神明冀同收福吳之效乎祠之東與陸宣公祠毘連祠稍就傾圯同時脩葺完整一以崇德一以報功皆為急務并志之以示來者俾以時脩舉云

風伯廟在五龍堂廟中 本朝嘉慶十七年方伯慶保移神像

於此題額曰風伯龕

靈官廟在葑門外滅渡橋北一名靈順行祠宋紹興間建元至

至末燬明初重建

金龍四大王廟在閶門北濠一在清風亭南

元壇廟在圓妙觀前一在織里橋南一在義慈巷 姑蘇志神姓趙名朗字公

明

水仙廟在府治東南醋庫巷一在城西胥門外日暉橋一在閶

門外鴈宕邨南一在洞庭東山 姑蘇志古蒼龍堂神即柳毅也今為上元鄉土地贖著靈

異

總管廟在蘇臺鄉真豐里一在白蓮橋西一在盤門外仙塘橋

下 姑蘇志神沐人姓金初有二十相公名和隨駕南渡橋於吳沒而為神其子曰細第八為太尉者理宗朝嘗著靈異

遂封靈祐侯靈祐之子名昌第十四初封總管總管之子曰元七總管元至正間陰翊海運初皆封為總管再進封昌為

洪濟侯元七為利濟侯 本朝嘉慶十五年蘇臺鄉總管廟入祀典 又一祠祀元王積翁 亦名總管

清源妙道真君廟在葑門內西營一在婁門內平江路 皇甫汈長洲志

神姓趙名昱灌州人也幼從異人學仙大業中召為嘉州守曾握劍入江斬蛟尋隱去不知所終後嘉州江水泛溢為害

神顯蹟平之星幢羽葆出入江波間當時神其事累封神勇大將軍赤城王宋真宗時進今封邑中患瘍者禱之輒應相

傳六月二十四日為神生辰傾城男女奔赴以祈靈貺又見昭文縣

琴高祠在舊子城西北乘鯉橋今廢

金天王廟在城東南隅楊和王賜第園中 盧志昔人於廟旁土中掘得斷碑有金天

王三大字又有沈傳師兼御史大夫秘書鄉貢進士十餘字
字徑二寸許按唐初封華山神為金天王而傳師蘇人也故
附會祀之縣志云後
為正覺寺廟久廢

燕國夫人廟在府治東南燕家橋吳孫權乳母陳夫人捨宅為

通元寺後唐同光中移今所今開元寺亦有其祠盧志淳祐中提刑胡

穎拓四酒務隙地為射圃鑿河見古墓得石函上刻燕國夫人首級六篆字遂命碎之舊傳酒務本夫人宅

夏侯神廟在夏侯橋側宋皇祐四年建明正德八年里人沈杰

縣丞何懋重修

葉氏祠在齊二圖係東山分祠乾隆間肇齡等建置田一百十

畝嘉慶間祠孫慶元修

韓貞文先生祠在文二畝西竹堂寺東偏祀明太學生馨子樵

孫騏附乾隆二十八年曾孫鍵是升建大學士陳宏謀尙書

沈德潛有記

徐寶慶祠在韓家園祀明寶慶府同知應驥

誠孝先生祠在仁壽里祀明孝子孫永正知府黃鶴鳴記

張孝子祠在學宮鄉賢祠東偏祀孝子文魁沈德潛記

徐純孝先生祠在滄浪亭北祀孝子國潛

已上舊祠及土俗所祀

蘇州府志卷第三十四終

蘇州府志卷第三十五

壇廟四

元和縣社稷壇

風雲雷雨境內山川城隍壇

先農壇

厲壇

城隍廟

關帝廟

朱張祠

澹臺滅明祠

臨濮侯祠

亞聖孟子祠

孫子祠

朱氏祠

二戴祠

歸宣公祠

白公祠

甫里先生祠

周元公祠

二周先生祠

二程子祠

樂圃先生祠

朱忠節祠

楊文靖公祠

尹和靖先生祠

李延平先生祠

劉屏山先生祠

武順王祠

忠烈祠

謝文靖公祠

四賢祠

陳公祠

周文襄公祠

陳中丞祠

吳文定公祠

朱恭靖公祠

懷魯周公祠

韓公祠

顧太保祠

陳文莊公祠

三講官祠

顧孝介祠

丁參議祠

鄧孝子祠

許中書祠

忠孝祠

張公祠

忠烈王公祠

蔡忠襄公祠

萊陽二姜先生祠

蔣參議祠

吳氏二給諫祠

金文通公祠

方公祠

吳郡守祠

宋文恪公祠

湯文正公祠

顧孝靖先生祠

韓文懿公祠

張孝廉祠

鄉賢祠

赤闌相王廟

以上祀典

蘇州府志卷第三十五

壇廟四

元和縣社稷壇統祭於府壇

風雲雷雨境內山川城隍神壇統祭於府壇

先農壇在仁一畝相王巷南 本朝雍正五年 敕建

厲壇附祭郡厲壇

城隍廟在鈕家巷 本朝雍正四年卽土穀神張明廟改建

關帝廟在地四畝西街華嚴寺旁建置無考 本朝雍正七年

重建道光元年修

朱張祠在利一畝至行坊 本朝乾隆二年給帑修

澹臺滅明祠在尹山

臨濮侯祠在利一畝祀先賢施之常舊在闔門外施家巷久廢

國初移建太平橋南雍正十三年改建今所

亞聖孟子祠舊名鄒國公祠在城東顧家橋五十三世孫孟潼

以祖信安王府請於有司改立為祠裔孫文龍守之明萬曆

四十四年移建東禪寺西寢殿祀孟母 本朝康熙中督糧

道劉鼎修乾隆二年給帑重修

孫子祠在虎邱山浜內祀吳將孫武嘉慶十一年建

孫星衍記

吳東門外有孫子冢見越絕書云巫門外大冢者吳王客齊
孫武冢也去縣十里又見郡國志引皇覽在吳縣下明盧熊
蘇州府志引吳地記云在平門西北二里吳俗傳其地名永

昌今求其冢不得惟長洲之雍倉有冢土人呼孫墩雍承聲
相近道遠未敢定之郡之士大夫及吾族人以為虎邱吳王

闔閭所葬孫子為吳王將軍破楚故闔門亦名破楚門宜於

虎邱建祠屋以棲神因謀於當道立祠焉孫子名武字長卿

其先出自齊田完五世孫孫書唐林寶宋鄧椿姓氏書言景

公賜姓孫氏食采樂安生馮齊卿馮生武以田鮑之難奔吳

伍子胥薦于吳王將軍破楚古者將軍如左傳將上軍將中

軍之屬非有是官武特為子胥畫策不受官故越絕書稱為

吳王客春秋既載子胥破楚之功不必及武故名偶不見於

史武死有功其子明食采於富春生贖顯於齊其後世有達

人支族繁盛或居武邑武遂見姓氏書皆孫子後也孫子有功
或居昌黎或居武邑武遂見姓氏書皆孫子後也孫子有功
於吳自當廟食此土後且失其墓豈稱東南士大夫聲名文
物好古興廢之志唐肅宗祀太公望為武城王孫吳等十人
配享如孔子之有十哲 國家令甲以孫子十三篇發題試
士尤宜令武學諸生有瞻拜像設之處然則吳門立祠合於
祀典有功於民及因國無主後則祀之義也翰林院庶吉士
孫原湘孫爾準山東督糧道孫星衍高唐州知州孫良炳皆
遠祖孫子在籍青浦刑部侍郎王昶為武五十七世孫以外
家為姓亦孫子之裔建議釀贖蘇州周太守鏐吳縣舒大令

懷元和萬大令承紀實成此舉并族人之好義者列名碑石云銘曰桓桓我祖傳此韜鈴信賞必罰不殘以嚴霸吳入楚折衝樽俎歸功伍胥榮名不處兵經煌煌名將之則適道以權我戰則克士有誦法神所馮依支族分布崇祠在斯左瞻巫門北倚武阜魂無不之死而不朽廢祀復舉武功右支吳都永苾黃池掃氛嘉慶十一年仲秋記

朱氏祠在至行坊祀漢尚書益州刺史穆唐太子洗馬孝友先

生仁軌 本朝乾隆二年給帑修

二戴祠在虎邱東祀漢信都太傅德九江博士聖 本朝康熙

二十六年建

歸宣公祠在仁三畝給諫坊祀唐兵部尚書崇敬子工部尚書

憲公登祔又公裔孫文達妻旌表節婦陳氏亦祔祀焉 本

朝康熙中巡撫都御史韓世琦修

白公祠在虎邱山浜內祀唐太子少傅白居易嘉慶初郡守任

兆炯建有記

錢大昕代任守記

古人稱三不朽以立言與立德立功並稱言豈易立哉言之立者根乎德通乎功而一以貫之非徒組織其詞以為麗語其章奏可以為工也唐太子少傅白文公早踐清要直道事君不肯干進矚然於闕幸之朝超然於朋黨之局使其遭時遇主功豈在房魏姚宋下而時命限之獨以詩為百代宗師公之立言出于性之所好要非有慚於德亦豈無意於功者哉當寶歷初元公來刺蘇州次年即移疾去在郡未久史不詳其治行然讀其郡齋走筆詩有云揀煩無若靜補拙莫如勤懇懇乎洵古循吏之言也又於虎邱重開寺路桃李蓮荷約種二千株今山塘尚有白堤之稱其有德於吳人甚厚而郡志不備書自郡學名宦祠而外未有專祠以慰邦人尸祝之忱豈非中吳之闕事邪某承乏茲郡兩載以來留心掌故有味乎公靜勤之言因念昔賢轍迹所至湖山藉以生色况公

於武邱有開路之績而一年十二度游賞之所亦無過於此
 千秋萬歲精爽必留戀焉爰請於大憲相視山之東麓得蔣
 氏塔影園捐俸買之剏為公祠落成之日卜吉奉粟主妥而
 侑之嘗讀公詩石記言年十四五時慕韋房二公詩酒仙之
 名謂異日蘇杭苟得一郡足矣厥後自蘇歸洛值劉夢得守
 蘇作憶舊游一篇寄之又有一夢蘇州寄馬侍御詩晚歲編次
 文集為五本其一藏蘇之南禪寺自少至老眷眷於蘇如此
 而報功仰德之舉至今始得以藉手忝在守土聿觀厥成詎
 非大幸乎祠成當有記以識歲月并作迎饗神之曲俾春秋
 歌以樂公其詞曰公昔承詔兮牧吾民剖左符兮擁朱輪紫
 薇堂兮判牘科條簡兮賦役均武邱兮開路桃李兮班春士
 女夾道兮仰使君如父母兮撫子孫公一去兮千餘歲澤逮
 民兮久勿替言己立兮德功備曷不修兮祀事崇祠兮肇始
 山清兮水泚兜率天兮海山駕雲車兮泣止蘭肴兮椒漿勸
 公兮一觴紅欄兮綠浪想前塵兮未忘左
 挹少陵兮右引玉局相酬答兮山之曲

甫里先生祠在甫里保聖寺之白蓮院祀唐陸處士龜蒙卽其
 宅或云卒後就葬其旁廟食於此宋嘉定十七年錢塘龔時

備別建祠於左

齊東野語白蓮寺魯望祠堂其像設皆當時物咸淳中有盛氏子醉仆其像於水滿腹皆

平生詩文彙也知府倪普抵盛元至正間縣尹馬玉麟重建
罪更爲塑像腹彙不可復得矣

先是至順間以龜蒙故居爲書院後遷郡城詳見書院一在

虎邱山下塘詳第宅門

周元公祠在舊學前舊在吳縣胥臺鄉宋嘉定間先生四世孫

和州觀察使興裔駐劄平江奏建後遭兵火其裔孫文英南

老屢復而卒廢明正統元年裔孫浦淵等始遷於家在萬壽

寺西故以濂溪名坊有崇本堂王直記萬曆四十八年移建

今所興裔祠 本朝乾隆九年給帑修

二周先生祠舊在葑門外姚馬村祀宋濂溪先生暨明孝子良

卿先生乾隆四十一年改建於長洲學之東

本朝彭啟豐重建二周先生祠記

自蘇之府治出葑門二十里名姚馬村舊有二周先生祠祀
宋濂溪先生暨明孝子良卿先生創自明崇禎間閱百餘年
後嗣維新家瑞等先後捐貲繕修而祠址瀕水堤岸被衝祠
屋數圯至乾隆四十一年秋家瑞子大銓請於有司改建祠
於長元學宮之東規制廣長一如舊制既成遷木主於新祠
屬予為之記予讀濂溪先生太極圖說而有得於孝道焉孝
也者反其所自生反其所自生者視于無形聽於無聲無形
形之母也無聲聲之母也能知其母視聽一矣如執玉如奉
盈順之至也故圖說曰五行一陰陽也陰陽一太極也太極
本無極也有能知太極之本無極者斯可與反其所自生矣
是故不識不知順帝之則文王之孝也從心所欲不踰矩孔
子之孝也至哉圖說未有不明乎此而可語於盡孝者也濂
溪先生其身體之矣若良卿先生斯有其一體者歟周氏譜
記良卿先生名尚賢年十歲父病泣血籲天而病獲愈既遭
喪哀毀骨立廬墓終身其沒也鄉人私謚之曰正孝子嘗論
之使濂溪進於孔氏之門固不在顏子下使正孝進于孔氏
之門豈不足耐閱會諸賢之後哉濂溪不獲進於孔氏而遂

開程朱道學之傳正孝不獲進于孔氏迄于今乃泯泯無聞
焉是其在諸已者固有淺深廣狹之不同而非為子孫者之
所當論也宜大銓之亟亟于
合祀之舉矣爰為記以論之

二程子祠在虎邱東麓舊在盤門內紹興二十六年伊川從子

沂知崑山縣因光祿寺程師孟宅建元季燬明成化二十二

年重建 本朝順治十七年裔孫府教授邑移建仁壽里康

熙九年裔孫文彝移建今所祀司農珣於寢文簡公大昌雲

莊先生智耐乾隆七年增祀明禮部侍郎敏政 本朝工部

侍郎文彝孝子大儒文煥

樂圃先生祠在地三畝祀宋蘇州教授朱長文元符元年范忠

宣公純仁建寶祐三年賜額樂圃書院元燬明初重建 本

朝乾隆二年給帑修

朱忠節祠在樂園先生祠旁祀宋海鹽尉良

楊文靖公祠在虎邱二山門外亦名道南書院祀宋龜山先生

時明兵部尚書莊簡公成解元忠文先生廷樞附 本朝康

熙五十八年布政使楊朝麟建乾隆二年給帑修三十二年

又修莊簡公舊有祠在黃牛坊橋巷明崇禎五年建子端孝

先生大滌祠今合祀於此

尹和靖先生祠舊在虎邱雲巖寺西祀宋肅公焯嘉定中知府

陳芾卽先生所嘗讀書處建九年郡人孟猷等移於上方通

幽軒之南提舉吳格割公田四十畝為歲修費後為書院元

明移置詳見書院嘉靖十七年吳縣知縣汪旦仍建祠於故

址左有讀書堂歲久圯廢 本朝乾隆五十四年郡人移建

白蓮涇

宋黃幹新建尹先生祠記

和靖尹先生寓居平江府虎邱西菴榜曰三畏齋去之七十

有五年郡守直秘閣陳君芾通守太學博士丁君焞始度菴

空地為屋繪先生像祠焉尊前賢勵後學也先生諱焯洛陽

人年二十師伊川程子舉閣策士議誅元佑黨人不答遂棄

舉子業靖康初以布衣召不至詔褒為和靖處士洛陽陷家

殲焉先生死復蘇竄長安山谷中逆豫以禮聘溺水逃去展

轉蜀道累年紹興初以崇政殿說書召凡二十辭八年始入

見為秘書郎明年遷太常少卿權禮部侍郎每遷輒力辭其

冬除徽猷閣待制提舉萬壽觀辭不已遂奉外祠卽虎邱以

居年已七十矣後二年竟沒於會稽之寓舍先生所寓於世

如此蓋嘗考先生之所學篤于踐行不為虛語未嘗求人之

知人亦莫能窺其所蘊今其可見者經帷進講門人所記錄

耳唯卽其所寓於世者觀其所處然後知先生之於道卓乎

不可及矣利害者人心之私義理者道心之公公私之間迭
 為勝負一取一舍而賢不肖可知也至於歷險難之極而不
 變處貴顯之驟而不動抱仁戴義終其身而不悔非盛德能
 若是乎義理充於中則禍福成敗榮辱得失轆轉萬變日陳
 於前而此心自若也程子之門從游之士皆宏博俊偉極天
 下之選而於先生亟稱之其察之審矣顏淵退然如愚而夫
 子稱之亦曰簞瓢陋巷不改其樂又曰庶乎屢空然則先生
 者程門之顏氏歟里巷小人顛冥於利害之途不足道學士
 大夫則知義理矣臨利害毛髮許棄其所守者可歎也聞先
 生之風得無少愧有志於道者其亦可自勉歟二君為是祠
 有補於名教大矣故述其躬行之大節以示學者庶幾驗之
 於身而得先生之道云

黃士毅重遷祠堂記

平江府虎邱西菴和靖尹公先生祠者嘉定甲戌今軍器少
 監丁公焞通守吾邦之所創也初在山之西北隅後二年貳
 卿孟公猷聞有殯在西階之上甚懼非所以祓不祥而致蠲
 祀之誠者告於刑獄使者柴公中行乃屬長洲丞趙君崇備
 卽上方通幽之軒南闢地而遷焉蓋先生寓居之所也知府
 事沈公皞悉資其役為堂三間西向羣山前列環隴近獲老
 木修竹交闕左右高明靚深稱祀如昔甫成而柴公以召去

王公泂繼之復摹先生晚歲片紙手書聖賢格言五千餘字
 刊置兩序常平使者吳公格割公田四十六畝俾住菴者為
 增葺費孟公以始創遽遷蓋有以示來者命士毅書之木在
 因竊慨念昔登朱子之門獲聞先生之學嚴于持守之本在
 此用力之真體驗之熟復發主一無適之旨至講說而不踐
 行則為虛語問答而少差失則至誤人與夫未至於磨不磷
 涅不淄則不可如聖人之見南子者類皆務於簡實而戒謹
 恐懼之意隱然於其間未嘗不三復警省是皆持守之功也
 蓋持久則心存心存則其言斯訥其行斯察有不懈然而然
 者於是深歎夫周程之所以言斯訥其行斯察有不懈然而然
 星有目咸覩先後本末區別在前大小精粗各有攸屬學者
 於此不患講習之不能明所患講習之易明而忘持守之為
 本耳則嘗推明先生之學以勵後進今茲祠事仰止遺像如
 親炙之必求先生之學而學焉是乃興起之方豈曰小補之
 哉此又其所可書之大者遂不獲辭既次其畧輒附所聞如
 此然自先生來居積七十有五年未有表其事而出之者而
 二三年間其役再舉始克就緒則感夫事之難成而俾終弗
 壞焉以興起於無窮者又有待於後之君子也先生居之歲
 月出處之大致已詳於黃侯榦之前記是役也始於四月甲
 午而訖于六月庚戌實丙子歲云

劉宰新建和靖書院記

秘書丞永嘉曹提舉常平茶鹽事於浙西權斂散之宜而水
 申義役之勸而役者安既田里晏然案無留事一日領客登
 虎邱致敬於先正和靖先生尹公焯祠下慨然有懷以為方
 紹興五六年間中原震蕩南土未安內之所急者惟幄決勝
 之謀外之所急者奔走禦侮之力先生惇然一老漂泊蜀中
 猶一鳥之飛於江湖何算而我高宗一聞侍臣之舉求之惟
 恐不及慮其出之難既飭宣師具禮以勸行金遞絡繹於中
 途使臣肅迎於候館修門未入而列之經筵講席未温而陞
 至禁從禮貌之隆冠絕當代我高宗之意夫豈徒哉二老歸
 而周興四皓來而漢定天命人心之去留固有非人力之所
 能與者異時經筵密勿志意交孚危微精一之旨既有以續
 堯舜禹湯文武六七聖人之傳緝熙光明之學又有以垂我
 宋聖子神孫億萬斯年之式皇乎休哉初先生退自經筵來
 館於此猶榜曰三畏齋其持敬不倦如此後以其壻居會稽
 迎以就養歿葬其地嘉定中郡守陳君芾始因郡人黃士毅
 等請即三畏齋之舊繪像建祠曹君謂貌像之有嚴雖有慰
 典型之仰而佩衿之益遠寧能無城闕之嗟擬以積累之贏
 畧做先朝四書院之制立祠築室以舍學者買田收穀以食

之而儲書其中庶履其地必思其人誦其書必求其旨事方
 權輿而知府事真定張君嗣古提點刑獄前使者浚儀趙君
 立夫後使者南豐曾君頴秀復從旁慫與之且各捐貲以助
 由是材不靳庸指期而成不愆於素繼自今朋簪日盡戶屨
 日滿有學聚問辨之益無孤陋寡聞之譏斯文未喪於此有
 觀焉既成而屬余以記余方病吳人迷於佛而不知返以為
 曹君此舉不惟有以光昭我高宗皇帝之聖德抑且有以廣
 教化移風俗不孤使者之職故不辭而為之記曹公名爾今
 官朝散大夫余為漫塘叟劉宰時端平乙未八月中浣真定
 張嗣古書

元鄭元祐重建和靖書院記

宋禮部侍郎和靖先生河南尹公紹興七年用崇政殿說書
 召適奉外祠居吳虎邱先生歿七十有五年吳守陳君芾乃
 始繪像建祠而勉齋先生黃公幹為之記端平間提舉常平
 曹君爾請於朝易祠為書院乃始買田為之經久計江南內附
 以府治東南陬故宋檢法廳事基常平提幹廳事基大德十
 一年山長王達即檢法廳基建大成殿前無門徑旁無兩廡
 後雖克復故址而仍就簡陋土蓋病焉元統二年新安吳晞
 顏來為山長剔蠹弊擲浮濫積力稍久有志重建然猶懼或

中阻於是請於大府時中書左丞耿公督餉吳下聞而善之
 公既被召復請於張侯某侯入為吏部尚書今郡守道童公
 廉公剛明治稱第一晞顏請新書院公曰治不本於學豈稽
 古崇德之謂哉即選從事某董程役而籍書院粒米之在廩
 糴之得中統鈔八千六百貫輦大成殿即新址而前為儀門
 門少西為先生祠又西為土祠又西臨廣衢為外門翼殿為
 兩廡殿後習堂堂東齋廬曰六有總為屋若干楹其即工始
 于夏六月甫冬蓋十月而書院落成初先生卒於越越亦有
 先生書院先是晞顏嘗為越之書院長亦既盡瘁完葺及今
 再調而入吳故晞顏每太息曰先生學繼濂洛道被海宇其
 大者斷不繫於一祠宇之興墜然已何幸而一再獲長先生
 祠下哉既不佞無以紹隆斯道之統緒若區區祠宇而復不
 能殫盡心力則豈承學小子之謂哉斯其志有可尚者已若
 夫先生師友淵源出處大致皆具於勉齋先生記茲不敢賣
 而概言其修
 建始末云

李延平先生祠在婁門外道觀街祀宋文靖公侗舊在縣治東
 明永樂四年建後廢 本朝康熙二十八年改建今所

劉屏山先生祠在貞三畝李基巷祀宋文靖公子鞏公六世孫
 權茶提舉順之占籍於吳因建後廢 本朝康熙二十五年

提學侍讀學士李振裕重建順之耐道光二年重修

武順王祠舊在唯亭今廢無考

忠烈祠在乘鯉坊正一畝即舊縣學基祀宋丞相信國公文天

祥舊在吳縣永豐倉西北明正德十年巡按謝琛奏建賜額

嘉靖二十年巡按饒天民改建今所萬厯間修 本朝康熙

九年重建二十四年巡撫湯斌以公裔孫明翰林待詔徵明

大學士文肅公震孟耐雍正七年乾隆二年先後給帑修

明王鏊文丞相廟碑

忠義之在天下未嘗亡而宋世以身殉國能信大義於天下

者視前代為獨盛而文丞相之死尤偉且顯其許國之忠屢
 躡而奮百挫不回至于今愚夫稚子皆知其為烈也夫死一
 處有重于泰山或輕于鴻毛則所處者異耳是故非死之難
 官死其職事也方元兵渡江詔徵天下勤王無一人至者公
 于時出知遠州非有天下之責乃獨慨然獎率三軍毀其家
 以殉國其氣固已凜然蓋天下及挺身使元被執而逸流離
 間關山棲海竄卒遠行在當是時宋蓋亡矣猶號召義旅克
 復州縣軍敗身執志在必死祈死不死卒致之燕雖元之君
 臣亦皆咨嘆其賢必欲生之不得卒得死柴市從容南向有
 若平時蓋成仁取義公志素定于中非若倉卒履變慷慨殺
 身之為此公之死所以獨異而其節尤偉且顯者讀其傳誦
 其詩悲其志想見其人於乎雖與日月爭光可也公之起則
 知平江常州受圍公遣兵援之會詔趣入衛公去而平江旋
 送欵矣使公不去平江必能與常犄角常猶戰不屈公其有
 不能乎二州戮力勢或可支即不能支將背城死戰元兵必
 不敢長驅至臨安徐為之備不致倉卒銜璧一旦猝而為俘
 也其後公過吳門感念悽愴遺民間公至無不流涕者於此
 見公之惓惓于吳吳人之不能忘公也公既死燕京廬陵皆
 有祠而吳獨缺太僕少卿文君森其先自廬陵徙衡山自衡

來吳蓋公之裔胄也子斗願以其地作廟世守其祀巡按御
 史謝君琛以聞詔可賜其廟曰忠烈有司春秋享祀如禮正
 德十年夏廟成請余紀其事於石以詔來裔銘曰嘻吳故墟
 有巍新宮宮祀為誰丞相信公元為長蛇吞噬中夏飲馬長
 江已無宋社公獨奮然率兵勤王吾伸吾義焉知存亡崎嶇
 嶺海有死無二卒死於燕卓哉正氣公身可殺公志莫斂干
 萬斯年其氣烈烈撐拄乾坤昭揭日月唯忠唯義率土嚮之
 況茲吳門公所素治公治於吳不能百日公惠在吳終古不
 沒公裔公遺後復吳居作廟揭虔帝命曰俞綱常民彝弗渝
 弗墜享祀千秋為世臣礪

本朝鄭敷教文信國公忠烈祠記

有宋養士三百年國亡死事之臣甚烈文丞相信國公實首
 稱焉百世而下祀公於所生之鄉所死之地所經歷之境幾
 徧方域矣其敕建於吳中也自正德六年辛未始昔公勤王
 之師嘗開闔平江既係燕獄有集杜詩二百首如自作年譜
 其敘蘇州云子領兵赴闕時陳宜中歸永嘉留丞相夢炎當
 國夢炎意不相樂出子以制闔守平江尋以獨松事急趣還
 宿衛予行未幾姑蘇陷哀哉公蓋一日不能忘姑蘇而蘇州
 之人心百世不能忘公也其奉敕改建於學宮自嘉靖
 二十年辛丑長洲縣學既遷之後也公後人待詔公徵明書

正氣歌於堂之壁生氣凜然惟公之學一歸於孔孟殺身成仁舍生取義以公衣帶中所藏立公位於孔氏之庭豈曰時位使然蓋亦至聖大賢精英有以相盪也自辛丑至萬歷乙卯歷七十餘年而祠宇日圯邑宰胡公士容謀於公後人孝廉震孟重修之後孝廉亦以狀元位至相國風節義概能繩其武云自乙卯至今庚戌又五十餘年而傾圮者鞠為草莽矣其裔孫世光謀助於一時好義之人則顧考功子咸實首倡之濱死以屬其後人而堂宇重新焉蓋子讀宋史至信國公事及井中心史所載文丞相序未嘗不骨顛魂搖有甚於謝翱之慟哭也公嘗謂大宋三百年宗廟社稷為賈似道一人所破壞於乎何後世似道接迹而如信國公者虛無入信聞于朝重修也輸於官今榮煥興起於不振之子孫與夫好義之人心是可悲也已雖然今日而猶可興起也即人心為足恃而我公日星河嶽之精英為不磨也夫

楊繩武勅修文信國公祠記

世宗皇帝御極之七年詔直省所在古昔聖賢祠墓載祀典者有司加意保護其頽者發帑修葺之今山先生與先始祖論旨申飭舉行於是宋丞相信國公文山先生與先始祖文靖公龜山先生祠俱得遵奉修葺之旨估計勘核而公祠

規制宏敞殿寢廊廡門垣檻牖木石土瓦塗墍綵繪之屬共計費三百三十金有奇由縣牒學轉申藩府上暨督撫兩院議皆允協乃發帑遣官監修公裔孫含實始終經理其事工既竣屬繩武為文以紀其盛謹按公事本末具載宋史柴市之烈正氣之歌爭光日月人人能道之其崇祀于吾吳也以公自贛州勤王曾出知平江府時元兵壓境竭力捍禦四十餘日不拔會召公宿衛臨安公去甫三日而平江陷又未幾宋亡公遂以身殉然則公之去留繫吾吳之輕重而公去吳之日即公授命之始祭法所謂以死勤事以勞定國則祀之者也明正德中巡撫御史謝公琛題請建祠嘉靖中御史饒公天民移公祠於長洲舊學即今祠也本朝來巡撫睢陽湯公斌復以公裔孫明待詔衡山先生大學生文肅公配享永寧于公準又捐俸率屬重修公祠烝嘗世享踰二百年所矣然皆出自學士大夫賢有司守土之官尊崇先賢表揚忠烈之意而今則奉 聖主之恩綸緡國家之帑藏為崇德恤祀千古未有之曠典拜公祠下者動仰止之思即申咫尺之義觀感而興起宜什伯於疇昔駿奔之日矣公祠鳩工於乾隆二年十二月日訖工於三年月日而先始祖文靖公祠亦先後葺事竊念公捐軀殉國為宋末造忠義之冠而先始祖開來繼往為宋中葉理學之宗立德立功同為不朽今又

得並邀 聖朝盛典重新廟貌俎豆增色繩武與含等仰
先烈而頌國恩感激鼓舞之思尤倍逾於尋常萬萬者也謹
書之以昭
示於後焉

謝文靖公祠在虎邱山祀宋進士疊山先生枋得今圯廢

四賢祠在虎邱白蓮池旁祀明夏忠靖公原吉周文襄公忱王

端毅公恕海忠介公瑞

陳公祠在懸橋巷祀明翰林檢討繼

周文襄公祠在半塘普濟橋祀明巡撫侍郎忱 本朝乾隆十

年巡撫侍郎陳大受以廢祠改建自爲記舊一在虎邱法堂

後一在吳縣寶林寺皆圯廢

本朝陳大受改建周文襄公祠碑記
自昔治吳之有大德於民而又久於其任者無若明文襄周

公初宣宗以江南通賦難理蘇州一郡至八百萬思得才力
重臣往釐之公由越府長史超擢工部侍郎來蒞自宣德五
年至景泰二年時逾廿載思浹三吳前後治行彪炳史冊是
宜建立專祠以隆報享乃初與夏王海三公合祀於虎邱近
復傾圮無存春秋二仲無以妥侑明靈闕而不修後來者之
責也余奉 命撫吳慨慕前烈思展敬禮爰檄長元吳三縣
令會勘故祠宇之可去者改建公祠於元和縣境之半塘普
濟橋仍其舊貫加以丹雘厥功既成涓吉升主以祭咸謂是
舉也昭典禮洽輿情宜書之石以垂久遠余嘗詳考明史緬
公之設施是時吳民困於官田之重賦又困於徵收之無法
弊叢玩積莫可究詰公始至創平米法以均其耗立水次倉
以便其收奏減官田浮租七十二萬餘石以蘇積困而後通
計歲入所餘之米設濟農倉以備賑貸通有無一切公用歲
取給焉自是終公之任民不知凶荒兩稅未嘗逋負公之善
政莫大於此其他興革皆因時制宜記傳所載更僕難竟蓋
公以經世之才際有明全盛之時朝廷信任許以便宜行事
言無不從而郡守中又有賢能如況公者與之同心協力故
能成此偉績迨其末年有賢民許奏言路交彈皆以妄費罪公
公去而戶部遂括所積餘米爲公賦儲備蕭然未幾吳中大
饑道殣相望逋課如故民益思公不已在處尸祝史言小人

見小利而樂紛更成之難而壞之易如此可勝慨邪 國家
重熙累洽恩覃海宇我 世宗憲皇帝特減蘇松賦額五
十萬今 上御極盡免江南積逋至千萬吳民幸生 聖
世視前明之橫征暴斂更不知何如況其良法美意至今猶有
心調劑當時之凋敝更不知何如況其良法美意至今猶有
存者公之澤不且垂之百世而未艾哉余不敏繼公之跡於
後之君子相與觀感興起以光祀典於弗替

陳中丞祠在丁香巷祀明左副都御史璠舊祠在華山墓旁乾

隆十二年移建今所

本朝王鳴盛明左副都御史陳公祠堂記
陳公諱璠明成化戊戌進士由庶吉士 歷左副都御史以勲
績著憲孝兩朝沒後賜葬華山即其旁建祠堂列在祀典後
廢為僧舍丁祭亦缺康熙辛卯暨乾隆戊午郡守陳公中丞
張公先後請復祀典顧尚未有專享地祇就家祠致祭不稱
實甚丁卯歲裔孫某乃復營建專祠於丁香里既成乞子文
刊諸麗牲之石予考公平生勲節卓卓不朽者大畧有三一
曰與利除弊功被生民一日運籌靖亂智勇兼濟當公之在

臺垣也妖僧繼曉以邪術進用憲宗惑之擢左善世發帑金
數十萬於西華門外毀民居建大鎮國永昌寺公伏闕極諫
廷杖幾絕復甦曉敗擢都給事中其後寧陽侯陳輔跋扈亂
政內璠李與誣彭城伯張信欲陷以重法公復力發其奸凡
所糾彈皆人所搖手結舌弗敢言者而躡而復起不少挫抑
斯其守道守官非所謂不畏強禦者歟湖廣貴州諸省界連
苗夷多設防禦而邊將往往剋減兵食邊兵又多虛名冒餉
軍國交病公被命往勘核虛冒嚴剋扣於是將卒懾服他如
請置天下社學以端蒙養請修吳中水利以興農田勘吉甫
之獄而冤抑得伸請理周王府之莊田而疑案立勘皆興利
除弊之大者若夫運籌靖亂之功莫如平海寇施天泰等一
事時天泰與其黨董英聚眾倡亂所至攻劫東南騷動公嚴
整水師于海口用輕舟覘賊出入乘其不備襲擒天泰餘黨
悉定蓋公之勲節可見者如是祭法曰聖王之制祭祀法施
于民則祀之以勞定國則祀之能禦大災則祀之能捍大患
則祀之而周禮司勲所掌民功曰庸事功曰勞治功曰力戰
功曰多若公殆兼有之而為祭法所必及者矣既論議其事
并系之詩俾歌以侑焉其辭曰公之立朝觥觥嶽嶽屈軼挺
枝神羊厲角公之奉使民隱是諮勾稽讞決咸獲其宜公之
龕暴拉枯摧朽枹鼓不鳴用殄羣醜公有成績紀於太常桑

海雖遷遺烈愈彰擗穢既新秩祀斯舉牲醴肥香登降拜跪惟公有靈風馬雲車酌以三爵公其來乎

吳文定公祠在天賜莊祀明禮部尚書寬

朱恭靖公祠舊在北濠今移虎邱二山門祀明吏部尚書希周

懷魯周公祠祀明巡撫都御史孔教舊在胥門驛北萬厯間建

後移虎邱二山門今圯移祀朱恭靖公祠

韓公祠在沙河塘亭四畝祀明禮部侍郎世能

顧太保祠在舊學前祀明太保兵部尚書其志

本朝顧承重修顧氏先祠記

元和縣治故學宮之旁顧氏先祠在焉明萬厯間為贈都憲公讀書處公歿即為主以祀所謂醉竹先生祠也及太保公沒亦即耐祀于其中故郡志稱顧太保祠國朝康熙中別立太保祠於葑溪之蔣巷已又自蔣巷迎主復耐祀有年矣適者子姓貧薄修理弗時外戶不閉任居民之出入而莫之

禁止乾隆五十四年春八世孫瑜乃整理之相其門廡隘狹不稱曰是宜改為乃闢而新之塗其暨茨完其屋宇乃樹嘉木乃除糞穢防隔內外啟閉以時既訖工來告于承曰願有記承竊惟祠宇之設所以妥先靈昭祖德也此而不力謂子孫何瑜也慨然興修卒成厥志可謂難矣惜也阻于勢而限于財諸所規畫未能盡為也然我都憲公德被于鄉而太保功施于國所以庇賴其子孫者實多且厚增修而光大之必有振墜緒而興者為所當為豈僅祠宇之更新已哉承竊嘉瑜之志有成而樂觀其後也遂為之記都憲公諱汝玉蓄德不仕以太保貴贈如其官太保公諱其志都憲公之長子明神宗朝累官兵部尚書贈太子太保兩世皆崇祀鄉賢事見明史及郡縣志茲不具論焉乾隆五十五年二月既望七世孫承謹記

陳文莊公祠在虎邱望山橋祀明南京國子監祭酒仁錫初在

卧龍街關帝廟之右 本朝康熙十九年移建今所公崇禎

三年宣詔過家置附郭田三頃設義莊以贍族人 莊初在歲

出納亦於此

本朝汪琬陳文莊公祠碑

前明南京國子監祭酒贈詹事陳文莊公之沒也見為崇禎七年閏十月其長子濟生獻公所著書于朝始予贈謚追錄其子一人又一年復許建專祠以祀於是卜地建祠於府治卧龍街關帝廟之右歲月且久有司時節往祀輒歎其密邇市闌湫溢不足以稱也乃謀遷於虎邱得民居若干楹間而更新之門廡壯麗堂寢崇閎其旁則餽食有所庖湏有廬又其旁則有廩有倉凡文莊公所置贍族義田若干頃及祭田若干畝其所得歲租悉出納於此蓋其地山川之雄秀林陸之亢爽烟雲竹木之靚深實稱神明所栖非故祠比工已告成次君濟楨復聚族謀曰維茲麗牲之碑闕焉無辭非所以妥先靈而示子姓也乃來謁琬為文琬自惟鄉曲晚進未及登公之堂而受其學顧少而嘗從兩公子游倘復挂名碑尾附公以不朽固所願也遂不敢辭謹按劉念臺黃石齋兩先生所撰文莊公家傳備言公之在熹宗末也以講官負重望會逆奄魏忠賢父子冒功求給鐵券公當草誥辭忠賢屢遣使趣公公奮曰首可斷誥不可草由是觸忠賢怒與妖人孫文豸獄牽連及公竟削籍以歸數揚言欲殺公僅而得免嗟乎間觀史所載宦官之禍無世蔑有殆未有如漢唐及前明之甚者也然而漢之亡也以十常侍唐之亡也以北司是直宦官與士大夫為難耳前明則不然君子小人襍然並列於朝日夜用門戶相傾軋而小人遂借刃於宦官以戕君子此其過在士大夫非專屬諸宦官也當是之時吾郡被禍最酷不幸而死則有周忠介忠毅兩公幸而生則有公與文莊公避姚文毅三公夫兩周公之死非輕生也公與文莊公之生非與文姚諸賢者所以養直臣之氣也假令諸賢悉畢命于銀鑄桁楊之下則國無一人焉吾見夫靦顏蒙面噉九千歲之不已必至於策九錫策九錫之不已必至於勸進亦何所畏忌而弗敢為邪此公與諸賢之幸存係於前明宗社非小也琬故曰天也由今思之向為義子義孫者其威福勢醜非不盛且熾也會幾何時而俱歸於漸盡泯滅雖下訖於婦人豎子往往戢手恣口指斥其姓氏以為詬厲而公與諸賢獨名在天壤能使聞之者興起言之者太息然則君子小人其獲報于天者又孰為愈哉今且距公之沒逾五十年矣四方士庶往來虎邱者登其祠而拜瞻其主有不欷歔俯仰想見公之風聲氣烈徘徊不去者乎吾知其必無是也祠成於康熙十九年又三年琬始為之文至若公之述作已行於時其家

世生卒之詳已見於劉黃兩先生所撰者槩不復詮次云公諱仁錫字明卿世居長洲天啟壬戌科進士第三人由編修

附陳仁錫義田記

世有名美而實謬者義田一事也生則高下任意沒而子孫輪管因緣為利以號於族曰義其孰義之故子買田之日即屬族賢者而已無涉與已之子孫更無涉用以竟先公允毅軒公志也崇禎三年二月以宣詔歸計通籍八載叨列日講荷沾賜鑑兼積俸銀計六百餘兩契買附郭田三頃公舉憲獎善人禮部儒生叔允昌董其出入設極貧次貧二贍覈實均贍更設向善力學守節三規歲舉優給另置買義莊一所重葺成齋公都憲牌坊嗣後日久遞傳本族賢能堪任者遵依定例世為公產尋上諸各憲蒙撫院曹公過獎檄下郡邑給帖優免捐贖緩十金為葺坊助題忠直貽謀以贈一時若臺使者王公兵憲錢公郡侯史公咸義其事獎勉踰涯而司李王公尤加勗焉曰主計者當以公心善推置產之意世守勿失可也至哉言乎惟公可久名之曰義斯稱實耳計規則七十條願世世子孫無負邦君大夫獎勉之意云

三講官祠在虎邱二山門外祀明大學士文肅公震孟少詹

事姚文毅公希孟祭酒陳文莊公仁錫

顧孝介祠在天賜庄祀明御史宗孟

丁參議祠在丁香巷祀明溫處道布政使司參議元復 本朝

乾隆十年建嘉慶二十二年七世孫荆堂重修

鄧孝子祠在婁門內張香橋祀明孝子汝南

本朝潘世恩重修鄧孝子祠碑記

婁門張香橋灣舊有鄧孝子祠春秋致祭陳文莊公仁錫記其事并詳載縣志中孝子前明人名汝南家素貧事母奉甘旨無缺妻孫氏以語言觸逆遂遣之終身不復娶母嘗病剖臂肉以進既歿肖像事之如生時病將死猶痛哭奠像拳拳屬隣里勿毀也孝子故樂工每款神必深夜歸歸則門外露坐一圓石俟母覺有嗽聲始叩門入寒暑如一今圓石猶存祠門里之人屢移之輒還置不敢藏匿云祠故有殷姓為之守殷無後遂為民占據吾師恩貢生蔣實庵先生華慨其蹟之且泯也于嘉慶五年偕張進士鳳翼吳茂才鍾韓穀圭等

起而新之為堂三楹事未竟而吾師歿道光三年師之子歲貢生希賢等出已資并募之里得白鏹三百重建前六楹于是悉清民占整門額規模加廓矣吾師表彰孝行希賢能繼成父志皆有補名教不可以不志且慮歲久侵占如故也為石而記之

許中書祠在甬直祀明中書舍人自昌

忠孝祠在平江路中營基巷祀明霍山教諭龔元祥及其子炳

衡崇禎中巡撫都御史張國維奏建賜額

張公祠在虎邱山塘祀明巡撫都御史國維崇禎十三年建

本朝乾隆十年署知府趙錫禮重修

忠烈王公祠在大儒坊巷祀明遵義知縣佐聖崇禎十六年建

蔡忠襄公祠在虎邱養鶴澗旁祀明山西巡撫都御史懋德

本朝康熙二十五年建乾隆九年給帑修

萊陽二姜先生祠在虎邱養鶴澗旁祀明禮科給事中採行人

司行人垓尙書晟耐

于穎姜公祠碑記

公諱琛字如農一字卿聖山東萊陽人父瀉里邑諸生生四子圻垓坡公仲子也崇禎四年舉進士筮仕為儀真令儀真故劇邑公為政清廉慈惠與民休息然性亢直不善事上官十年不得調十四年擢禮部儀制司主事漕撫朱大興薦公廉循為天下第一十五年授禮科給事中莅職僅五月條上三十餘疏皆軍國大計上故知報可時大學士周延儒擅政國事日非公發憤拜疏謂今日賄路公行廉耻道喪皆輔臣倡之百僚靡然從風其言激切侵及聖躬上怒甚適行人司司副熊開元亦面糾輔臣賄賂事上令補疏以與面奏不合與公俱逮治錦衣衛而公下鎮撫司被刑尤酷考訊者再拷掠數百楚毒倍加公無一言惟以指染口血書死字上益怒密令所司者竟必致之死錦衣衛掌衛駱養性欲緩其獄謂應肆諸市朝事乃寢右都御史劉宗周請赦公罪上殿力

爭自辰至午不肯退上怒削其官僉都御史金光宸謂宗周
一寵佳熊汝霖等各具疏委曲開陳事稍解公與開元俱下
刑部獄廷杖公與開元各百公受杖已絕氣公弟垓時官行
罷石麟廷杖公始甦復竭力營療得不死十六年萊陽被兵
人口含溺飲公始甦復竭力營療得不死十六年萊陽被兵
公父瀉里及季子坡率眾守城城陷不屈死之一門同死者
男女二十二二人登萊巡撫會化龍疏稱姜氏一門忠孝請賜
優卹特贈瀉里光祿寺卿諡忠肅子祭葬勅有司建祠祀焉
贈坡翰林待詔垓叩閣請代兄繫獄俾得奔喪情辭悲切十
七年二月始得旨謫戍宣州衛遣行纜四十日而國變矣自
是終身不敢歸鄉流離轉徙時變易始名自號為宣州老兵
又號敬亭山人嘗登山北望流涕賦詩云先皇干滴淚獨在
敬亭山又曰莫向此生嗟白髮好為吾骨買青山天下聞而
悲之癸丑客蘇州疾作將易篋時命兩子安節實節曰我奉
命戍宣州義不敢違死必葬敬亭之麓題曰敬亭山人姜塚
之墓慎勿書原官二子泣受命頃之不能語猶呼宣州再三
蒸嘔血數升而死二子奉匱葬敬亭葬之日遠近起弔者數
千人皆歆戲嘆息泣下
門人私謚曰貞毅先生

蔣參議祠在虎邱祀明天津兵備迨布政使參議燦孫中書科中書贈兵

部侍郎之達本朝康熙五十五年建乾隆中增祀參議子廩生垣奉天治中折會孫光祿少卿文灝等兄弟六人

吳氏二給諫祠在仁三晉祀明刑科給事中贈太僕寺少卿之

佳及其孫兵科給事中迨本朝乾隆六年建惠士奇記

金文通公祠在虎邱山祀本朝太子太傅之俊

方公祠在虎邱金粟房祀本朝分守蘇松常道國棟

吳郡守祠在虎邱祀本朝知府吳道煌

宋文恪公祠在虎邱二山門祀本朝大學士德宜

湯文正公祠在虎邱祀本朝巡撫都御史斌乾隆九年知府

覺羅雅爾哈善請於巡撫侍郎陳大受即廢祠改建一見府

學

陳大受改建湯文正公祠碑
自古有功德於民則祀之非獨崇報之理固然抑其人之精
神志氣愾乎天地之間動於人心之不言而固然者也三吳
連城數十人物殷阜財賦充仞為天下劇國命重臣巡
撫滋茲土者欲自暇逸不可得每矻矻焉以自勤於其職間
亦多以勲勞政績著者而惟唯州湯公之賢為稱首余生也
晚後公幾六十年而來官於此蓋嘗反覆公之遺事讀其奏
疏告諭諸篇以追想公之誠通於上下者而後知非天下之
真儒不足以語致君澤民之大道也學術有為已為人之辨
志乎為人則雖黜猷爛然外焉而已志乎為己則澤被蒼生
而皆在於所性所學之內公少遭閔凶以難難困厄淬厲其
身心已而與北方之學者講習論灼然見天命人心之大
原以繼承聖學為己任本洛閩之精微而會通之以救功利
詞章末俗深痼之弊其學為最醇正而其治吳也承習俗靡
敝財用匱竭獨目擊而心憂之民間疾苦輒痛切上陳化俗
以敦崇節儉興行禮讓為先務居官二載嘉謨善政不可殫
述而一稟於至誠使聞之者油然而生其向慕遷改之心行畧
載公秉燭治事夜分始假寐日始食或勸進藥餌以輔衰

暮公慨然曰君命即天命也而安所疑慮乎其秉心塞淵如
此然則在官言官在學言學公之所以自盡者未始有二不
可見於是哉初吳人欲生祠公公拒甚力既而建祠於府學
年久就頽乾隆九年余始因虎邱舊祠改建以祀公俾吳民
追思慨慕者得以隨時而致其誠敬焉夫公之靈爽不專在
是然此邦公之甘棠也公往矣而所以愛吳民者未嘗與之
俱往斯祠也公之神其亦有樂於此者與

顧孝靖先生祠在虎邱山塘祀

本朝旌表孝子天朗孝靖二

字康熙四十二年

聖祖仁皇帝南巡時因天朗子宗人府丞汧之請

御書追賜

天朗者也

韓文懿公祠在婁門內祀

本朝禮部尚書菴

沈德潛記

故禮部尚書韓公諱菴康熙四十三年薨於位乾隆十有七

年相距已四十有八年矣春二月今天子念公種德積學湛深經術文章轉移風氣開天下先向偶遺易名典特追謚文懿海內人士聞之額手稱慶謂天子褒崇之當而公之得邀美諡于久遠後者為特重也按諡法溫柔賢善曰懿懿美也大也鄭樵論諡法懿居上諡之九用之君臣焉用之君子焉季文子論高辛氏才子云忠肅共懿宣慈惠和賈至撰杜鴻漸制誥云忠肅共懿才行並優余靖撰王正己制誥云和平不黨望實淵懿朱子表游御史云行業淳懿為學者宗以此四者準之韓公殆足當之矣蓋公之大行有三一曰學術深醇文足經國一日公忠事主精白一心一日為國引賢不立黨同公以英敏之資紹承庭訓其於經學自漢唐箋疏迄宋賢章句無不穿穴又綜覽諸史百家發為高文一變從前卑靡骯髒之習未遇時眾多怪之及鄉舉後春官試廷試皆第一進呈制義聖祖仁皇帝特加獎賞自是薄海遠近奉為楷模數十餘年業制義者若非韓不學也其於古文一皆闡發經傳錙鏘子史而於應奉文字實能通達治體非猶崇尚臺閣組織鞏輓以為工者中如平定朔漠方畧政治典訓律例一統志諸書凡公所總裁者皆經畫指示蔚為鴻文以提挈綱領而纂輯孝經衍義一編識者謂尤得察地明天之精蘊嗚呼是為經久之業也已公賦性忠盡

秀才時早知三藩之強過於唐之方鎮必為後患廷試時以議撤之策獻侃侃直陳同於賈誼上親擢置第一人後剪除孽驕一如公言此坐言起行本於忠君愛國之忱者也公之歷官也由殿撰充日講陟宮坊陟講讀晉侍講學士旋晉閣學給假八載內召入為禮部右侍郎掌翰林院又轉吏部右侍郎教習庶吉士充經筵講官未幾陞禮部尚書教習如故其在翰林典鄉試職撰述公慎勤恪瘁力殫心其在閣學侍講幄總書局敷陳治理垂為典要掌翰林任教習勉後進以敦品行植根本學位少宰請立長名榜以示至公俾吏胥不得上下其手位宗伯典禮肅穆除各省陋規以杜干誦請託之私蓋聖主之待公愈厚而公之自勵愈嚴故凡所會議如關稅不當增事例不當開太學肄業者不當同籍大學士達海有功國書當配享太廟不當從祀孔廟皆據理直陳無所依回至平日造膝奏對必有犯無隱歸於勿欺而厚重淵深未嘗少泄深得古大臣出則不使人知之義天子始終眷念寵錫駢蕃御書篤志經學潤色鴻業以優異之惟公之忠貞有以交孚一德也宏獎人倫公以素心士林中有學問淵博不肯與時俯仰者必誘掖扶植以成其材以成其名由公久困諸生後特遇真賞於尚書徐公乾學從此明良遇合得見重於聖人之朝恐當世之被

禮懷玉者一如已之久而沈淪也後掌院教習時上留意
人才有所諮問必舉名實相副者以薦一時多魁奇磊落之
選後歷年既久猶倚賴之然不狗虛聲不留已見惟欲汲引
其才以爲宗社生民之利心事如光天化日然此宋代洛蜀
之黨未免以賢攻賢者而公獨公且正焉其得歐陽文忠公
愛賢之盛心兼得司馬文正公無黨之遺風者耶公之大行
如此揆之謚法實昭合焉其他如處心之和易接物之謙恭
居鄉之竣界持選政以爲後學之津梁寄吟咏以寫性情之
敦厚此皆人所難能而非公之至者故畧而不詳歲五月公
之入太史孝基孫廣文景曾洗馬彥曾諸昆弟將奉公易名
神主入祠屬德潛草祠堂碑記德潛惟國朝名賢不可枚
數而增光史冊一無疵累者厥有四人湯文正公斌以誠動
物正已物正魏文毅公裔介整肅紀綱衆不敢犯魏敏果公
象樞奏簡凝霜權貴懾服陸清獻公隴其表章聖學不忘補
衮其學行風軌均足不朽得公之篤學醇行式如金玉者以
與乎其間此非一人之言實天下之公論焉抑又思五賢臣
中歿身而諡者惟敏果一人文正文毅清獻及公先後補諡
俱在今上表章前哲時於此見公道之不泯正人之可
爲而聖天子之微顯闡幽者誠足勸善彰德於無窮也
公字元少號慕廬學者稱慕廬先生系之勸善彰德於無窮也

識公性字謂天上人下土翹跂既讀公文日星鳳麟怪奇瓌
麗一歸大醇龍門峻絕敢望登堂公赴內召左右雲房並世
而生未識公面繡裳袞衣想像公旦哲人云亡文府漸蕪蛇
神土伯跳跟叫呼欲起衰靡惟昌黎公錫以尊名來自九
重按厥歲年已符四紀久而重光公實不死公實不死勸勉
來學宗經砥躬毋自菲薄末學素心慰於今茲聊摭小言揭
於公祠

張孝廉祠在縣學東祀

本朝履素先生慶孫

按縣志慶孫以文行知名祀鄉

賢士大受官翰林檢討建祠宅南宋太宰
題其堂曰履素學者私謚曰履素先生

先王之教民非直鄉遂大夫間師黨正之職也凡仕而已者
歸教其里則祀之警宗漢晉經師設黌堂繕精舍至于宋府

州縣學外分建書院擇耆儒爲山長或與博士弟子爭多焉
明初山長廢而書院尙存講學者得專席其後朋黨盛而

學術疎時文工而經義晦科名重進取亟而力田孝弟無人
必藉鄉有善士導以親敬長之節離經辨志之方故夫師

免而功倍化民成俗而有司莫知斯則儒者之效矣曩予泊

舟匠門聞庠有讀書聲則鄉貢進士張公會餘之學舍後四
 十年獲交先生之叔子大受識達而才敏洽聞周見自
 舉于鄉名曰盛弟子著錄者數百人席硯不能容則廣其宅
 齋曰拙齋亭曰讀堂亭軒曰活碧軒又于衡宇之陽築室曰
 孝廉船不志厥考所自也逾年負笈者益衆長拓地于水南
 立軒于橋下軒東曰潮生閣用紀落成之候閣東建祠奉栗
 主以祀先生焉於時巡撫都御史商邱宋公過而題其扁曰
 履素里之先生老僉曰先生居家以孝友遇人以誠持已以介
 士之百行備焉宜有私諡易名久矣宋公所題則公也非私
 也予而後吾黨合以是稱先生於是攜榼酒陳百果爨辦香
 長幼胥拜祠下大受請于予曰
 是不可無記因書其本末于壁

鄉賢祠在吳衙前祀明南京刑部郎中宋純仁子道明祈道光

元年題建

赤闌相王廟在府治東南赤門內相傳王為吳闔閭築城死而
 為神洞庭西亦有祠道光元年柵人祭冊

本朝織造使嘉祿記

赤闌相王廟在府治東南赤門內相傳王為吳闔閭築城死而
 為神洞庭西亦有祠道光元年柵人祭冊
 廬從相國伍員議以梅里卑恤遷城於蘇築城城下有蛟龍
 窟水深莫測績用弗成神以烏薪數千艘下之工乃竣神亦
 勞瘁以沒土人感其德祀之為赤闌將軍相傳元宋有紅巾
 賊攻城民見神白馬操戈顯跡抵禦一方賴以安堵明洪武
 間始封為王我朝百數十年以來每遇旱潦厲疫禱於神
 輒著靈應康熙四十四年聖祖仁皇帝南巡駐蹕蘇州
 特允前織造李煦之請加封神為護國忠顯王御香鹵簿之賜
 益洎我高宗純皇帝翠華屢幸又有日擊其事者意是號
 王今葑江父老與織署之老吏承湛恩於湫隘復於廟南
 神之顯忠佑民瞻巒昭著其何能承其地以周垣布以廊榭
 於無窮若此哉城園舊址為相王祠以地於湫隘復於廟南
 一由旬地廓巴家園故址為相王祠以地於湫隘復於廟南
 入於其旁望花樹竹木為遊觀所葢非一日矣余自嘉慶
 二於三年奉命來蘇至祠展謁喜其原隰之清曠煙雲之
 靛深也顧而樂之慨然于斯祠之歲事未修典章有缺具
 牒於今大承昌黎魏公前取伯西江楊公下郡縣議編入
 祭冊於是春秋俎豆有司壇廟四

麻佐之向之吏民喧闐釀金私祀物不備而事不豫者夫而
 後秩然有文已議既定其明年壬午春仲來修祀事順與情
 等進而言曰公斯舉也所以彰無疵癘民之福公之惠也公
 也三善備焉將見神周怨物無
 文可也無一善昭示來茲乎不
 顧辭之弗獲已乃叙蓋不可考或謂赤闌以廟近赤門
 舊志云吳神姓桑名湛壁擊將軍黑莫郝墓在蛇門裏周
 故名又吳地記云南面討擊將軍
 敬王六年築城而死今呼赤闌將
 軍或云赤闌即赤門相王即伍相

以上祀典

蘇州府志卷第三十五終

